

671.3491
084
10

卷三十

藝文志三

卷卅一

大事記

重修信陽縣志
董錫賡署

重修信陽縣志卷三十藝文志三

文徵外編一 照錄乾隆志

文徵外編二 新輯

文徵外編一 照錄乾隆志

封傅介子爲義陽侯詔

漢書

樓蘭王安歸常爲匈奴間候遮漢使者發兵殺略衛司馬安樂光祿大夫忠期門郎遂成等三輩及安息大宛使盜取節印獻物甚逆天理平樂監傅介子持節使誅斬樓蘭王安歸首縣之北關以直報怨不煩師衆其封介子爲義陽侯食邑七百戶

優恤傅僉子息詔

晉書

蜀將軍傅僉前在關城身拒官軍致死不顧僉父形復爲劉備戰亡天下之善一也豈由彼此以爲異僉息著募後沒入奚官免爲庶人

按著募傳僉二子名

晉書傅僉是始免之入奚

虔王申光隨蔡等州節度使制

唐陸贄嘉興人

自昔哲王疆理天下必選其明德樹之宗親參制藩維夾輔王室賢戚並建時惟休哉長淮之西厥壤千里人靡寧息於茲有年朕其永懷慘若焚灼思得良帥代予安人釋其危疑彰我信惠以親而授其在於茲開府儀同三司虔王諒性本溫恭生知忠孝祇服訓導躬行不渝言皆副誠事必求當端慎可以鎮俗寬厚可以長人底綏一方庶永攸屬可申光隨蔡等

州節度副大使管內觀察處置等使餘如故

訓子貢語

家語

子貢爲信陽宰將行辭於孔子孔子曰勤之慎之奉天之時無奪無伐無暴無盜子貢曰賜也少而侍君子豈以盜爲累哉孔子曰女未之詳也夫以賢代賢是謂之奪以不肖代賢是謂之伐緩令急誅是謂之暴取善自與是謂之盜盜非竊財之謂也吾聞之知爲吏者奉法以利民不知爲吏者枉法以侵民此怨之所由生也治官莫若平臨財莫若廉廉平之守不可改也匿人之善斯爲蔽賢揚人之惡斯爲小人內不相訓而外相謗非親睦也言人之善若己有之言人之惡若己受之故君子無所不慎焉

語子貢爲山東陽信宰非信陽此特仍乾隆志之舊

信陽州修造記

明李東陽

茶陵人

信陽在禹貢豫州周申伯所封地也洪武初仍元制爲州越二年降爲縣成化乙未朝廷用議者謂其地險要且兵民錯處難制復陞爲州以羅山碓山二縣屬焉州舊以縣制卑隘傾圮弗稱金谿江君以進士來知州事乃修廢起敝次第而新之州卽縣故治修室三楹前爲露臺臺之前爲甬道東爲承發司西爲架閣庫各三楹其南爲六房楹各二南爲儀門又南

爲譙樓三楹徙廨宇於堂後增置獄室樓之南東西建榜房其後爲申明
旌善二亭各三楹州之東爲布政分司又東爲汝南道皆市民家地以闢
舊址爲新堂室各二十有八楹樓西南爲公館劃高就夷爲堂室共十有
一楹而凡爲公署之事皆備州之東布政分司之北爲州學元信陽軍故
址也市民地倍於舊址廣明倫堂爲五楹三齋爲九楹孔子廟殿三楹二
廡楹十有四戟門一櫺星門一而凡爲學之事皆備州之西郊外一里爲
社稷壇南郊外一里爲風雲雷雨壇北郭外爲郡厲壇修治壇壝增建堂
室悉加於舊而凡爲祭祀之事皆備焉於是信陽之爲州規模制度闕高
壯麗巍然爲中原鉅郡自江君始也工始於戊戌成於庚子學正胡君傑
諸生呂永福輩聚而落之則相與謀曰是不可不紀歲月書功蹟以詔來
世俾相成而勿墜乃寓書上京師請予記予聞江君之至是州也究民隱
絀弊端均賦役辯冤理抑教民爲水田尤重學政躬爲辯難懲勸之法又
以其餘爲是役可謂精且勤矣夫天下之事必財與力而後成苟用之以
道雖費不爲侈雖勞而不虐然不獲上而信民則功未施而謗已作亦難
乎其成矣江君政未三載百役俱成而藩臬延譽士民相頌有不謀而合
者固其有所獲而然哉夫官署政令之所出也學校教化之所由以行者

也壇與廟祭祀之所在者也江君之治於斯乎始且圖於厥終俾後之繼君者覩其功求其所用心益圖於所謂不墜者茲州之人其世世德君之不替又何謗與怨之有哉

汝南兵備道題名記

明崔

銑

安陽人

初汝南設憲使分巡再設兵備已因其贅員而併之其官或副使或僉事建治於申總協兵刑今可知者自劉公君佐而下凡十有六人顧子孔振作題名將非追覈往績示敵後宦者乎夫汝南北土也南接楚黃地廣而饒物豐以阜民萃而錯俗敦而易古稱沃土之人嚶詬繁富之方侈靡修賁之才散樸負力之家尙競善治者雖選健吏以削其梗尤重循人以正其厚嘗聞昔之治汝南者率以嚴猛收理而以溫遜基弊以潔身約用得下而以崇賄闕費敗職迹之已陳如雲散烟息實之常留如石屹山峙夫一念而事之攸成一舉而民之攸墜噫胡其不致慎與子曰苟子之不欲雖賞之不竊又曰舉直錯諸枉則民服舍是弗圖而區區於末防屑屑於苛察弊弊於飭書故非殿邦宜民之道已顧子方介之堅一物不存法執之定巨權不撓蓋君佐之徒而尤護細行則越之茲其可永斯氓也已

汝按

南設使分巡在明初而設兵備之制則在宏治以後詳職官表

信陽州重修廟學記

郭樸 大安學士人

夫子之道尊於萬世而尤盛於我朝爰自京師太學徧及郡縣遐闊僻陋罔不建廟而秩祀焉矧河南古稱中州而信陽又周申伯所封邑聖教王化衣被久矣乃州縣之廟日就毀圮嘉靖癸丑憲副涿郡焦公飭戎是州甫行釋菜禮顧而歎曰惟學之有廟也所以揭虔妥靈廣化而彰教也夫其粲穆布列周天之下而於茲弗加修治何謂中州文物之盛耶彼浮圖外說猶壯麗厥居吾徒尊事夫子朔望祇謁春秋致奠率於頽簷欹壁是仍安在其展誠而崇報也慨然思以新之適州守吳郡鄒君察莅任遂董其役上下悉心肇工甲寅夏五閱月而成廟宇峻整廡序闢大扉去腐缺化脫黷黷於是始作明倫堂敬一亭爰及齋舍庖廩以次拓葺易置戟門與中殿相向門外鑿泮池左右創設名宦鄉賢二祠皆如制士民來遊來觀若增其祇翼欽戴之情而勵其講習游歌之志公與鄒君亦相樂厥成而思昭示永久使來請記余聞之昔周宣封伯於申蓋以申爲善國也其詩曰我圖爾居莫如南土今去古雖遠流風遺俗寧獨無存者乎際茲明盛之世涵育彌深復得賢大夫一時莅郡揆厥政原聿新孔廟巍然煥然臨而炙之俾聖教日尊而明王化益大以遠吾知南土之賢才輩出不啻

如周於以篤王祐而載君子之美於無窮可立而俟也故樂爲之記

咸喜堂記

明楊恂
新州都判

信陽州治退食之所曰咸喜堂蓋取詩所謂周邦咸喜也宣王封申伯於謝尹吉甫作詩送之道申伯之賢以爲謝人慰信陽卽古謝邑申伯所封也控接荆楚地大以遐古昔號爲重鎮備禦一非其人干戈相尋迄無寧歲卽今承平旣久無所謂戰爭之事而暴戾狙詐之習日亦漸化然民有租稅之出焉有庸調之征焉有爭訟之訴焉租稅不以時則農業荒矣庸調不以序則富室恣矣爭訟不以理則豪強長矣農業荒逐末者日侈富室恣貧窶者日耗豪強長單弱者日靡由是而寄死荏苒者比比也何也好惡旣乖衆志頓離生計愈勞恆心易失蹙蹙靡所聘而仇怨作烏在其爲喜也乃從而尤之曰習俗難治不亦誣民也哉欲速者卽欲以矯揉致之吁難矣蓋天下之事皆可以人爲參惟喜好之出於心者不容以僞然則何以莅之仲尼曰修己以敬皋陶曰在知人在安民以敬則不苟知人則不惑安民則不拂三者備矣雖致四海於熙皞可也何勞於治賦何難於役民何歎於正辭禁非則夫蘊之爲愛戴揚之爲聲譽播之爲歌頌胥此焉寓其爲喜也不亦大哉是在懋之而已

科目題名記

明葉朝陽

秀水人
州守

我朝取士之典斟酌前世不獨法意明備疏數之期多寡之數亦折其衷
道化熙洽人文駿興近益斌斌盛矣夫人以地靈地亦以人勝士以科目
升科目亦以士重惟茲中土實爲九州陝區汝鄧鄂謝文王之所以漸被
也澗灑京洛周公之所經制也汾陽涑水之勳名濂洛淇水之正學今猶
蔚然表著於世而信陽古申國崧高巖嶽而造天長淮蜿蜒而瀟澗嶽神
河靈儲秀合符鬱爲豪傑自古記之敬皇帝以來鉅公鴻儒雲蒸霞蔚人
握荆山之璧家傳鄴下之編或蜚英靈臺或樹勳策府或著績宗祊功業
文章被於天下豈非山川之光孕育使然而文明漸濡之化所灌溉者至
深遠哉夫士君子託景於賢科砥志於經濟振藻於巒序揚輝於明廷斯
其志豈徒拾青紫取榮名已耶修其身以爲天下國家士之事而學之所
繇以設也士以科目進而出其預養於學者以爲天下國家之用守之必
本於行誼行之必濟以才能立之必勵乎氣節卓然各以所長表耀昌辰
而不詭於道德之實斯其爲天下國家之成材而建學開科之典因以無
負故士與科目交相重也後之覽者亦何所嚮往乎夫通方之賢不炫文
而略質邁往之彥不巽懦而滅名是故邇積美之源追英賢之軌攷設科

之由勵思齊之志觀於是刻亦可以興矣則是刻也豈徒紀彝典昭盛美存故事焉已哉

重浚署井記

明朱家法
州上海人

余少讀荆川唐先生集知其尊人有懷公真不愧古循良云然未識其曾守信陽也余承乏來此邦顧瞻署舍低徊躑躅至牆東有一井周廣可六尺許深可六仞井上有石石有銘乃有懷公守申時所浚是在嘉靖辛卯歲余以今萬曆辛卯舉於鄉壬辰釋褐剖竹而來計公浚井之年僅周一甲子耳余忝生公鄉又承乏公後可不爲奇造哉顧問署人謂前守輒以智井目之弗汲乃汲澗流鑿垣而入余謂澗流與井泉孰潔汲澗流與井泉孰便命工重置轆轤旦夕令家人修綆其上旱不加涸潦不加盈味清嘉甘洌卽中冷惠泉無以大過若吳淞六橋諸泉均弗若之矣乃知公遺口澤於人者遠哉公德政溢在申人口碑六十餘年不忘祀典尙闕余采人士論請諸督學使者祀公名宦祠中庶幾無愧後先矣公井銘故有碑陰因磨勒而附麗其事

朗軒記

朱家法

州治咸喜堂後故有軒三楹規制偏側前後不餘步武階除地東西復繚

以高垣都不通一竇退食少憩其中苦於閤沕氣壹鬱不得舒每欲鑿垣開牖以振哺日奔僕村落間未遑也六月振務少休溽暑熇蒸乃命工移琴鶴軒之餘牖直於楹之東西八窗並確當朝曦初下夕照斜迴高樹弄影掩映婆娑時或皓月澄空光射室戶布席趺坐更覺爽然冷襲人因題曰朗軒蓋予鄙性疏宕生平不喜爲奧濶事亦不善藏奧濶語故所居地亦恆與爽塏者宜自諸生時紙筆伸紙非明窗不列烏皮茲來守此邦卽是軒爲傳舍也乎亦聊爲鑿垣開牖夫亦故我自在雅不能拂性以從地爾旣醉之詩不云乎昭明有融高朗令終而抑戒有云相在爾室尙不愧於屋漏是卽昭昭冥冥之說也請以二詩爲朗軒座右銘

重修相公園記

朱家法

唐姚文獻公宋范忠宣公先後守申申人至今尸而祝之郡署咸喜堂後故有相公堂蓋爲兩公建也而堂在相公園中則忠宣作守時艱爲游燕勝地後人因名曰相公園不啻召之棠羊之碑矣顧園久蕪穢不治堂亦頽圯穿漏弗蔽風雨余至申之明年顧瞻太息自念爲兒時外傅指授以忠宣麥舟事卽欣欣知願爲執鞭今奈何當吾世而使茲園鞠爲茂草哉乃捐俸鳩工稍加葺理園入門有修竹數竿顏其室曰君子居居後卽兩

相堂堂前植叢桂與葵榴木槿諸雜卉舊有古桑數株森陰蒼鬱蘚作龍
鱗卽非忠宣遺植亦當是二百年前物堂後有環翠亭松檜繞之冬夏不
改色亭垣外卽爲郡城城頭高柳長榆蔽芾亭上亦增茲園之勝者也園
成適何啓圖先生來飲於此笑謂余曰忠宣爲文正公子忠宣昔羈茲園
後數百年而吾子修之也倘亦文正先憂後樂之旨耶余退席謝不敢問
者歲比不登溝瘠未起潢警時發旦夕兢兢懼速官謗憂誠有之何取言
樂願語云無廢前修無侈後觀余之意良不敢視茲園爲傳舍竟廢前修
而又安能忘高山仰止之思哉先生聞余言踴之遂爲重修相公園記

大復先生祠記

明袁

隨
維揚人

隨自結髮時解文義卽聞海內大復何先生空同李先生方駕並驅爲詞
林宗擿藻者必準焉旣知慕古讀先生之文每以後時睽地不得操觚門
下之役是憾乙丑冬余領郡郎中道申陽時令子小坡君辱共事俟予偕
往乃得以通家子造先生之廬瞻拜祠宇恍若承顏稍慰數十年欣慕之
衷祠建於郡守張君校文者檄有司例先聖故事春秋祀迄今未有記其
事者小坡君不以予不文屬之記噫先生易言哉且天下名公闡先生之
文若行祠而祀之者傳且記者不知其幾鄙人之言又何能爲先生重哉

既小坡君再三委不容默默常聞天道忌盛美自昔有才者或缺於行才而行矣或奇於遇身遇矣或斬於其後之人兼得而履其全者十鮮一二惟先生文軼秦漢詩軋晉唐鴻裁妙緒歸作者之林寵重一時而性純懿謙雅遜膚罔暴欲視之若無若虛至其忠敢之氣又犯言時政亢志權貴侃侃勁立不折視彼榮利勢分眇不足重則文章道德當與顏孟程朱並峙千載論者悼其弗壽未究其施夫先生十九登朝十年讀中祕書出柄文教並列清華是豈可謂不遇但未宰執天下徧惠蒼生耳然著之撰述若何子十二篇政教具備爲萬世師此其澤長流遠又何可以方所歲月計也今小坡君克繼考志善承家學郡邑甘棠炳炳懋聲而孫震川魁省試備內史茂齡厚抱端揆可佇繩繩昌胤日益光大是先生德範來學言垂方冊功載祀典報永後人可謂全備罔缺矣以位數修短論或者非先生之意歟此諸名公所未發余不揣爲先生申之

重修先賢子貢祠記

羅文現

正白旗人
道憲

余昔承乏部曹廁名史館流覽載籍得窺聖賢遺烈如我夫子繼天立極道契古今闡百王之謨訓爲萬世之師表其德行文章傳之及門諸賢垂裕名教施諸政事者炳若日星歷歷可稽未嘗不深高山仰止之思歲丙

子濫膺簡命分察豫南駐節申陽申陽爲古名都素稱沃壤民物豐饒北
翰中原南襟湖漢高山環郭峻壑當關號爲險陝自流氛擾攘土寇肆暴
郊圻鞠爲茂草黍離鴻雁比室淪胥其雍熙之盛不復問矣迨興朝定鼎
五十餘年深仁厚澤流被天下雖越海窮陬莫不咸沐綏懷之化矧申陽
一隅之地耶故土字之荒蕪者漸已開闢民物之流移者漸以來復城郭
學校之傾廢者漸以修舉余不敏下車之後蒿目時艱每以不能仰副聖
天子嘉惠元元之至意反衷多忤乃於幾務之暇考之志乘見所載夫子
訓端木宰信陽數語不禁喟然歎曰大哉聖人之言約而能賅擴而彌廣
誠爲吏道金箴雖先賢治績莫可徧識而親承聖教施諸政化者猶可想
見也前朝正德間創有瑚璉書院崇祀有年曩爲火燹所壞銅駝荆棘湮
沒無存乃迹其殘碑斷碣於城之西北隅因感疇昔景行之私遂爾捐俸
鳩工庀材重建大堂三楹額以性道仍其舊也翼以兩廡敞以重門前臨
之以君子亭渡濠而南復葺鳶飛魚躍之館以爲士大夫憩息之地迤東
百步築臺樹軒下構水榭以爲講學習藝之處其他觀射勸農庖廚燕享
各有其所制度可謂粗具且週濬重湖樹以松柏藝以羣卉自公之暇乃
與四方賢豪以及州之屬吏紳士瞻遡無間由此而遵聖人之教仰賢者

之風咸相警省內守之以廉平外勗之以勤慎毋奪民時毋侵民利加以撫綏教養而民知所化爲下者善良樂所勸奸慝凜所懲深耕易耨以敦其本畏威懷恩以事其上克臻上理天下可以治平無事而況南汝二郡已哉斯祠之建實有裨於世道人心寧視爲遊觀之勝耶後之君子嗣而加葺當與賢山淮水並垂天壤誠不朽事也因勒石以記云

任公望伯亭記

嘉靖戊戌九月

李 燾

郡侯南嶠任公建望伯亭於官署之北既成燾率僚徒往落之規制宏敞丹雘炳麗亭高而虛徑曲而紆松竹交翠梅柳駢輝右峙賢隱左掖震雷峨峨申臺截彼南隈蒼烟碧靄朝嵐夕暉偉然四時奇觀也酒半侯觴余曰子知名亭之意乎昔申伯封謝爲南國望夙德遺愛獨藏諸人心陟斯亭也儼然申伯之在望也故因以名亭所以誌慕也燾喜乃觴以壽侯曰旨哉侯其伯乎豈惟望之而已乎詩曰維嶽降神生甫及申維申及甫維周之翰侯孕靈百粵脫穎八桂以科名殿天子邦侯其伯乎詩曰申伯之德柔惠且直揉此萬邦聞於四國侯慷慨有大度推心置人煦煦不立城府宦轍所至名聲若流侯其伯乎詩曰申伯番番周邦咸喜不顯申伯文武是憲侯孚德鬯儀而民俗淳章軌貞教而士習敦察情糾變而介冑之

士罔敢奸侯其伯乎夫弗及則望望則似之而已侯實是之孰其似之嗚呼侯望伯繼侯而來者望侯望伯而伯則德伯也政亦伯也望侯而侯則德侯也政亦侯也後先相望彼此一揆申民其有瘳乎是故斯亭之作爲生民望爲天下望爲聖天子藩屏望非爲一方山水花卉之樂望也若曰修崇高而忘民隱縱逸遊而隳政事豈侯之所望於後人亦豈後人之所以自望乎詩曰吉甫作頌其詩孔碩其風肆好以贈申伯侯固無愧於申伯矣燕之猥陋何敢望吉甫雖然愛而弗知弗智也知而弗傳弗仁也弗仁弗智余將是懼若之何其釋辭也侯笑曰請紀子言於石以振後之望者何如燕曰諾

重修道署碑記

清李承祖建昌人

國家設官分職衙署重焉非徒以肅觀瞻而實賴以振綱紀率庶僚察民隱也申陽地當孔道東抵淮揚西跨宛鄧南控荆楚北拱燕京四方車轍馬迹之所往來稱雄鎮焉洪武初置觀察副使分巡南汝郡邑舊廨在城之西偏逼處湫隘地形窪下水潦至浸淫爲壑吏胥褻裳以從居恆苦之縉紳嘗爲予言曰署東有堂頗埽埴蓋遷諸奈蒞任以來馳驅鞅掌僕僕無寧昇心雖欲遷而工費莫措不敢以土木貽吾民憂遲之又久而未果

修也辛丑秋奉委督運赴荆子關未歸而家大人自滄中凱旋道經申署見階除卑溼庭廡索然遂書示承祖曰居官服政所以教忠因陋就簡不可訓也迺捐囊橐鳩工庀材結構具備而寸椽片瓦不費民資未五浹旬而落成紳衿耆老歡忭踴躍立碑稱慶志喜也九月抄余自外至瞻仰堂構高明正直軒爽洞開無所壅蔽不特可以資吏治而內有以證心學曠如也且寅賓有館鐘有樓禱祀有祠役有舍凡所以承宣布化施政教時者靡不周至噫善矣而吾因之竊有感焉夫天地蘧廬也光陰過客也矧茲傳舍寄居幾何鰓鰓然好壯麗其觀哉然其所以務欲改造者良以紀綱由此而立法令由此而施庶績民風由此而表率則登斯堂者膏澤未徧必思所以周之輿情未伸必思所以達之火耕水耨必思所以恤之鼠牙雀角必思所以消之萑苻之寇未泯也何以弭之烽燧之烟未息也何以靖之蚤作夜思兢兢乎所當先民之憂而憂後民之樂而樂者正百端交集於心而敢以斯堂自暇逸乎哉則今之改造斯堂原非爲一人計而爲後來撫綏茲土者計也承祖不才恪遵庭訓自閩中作宰卓異刑曹旋陞戶部郎中欽差監督太平倉陞授斯任近二十年兢業憂勞惟仰體聖諭清慎勤三字以爲法守額其堂曰清慎誌不忘也亦卽家大人所謂教

忠之意也撫心自問祇期以不愧神明之照察者以不負聖恩之浩蕩云爾

重修紫霞觀記

張 鉞
涇州 苑人

凡人發一善念非有以貫金石格鬼神其始一二人信之其後未必千萬人從之也卽信從矣亦未必歷歲時竭頂踵不憚艱難以必期於有成也蓋有所爲而爲善與無所爲而爲善誠僞於是乎分惑於因果報應之說與激於故宮禾黍之感公私又迴別矣申陽爲豫楚通衢車馬輻輳其縉紳先生喜俠義其都人士女樂施與精舍之盛甲於他邑而金碧輝煌係一州之瞻仰者紫霞觀尤著名觀之來也不知創自何時前大殿五間塑三清神像東西廊十二間塑十殿閻羅後層高閣三間塑玉皇上帝東院三間奉東嶽帝也東院後又三間奉真武師也西院三間奉三官帝也西院後又三間奉純陽祖也規模壯麗制度宏敞匪僅以棲丹客凡邑中歲時朝賀飲射讀法咸於是乎在重修於前明嘉靖四十五年迄今百有餘載棟宇傾圯丹堊剝落行路傷之夫事之無關於興廢者聽之可也若夫百爾嵩呼藉以觀天威於咫尺州長朔望賴以申約法之三章是招提也而典禮係焉魏闕同焉矣匪可任其頹敗者也然而功程浩大點金無術

世無獨孤信善孰是捨金沙以佈佛地者哉不謂有李生揚發者太學彥也慨然引爲己任又以獨力難爲復倡率街民田秉直等多方募化載歷寒暑七閱春秋敵東郭之履不以爲勞秃淳子之舌不以爲苦罄季子之金不以爲困甚至積雪滿脛堅冰在鬚猶持簿於村莊餐風於道路也旣已銖積寸累陸續建修重臻巍煥又於大殿前創捲棚五間東西門二座戲樓一座瑰麗尤加於曩昔余甫下車卽聞李生名間因公事至觀睹畫棟雕甍不禁爲之三歎也嗟呼彼何爲者也或曰祈將來之福結再生之緣也余獨以爲否否夫人雖至愚其視現在之金錢與他年之利益孰緩孰急痛癢之髮膚與化去之形貌孰幻孰真而顧肯解橐募修敞精勞神舍其有憑求諸無據者乎惟一念之善貫乎金石因以感孚同類而冥漠中亦若或啓之若或相之俾莫大功程不數歲而觀厥成也從此百爾執事儼對揚者瞻同丹陛讀法令者肅乃觀瞻則紫霞觀之重新不獨爲騷人逸士選勝之所也而一邑之聲名文物冠裳玉帛咸壯其彩焉已至若三清玉帝東嶽十殿之名目余不知其誠有是否然以人道考之天子治天下必三公論道六卿分職予有功奪有罪而後萬國理彼廟中之冕者旒者爭者獰者賞善而罰惡者救苦而救難者事雖涉於杳冥要之幽明

一理不當盡指以爲無也書不云乎作善降祥作不善降殃又曰天道無親常予善人若李生者可謂善人非耶舍己從人功成而不居殆亦無所爲而爲者矣是舉也經始於乾隆七年九月落成於乾隆十三年冬月約費千有餘金余蓋心儀李生與州人之樂善而爲之紀其大略云

重修奎樓記

張鉞

儒者翹首科名詩書其龜鑑也舍是而問道於星宿鬼神誕矣藉曰有之奚必其我聽也卽聽矣昂昂七尺軀不自奮翼而於渺冥中乞靈造化小兒笑人哉雖然朝菌蝓蛄之智烏足以測遠欽若旣命其於日月五星蓋兢兢焉厥後實沈臺駘之分以及聚井聚奎聚箕尾休咎諸徵又何歷歷桴鼓應也天官書斗星戴匡六星一曰上將二曰次將三曰貴相四曰司中五曰司命六曰司祿蓋魁神之爲政於科第舊矣他邑率建閣於巽序之巽方肖像事之以主文風吾申何獨不然且吾申跨瀨淮爲襟帶而賢嶺秀峯紫雲筆架諸名山起伏左右以爲岸沙峴者曰堂闢水明龍虎相抱風脈秀矣其中應有以文章致位列卿者自何孟董王諸君子後人才輩出甲第蟬聯幾與鳴珂之里相伯仲以故信陽之名甲海內云曾幾何時形勝依然人文漸衰前輩風流邈不可追無所歸咎毋亦事神之有關

與何古今人之不相及也諸生前捐予曰吾申舊有魁神樓建於南門外之通衢震兌相向以接西來之山水每當夕陽銜山時登樓一眺日透殘霞萬峯皆紫光搖碧水一帶如金雅與文人之慧業相宜今則瓦礫之場矣此亦吾州文脈盛衰之一大關鍵也哉予曰信如諸生言盍建諸因上其事於觀察任公並請爲文以爲郡人倡由是慕義而輸金者且踵相接焉落成之日丹壁朱欄高出城堞鈴鐸之聲隨風遠落山水秀靈之氣胥匯於此文風之盛庶有兆乎雖然神亦何常之有學則靈不學則否諸生各自奮翼攀秋桂於月窟賦春宴於曲江次第而起以追前烈無使後人笑拔地倚天岑然聳出者靈於昔而不靈於今邑大夫其亦與有光也夫

信陽州舊志敘

明楊若梓北直人
州守

蓋聞九州之志謂之九丘丘聚也言九州所有土地所生風氣所宜皆聚此書也書禹貢周禮職方豈卽孔子所嘗述而敘之者耶內傳收附鑿經稱要典外傳七雄策晉乘越絕諸書漢晉以來地理志後世一郡一邑各有圖志皆史之流也自非司馬子長不能盡覽縣寓山川廣輪夷阻之處觀風采異者一披圖按籍而形勝風氣盛衰漓淳之故興除釐幹之方犁然若指諸掌志之重也如此余諸恆詠誦每苦古今疆域多所淆變欲一

觀諸要難比釋褐忝守茲土申黎姚范儼樹前模深愧瓦礫在諸賢後清牘稍暇諏爰故典庶得視已成事修弭修揀當有必至之符必然之畫迺武城蕞爾不乏澹臺子羽典籍蕪缺蓋有間已大復先生書以齒限其冢孫約天祿石渠之彤管爲扮榆章傳美信考覈已塵借未銓次邇購得舊志一以縣名一以州名俱出憲廟時毋論詞不足以行遠卽目前遷改多所未協因敦請參知劉公總其事其諸彙分各有所司若乃衷而裁之俾不溢而垂可永則諸大夫士咸以望不佞余惟志之地理也首圖考次建置則敷土意也九州之地皆有分星以觀妖祥說昉周禮保章氏甘石諸家牽合互異然不可盡廢也土敷野分厥有疆域而城池街坊鄉村鋪舍附焉山川爲一州紀綱若關塞岡澗橋梁津渡俱以類附塘堰卽古河渠遺意民生利賴居多寺觀古蹟是亦一方形勝所在風俗可以觀時變又可以觀變時者必備考今昔同異因田制賦食貨懋遷於其中以民足足國則官師爲政公署官師之所有事也選舉祠祀俱國家鉅典要亦章往勸來惟宦績人物最重流寓列女附人物中生者例不立傳宦績旣久此州人士已不能詳余有深念焉人情各爲其先疇不欲資飾以侈後觀知我罪我則不佞所不敢辭藝文例在末簡州更有衛則以武備終焉類以

次分事以類著義例井然不復不漫卽不能盡仍宗伯公舊大旨固不甚相遠若二舊志時備參考耳諸所論著不必規規古史抵掌孫叔敖衣冠凡茲申州所有土地所生風氣所宜無慮皆聚此書矣試一展卷恍涉清淮陟賢首登申伯之崇臺入黎公之曠宇頽仰今昔孰啓濟端孰返醇始遐標邇映何去何從豈惟申人士有厚幸哉卽守土者且得藉手以無負茲一方子遺云

重修信陽州志序

康熙十六年

清賈待旌

州古守韓

攷周禮職方氏掌天下之圖以掌天下之地辨其邦國都鄙之人民與其財賦周知其利害蓋視天下於指掌矣後鄼侯何入秦丞相御史府收圖書具知天下阨塞戶口多少疆弱之處民所疾苦者卽是物也其志乘之權輿乎大體具矣後世第少效遷固表志列傳體附益之耳乃後儒陋議以爲周職方藏之司馬祕不得闕自鄼侯何改隸司空浸以泄露七國因得按圖規變是以周公制禮爲管商陰謀之書也寧知王道蕩平職方所守期於周知山川藪澤六畜九穀之數要因地順天任人民府萬物使同貫利而已必以爲慎祕不泄則誰與爲奉行敷施何貫利之能同也故民牧一方者不知其山川之險易何以扼吭喉策防守不知其戶口之多寡

田賦之盈虛何以慎勞來供維正不知其食貨之乖宜風俗之真慝何以勤勸課善轉移以至沿革之成蹟文教之盛衰前哲之景行文獻之彪炳不知何以時振舉勵經術表示芳型緣飾吏治耶然則志乘一書不唯掌自職方卽長吏之箴規在是矣矧義陽高山環繚自爲陝區南襟全楚北屏中原平陂所關匪直百里之效也其志顧不綦重與然爲志之弊數端一曰略而不詳一曰泛而寡要一曰虛而未核一曰俚而愧典是則上不足稱採風良史之選下不足裨因革風勵之實君子無取焉義陽舊志成於郡守楊公若梓大參劉公尙樸數先達之手搦撫典覈義例簡嚴彬彬質有其文矣奈事止於前朝萬曆之季耳後四十餘年缺焉未舉且梨棗歸之劫灰原書鮮有存者不佞下車悵然惜之會憲臺賈大中丞檄督纂修因典訪遺聞博採輿論哀集粗倫俾郡人劉子詮次續成之爲卷八爲類二十文減於昔事增於前然後申伯以來二千餘年之事蹟人文列眉炳而然燭計不佞前任通許克成許志茲任信陽又克成信志雖事之廢興有時而私心竊自慰也今試考建置則動未兩之思按山川則增恃險之慮披戶籍而民之凋瘠者幾何稽賦役而催科衝劇者何術之善也生殖何以漸饒風氣何以返樸選舉藝文何以不愧右文雅化孰非黽勉師

帥者之責乎至宦蹟人物隆萬以前從嚴天崇之間從恕於其嚴者而思閱數十餘代而人之可傳者僅此世所少者豈在高官臚仕哉於其恕者而念光獄氣分之後凡一行之善一藝之長卽鳳毛麟角之祥也忍不善善長而惡惡短乎繡之傳於通都庶後之覽者交相砥於無盡也奈何欲以陰謀祕惜坐廢盛事哉

書丁岳驅虎

唐薛用弱
未詳里

貞元十四年申光虎暴白晝噬人時淮上阻兵因以武將王徵牧申州焉徵至則大修擒虎之術兵備坑穿靡不備設乃重縣購得一虎而酬十緡焉有老卒丁岳者善爲陷穿隨列於太守請於山門徑路張設以圖之徵後不數日而獲一虎焉虎在深坑無施勇力岳遂俯而下視可以侮誚虎則跳躍哮吼怒聲如雷而聚觀之徒千百其衆岳銜其術得誇喜異常時方被酒因爲衣襟掛跟而墜穿中衆共嗟駭謂靡粉於暴虎之牙爪矣及至就窺岳則端坐而虎但瞪視耳岳之親愛憂岳共設計以轆轤下巨索伺岳自縛當遽引上或希十一之全岳得索卽纏束腰股揮手外人共汲之去地三二尺其虎則以前足捉其索而留焉意態極仁如此數四岳因卽謂之曰爾輩縱橫入郭犯人事須剪除理宜及此願爾之命且在頃刻

吾沈醉誤落此中衆所未便圖爾者蓋以我故也爾若損我固激怒衆人我氣未絕卽當薪火亂投爾爲煨燼矣爾不若從吾當啓白太守捨爾之命冀爾率領羣輩遠離此土斯亦渡河他適爾所知者矣我當質之天日不渝此約其虎諦聽若有知解岳則引繩衆共出之虎乃弭耳矚目不復留岳旣得出遽以其事白於邦伯曰今殺一虎不足禳羣輩之暴咒語誠約乞捨之冀其命侶四出管界獲安耳徵許之岳遂以太守之意丁寧告戒虎於陷中踴躍盤旋如荷恩施岳卽積覆土坑則稍益淺猶深丈許虎乃躍而出奮迅躑躅騰風而逝自是旬朔之內羣虎屏迹而山野宴然矣吁保身全軀之計雖在異類亦有可觀者焉若暴虎之猛悍沈厄陷竅得人固當恣其狂怒決裂噬齧以豁其情欲斯虎乃因岳以圖全而果諧焉何其智哉而岳能以言詞誘諭通於強戾果致旅行出境之異況免掛骨之害又何智哉斯乃誠信交感之致耳於戲誠信之爲物也何其神與

節婦袁劉氏傳

清崔琳
永濟人
監司

劉氏庠生袁悌妻也性端淑幼遵姆訓年十七于歸紡績佐讀悌得入黌序結褵十載悌病故遺一子甫五歲堂上翁姑俱八旬家計四壁立劉矢志靡他事舅姑身任子職訓弱息母兼師道採野苳爲食雪夜裹草苦手

足皆凍裂衣不禦寒襪不充腹奉親教子歷艱不變以報亡夫於地下孀
操五十年壽七十有七卒州令具題表其閭復崇祀節孝祠子履中古道
可風孫七潛淳深瀚渟渟渟皆食廩餼蘭桂齊芳繩繩不絕人咸稱爲苦
節之報余故次其事而爲之傳

召南申女頌

漢劉向

召南申女貞一修容夫禮不備終不肯從要以必死遂至獄訟作詩明意
後世稱誦

高申公贊

唐呂溫河中人
州刺史

維嶽降神佐唐生申忠貞自天孝友如春德爲邦基仁厚人倫肅肅雍雍
眞王者臣慶因歸妹光延天配婚媾之中雲龍潛會建公南海廓我無外
諒我撥亂弼文開泰邊彼庸蜀薦鍾澆季文翁之化若掃於地申公攸徂
有教無類父子兄弟望風相愧勃興儒雅大復禮義西南頌聲到今不墜
名登元勳理冠羣吏全材大器於鑠厥懿

竹里王將軍贊

明王世貞太倉人

謂人道有憑耶坐累則株議功則虛謂天道無憑耶於身則抑於子則直
維子之直維公之遺文武忠孝盡在是矣語曰不知其人視其後其斯之

讀與

井銘有序

明唐 瑤州武進人

郡齋舊無井水取給於西河汲人出入關人艱於檢防且前守置落星於儀門北地當離位坎位須水乃可制爰命工鑿井於廳事之東深幾六仞有奇陶甃甃其中轆轤梁其上工成爲之銘曰洌彼寒泉發源桐柏一勺分甘民用乃足載聞易訓井井往來蒞茲土者其念之哉

贈陳州刺史義陽王神道碑

唐張 說燕人

昔高祖之起唐侯萃隋命太宗之威四海正萬邦作藩帝家用建王國二十一族堯之昭也十有一宗文之穆也王諱琮字某文帝之孫紀王之子龍種異品鳳毛秀色仁義天啓德威日就學無不探藝無不究故齊王之胤以爵推恩周公之子以才分政總角封義陽郡王弱冠拜歸州刺史又守檀州又撫沂州若放之舊荆人是懲單于之衝胡馬自遠淮沂其父邦國不空遭王運中微投於南海書稱大去憫失土之諸侯禮不逃誅議無辜之王子某年月日遭六道酷吏薨於桂林之野春秋五十神龍之初興廢繼絕追贈陳州刺史王生不得志沒受遺榮信乎才之短長不如命之豐約德之輕重不如藝之厚薄有矣季子豫州刺史行休鬢齡羈孤託身

炎厲藐是餘慶歸然獨存泣血上請迎喪遠裔開元四年二月至桂州王同氣三人往偕遇禍殯殮無主封樹缺如歲月茫茫盡成野草問鄰母而失處訪樵童而莫識議者以爲不可復得宜招魂而改葬行休拊心蒼昊誓不徒還乃掃亭館設地席潔齋懇惻覬乎幽報遂頻夜髣髴示其端夢王乘舟舟分爲兩旣而適野見東洲中斷因忽悟焉陰隱徵明率此類也又靈堂鎖塋一夕自屈管上有三指凹迹一奇二並其旁鐵生文理布列成卦衆駭其異使善易者張法善之曰屈者於文爲尸出指者於義爲指縱一奇二並三殯近闕若引渦上揆之可以察先王之心矣考夢協卜定處刻辰以某月二十八日於桂城東洲發見神柩舉體咸備而一節闕焉行休甚痛惋若身自集作毀裂其夜又夢王告在南洛洲厥明直舊殯而南十有九步沙洲痕下掘而得之安合如故他日北郭之外又集無併收二叔父焉於是乎驗善之有徵也子子三旄連軸歸飛遙遙百越經途瞻歎零桂人士以爲美談夫至孝潛通精魄昭應虛無之見推步而有窈冥之體尋求而致雖前誌所詳未有幽感反覆若斯之昭晰矣以某年月日陪葬於昭陵陌城妃汝南周氏祔焉禮也妃考曰駙馬都尉梁郡襄公妣曰臨川大長公主宗周玄胄大君自出左右圖史循環法度邦有好逮室

無

集作非

借老以王之故薨於掖宮永昌之難王下河南獄妃錄司農寺唯

有崔氏女

按唐書崔氏女

屏履布衣往來供饋徒行頽色傷動人倫中外咨嗟

目爲勤孝王之二子配在嵩州及六道使之用刑也長曰行遠以冠就戮

次曰行芳以童當捨芳啼號抱行遠乞代兄命既不見聽固求同盡西南

傷之稱爲死悌

唐書作

君子謂勤孝者仁之厚也死悌者友之難也感神

者誠之至也此三者有以見義陽之義方賢妃之內訓繼體之崇德夫如

是淳美上歸乎本朝盛烈延耀乎邦族安可闕而不飾碑版無文而已哉

銘曰高丘白雲維堯大理函谷紫氣維周柱史百代福流千齡運起當有

海內貴爲天子聖帝才子於穆紀王賢王祚胤倬哉義陽慎徽九德九德

有常允釐三郡三郡以康明夷于飛丹崖之下梁木其壞桂林之野不識

阡陌無存松檟於以求之人莫知者哀哀孝子眷眷靈夢語妙常閤文微

甄仲南洛占從東洲億中舊窆移偏新棺改贈既克返葬亦附山陵卜云

其吉神心允憑人非地是迹謝名稱青松青松柏不顯不承

按唐書紀王是先封申改封紀是

以立嗣子有義陽之封此傳敘述孝悌事蹟足

張君廉善碑

劉志文
廬陵人

前汝寧府信陽州平靖關巡檢張君文抑以丁母憂解印耆老相聞嗟惜

不已乃摭其事略因儒者胡琦假辭於石以著其善君領鎮事首務簡核所部方落爲籍名遏惡至所以禮進鯨老謂之曰汝壯力幾壯而果農或工賈內土無曠外民無來遊者汝當任以譴而以款詞投鎮長鎮長以籍驗爾媿惡惡耳其以法從州人稱其峻厲治遂爲諸鎮最乃計本鎮兵額所耗咎在諸牧影奪陳所司言捕盜責重鎮兵戶各衙獨可規恠乎於是補舊額者不踰數月且不爲勢力搖奪州倅嘗嗾誣誣徒故抑三灣民爲殺其子而實倅欲以賈民數千緡耳民以不酬故羅織成君抗倅辨其誣平反厥辜民得不死其執法尤不以私誦嘗有功服親率惡少夜破人倉廩盡執之情旣得一以故犯例罪之時論以爲公後以歲兩饑流蕩四至而椎蕘以禍土民者皆是鄰治宿有寇馮阻窟穴而與鎮兵接刃君至或發其奸詰治之或以射中生得之羣俘靡然出境而奸黨悉以散落若乃梅黃沿淮白晝之掠市山東等處省府兵之徵會與所追襲同力多服其才略府州每有調度首推舉之至所執獲有因矢中而不實死蓋欲得其情也其與有勳於破紅巾寇者當魂類由歸德至朱皋朝廷兩指揮使寅君右軍使覘賊勢與賊相遠者每不里許旣而賊衆逆敵官軍於王簇岡君先蠻子軍鋒所射殺者藉藉君已被創鼓譟竟進賊衆敗且北指揮問

以破賊計君告以賊盛而輕官軍部曲堅重賊既入羅山城必趨利於信陽金關以北路四出而非險隘鍾山南逼諸山北阻澗河水正泛溢分兵夾擊萬勝策也請併日趨信陽引州兵延援及至則守官竄亡無一人迎犒者君慨然收壯勇敢死者得百人餘亟會指揮軍於鍾山大敗賊衆三虜斬首八萬餘級此其爲君在鎮之大略雖有警捕之嚴弓矢之精戎官常事然其所捕必獲所進必利非其規畫智勇並行不悖寧保無倒逆失乎況王簇岡於鍾山兩以首陳捷固一巡檢部屬耳視古白孝德論惟真料敵制勝於李光弼左右不甚殊詎可以庸常之守關備員者論之也君本以獲寇功補官而略無武人圭芒喜談古今成敗尊禮縉紳士謙抑里閭性尙儉素一布褐數年不更得奉貲竟構衙庭送徒獻囚有公道部民憐之自莅官至憂去以代次未至兩調老少相傳無一荷戈被械過門而爲一餉謁者其賢與否與巡警官至紅羅張鎮君識不識罔不爲君美也嗟乎司牧者何多而胥怨者亦何多一百里鎮長焉而得譽如此昔成周以六計聽官府之治而廉善居其首蓋謂善於其職而得美褒於人夫飾詐以釣名朝興而夕替童子所不顧若乃以堅白篤操尙而始末略無二致不求知於人而人之信之者津津焉面順而口惠若斯人者世無聽

治之計則已苟有公論焉則四善七十二最之考君子必有取者已此余所以重厥請而爲謹書其事且以廉善一義揭諸其首而爲考功課最者所據云

重修城隍廟碑

明楊恂

粵稽古城隍神祀典無之肇名於吳之赤烏二年至唐之後盛廟貌之設吳越創之遠近相襲遂徧海內凡藩臬大夫暨郡邑百執事莅任之初咸恭謁廟下春秋有事厲壇必先期啓神主事蓋今制如此若夫水旱疾疫祈禳報賽罔不趨赴焉則所謂有功於人者事之始建或謂其合於禮之八蜡祭坊與水庸者按禮記正義云坊者所以畜水亦以障水庸者所以受水並以泄水則坊蓋今之隄防水庸蓋今之溝洫也方之城隍於義殊不侔易曰城復於隍城者陴也隍者池也司之者卽土神耳昔人謂既有社不應復有城隍是矣然斯人之生食稻而祭先嗇衣錦而祭先蠶以至門竈中窻一皆致祭則城隍者保民禁奸有功於人尤大雖於社若歧而二之然民心安焉可以不廢後世欲昭其靈異乃取姓名於古之名將偉人以傳訛傳會何耶惟昔豪傑之士生而爲英沒而爲靈其功烈精爽足以血食何至舍其爵里而隱託於他神乎將爲之神者因人而稱號而漫

應之已屬攀附可鄙若曰未入祀典而直據其性醪享獻焉得爲名將偉人乎至於肖像之說則尤大可非者方今聖明在上制禮作樂百度維新孔子大聖尙以塑像亂真毀之至於城隍果何形似而冕旒彰施紳笏端委如此耶竊意聖人之道德高妙固非他道可擬然使人爲善之心則一而已矣今夫頑嚚鄙夫覩白日而嬉聞雷霆而懼者恆也使彼百靈亦毀像去飾則無以耀愚赫俗致其畏仰故宮觀祠宇仍舊貫者固欲因明而通之卽報施之道動遷改之念以成孔子之心耳否則放恣無忌雖有聖教將安措哉信陽爲州在荆楚之交其民尙素約有申伯之風其士敦節義有范滂之操而數長於言語則有子貢之習焉病者後醫而先鬼故祈祀之禮比他郡獨盛其城隍廟在州治之東南丙戌之歲大旱兵使張公翰致禱獲應謁謝廟下顧視傾圮不足揭虔妥靈爰命知州牛君澄修葺之未幾告成鄉耆張恕輩請記其事於石用垂久遠余謂鬼神之理微矣孔子曰微之顯誠之不可揜蓋積誠在人存微在神福善禍淫使咸歸於正者神之事也若不於其處心精誠而惟豐豆碩俎是佑焉則非所望矣

義陽道院鼎建文昌閣並三皇祠碑

明沈孝徵

海鹽人

申有義陽山弔古者訪焉志稱春時花木茂盛爲州人遊賞處余欲追隨

其間冀可徘徊登眺也者而問之則烏有也僅一培塿在耳咨嗟太息以爲事可信於古難以證於今豈獨茲地然何怪乎魯靈光巋然獨存乎亡何彭刺史萬來謂先是黃觀察建文昌閣擬於宮牆右而議未有定奪以中止茲壞堯若作之基矣韓公念劬去申幾二十年復自雲中裹橐中金助之余來不日遂臻厥成諸生儼然造曰是子大夫之澤也是執事者所以永錫於茲山以大休於政吾申土自茲得鼓吹休明以爲人文冠冕以振揚先代盛美意在斯乎申人士何敢讓焉余因進而與之言曰爾諸士得余所與彭侯建祠意乎事不師古鮮克永世申州之有義陽山以存古也古而瓦礫溷穢之可乎以今申人士絃歌比戶文亦甚矣文而不慚菑茲土者怒然有隱心焉則曷若緣人情性制禮作儀使之恭敬奉承鼓舞不倦神道設教儼若著思登高四望委宛嵯峨美矣富矣得門而入矣或有當於建茲祠者乎三皇之殿亦茲意蓋成物祖也不然而以象求戴匡六星顯然可據明一者皇又見於管子至如茲閣之在學宮則爲巽方卽以形家言磊珂崑嵬映澗水環震雷多士又以昂藏不馭之氣振其朝霞晞翼之才何患不振揚先哲盛美於永永無極哉於是諸士躍然爲之詠斯干如跂斯翼如矢斯棘茲閣亦何忝焉則又衍之曰乃生男子載弄之

璋禱三皇者恍焉先得之乎余復爲之歌械樸薪之類之左右趣之奉璋峨峨髦士攸宜是余所敬告多士與多士所以自厚期者如是而已

創建申伯祠碑

明李顯樂清人

嘉靖己亥新秋既望余弟燕掌申陽邦教介書於余曰申守任子直夫爲聖天子殿是邦淑已軌物維申伯是憲民殖其惠如沃霖霖遐邇罔弗暨乃慨然曰申之所以爲申豈不以周宣王紹封申伯故耶善政嘉猷奠我王國立我蒸民佑啓我後人厥功懋矣樹祠茲祀庶遊覽土著大夫士庶咸有所瞻仰卽命工度地構宇城北隅屏以重門繚以周垣甃以甌甃面陽建成喜堂堂後建棲神所迤右建三秀軒祠陰有隙地畝許建環翠亭繁花雜卉虬檜癭松迺幹凌雲清陰蔽日工竣屬弟燕徵文於余余嘗副湖泉直夫振鐸潛校與余有一日雅茲余弟燕辱通家好余雖不能稔知君而聞之弟燕甚悉猗歟美哉斯祠之建也申伯爲周勳戚顯諸侯宣王所以尊禮倚重者綦篤登是南邦世執其功惟茲豫楚之交山川縈抱疆場綺紛爲北郡冠固非天王元舅不足以建邦啓土亦非嚴祠血食萬億斯年不足以答文武惠直之勳也今直夫以伯之所以治申者治申因以申之所以有申者祠伯惟伯有祠而儉素淳篤申伯之遺風曠千百年而

若新司世風者登對俎豆穆然深思藹然步趨時時均節而鼓嚶焉路車乘馬爲憲萬邦卽謂今申伯可也余旣嘉直夫秩祀允協典禮敢申鄙臆以勗後之君子

創立共濟莊碑

明朱一馮秦興人州守

我明令甲寓內郡若邑各收遺老遺孤聚廬而居計口而食院名養濟所從來矣顧歲計穀有限而仰食者不可以逆睹其所全活亦止歷籍若干人耳固不能有所振施出於歷籍之外也矧環汝列城如吳房柏舉平疇修曠歲多水患申黃弦蓼浮靡寡永圖姑無論寡人子卽中人之產數口之家居恆持梁刺齒肥一旦亡年饗餐不能具此離捐瘠不能免中原自午未以來淫潦爲沴老稚析骸而饑壯者強扶而南或僵於路或剽於市當事者乃始議蠲振議勸分抑已晚矣羊亡而牢補兔逸而鷹顧亦何益哉西蜀黃公己亥持憲莅宛庚子移莅申旣習知汝南風土又微知豪俠主名民病所由或置於理或黥爲城旦一懲而百警市魁斂跡善良帖席矣而禮耆碩獎廉茂勸農桑民無失職家有蓋藏德澤滲漉途歌巷誦又人人祝公福壽多男子焉乃公心尤無窮也以爲惇獨鰥寡王政所先誰司牧民而忍令無告若是思昔保衡一夫不與被堯舜之澤恥同內溝吾

境內固素沃拊循然艱食詎止一夫於是卽令甲而推廣之捐五十金屬馮易地爲信陽共濟莊他郡邑稱是馮惟收養遺老遺孤實有司責而公董其事公抱伊尹恥又虞吾屬不克盡其責以負牧芻慨然捐俸業貧民吾屬敢不祇承德意以遠吾戾因捐下吏俸三十四金佐之市新色寺趙莊田三百八十畝歲入七十三石於上結廬三十楹至若賦入賦出務使貧民霑惠而狡黠者無所侵牟冒濫其中則遵典守時考覈在吾屬有司勉之矣夫使庶民安田里而無歎息愁恨之心繫守令是寄而守令又未必得賢國家乃特設監大夫之重以臨之藩主撫臬主糾撫用恩糾用威公以臬而兼藩刑糾而德撫姦頑式化屏襄蒙生籍養濟院者旣奉令甲以活之令甲之所不及又有共濟莊在且也巡行菑地痲痺子遺亟命所在酌遠近約衆寡爲糜以餽餓者四遠流移又人給錢穀資其復業汝淮千里頓轉凶年爲樂歲恩威著矣嗣是而開府秉軸將全省天下咸受公明賜雖以方商保衡豈少遜焉語有之活千人者後必有封卽此事有司善舉行之且儀而象之其所全活寧但千萬人已哉公之後裔旣熾而昌如陟之繼尹可必也馮茲勒石非徒以識事始將諗來者庶公德澤垂之永永無斁云

重修信陽州儒學文廟碑

清薛所蘊

今夫事之興廢盛衰豈不以人哉從來國家以武功創必以文教守信陽昔稱文獻邦自申伯錫茅而後以道德節義事功古文辭表見史册者代不乏人卽科目之鵲起踵接亦甲越兩河乃十餘年來不無少衰息者豈賢山澗水之靈時鬱時通乎抑亦學校之教湮而振興之力寡耶州城乾良之地舊立爨宮創自明初屢圯屢修遞有增設迨其末曆辛巳罹流寇之變咸歸一炬矣有守備董者署郡事因廢址構大成廟三楹以奉俎豆意甚盛也第庫隘不及前制之十三順治四年丁亥幸遇我公祖陳公備兵茲土初釋奠臨其地卽戚戚欲新之奈兵火之餘物料踊貴時絀未可舉贏也迨我公以冰蘖之操弘屏藩之治不期年而政成俗阜爰進學博諸生而謀之曰予之興賢育才砥礪多士者不遺餘力矣然使先聖羣賢夔越於蔓草瓦礫之中舍采合舞無以嚴其跛倚慢易之氣而生其駿奔儼恪之誠則入廟而忘敬又何以望其尸居而知敬卽吾玉汝之心何以克抵於成乎務有當急其勿憚勞費爰自括俸金貳百餘兩下逮僚幕諸生捐貲各有差比材鳩工撤舊楹而廣之庚寅冬十月首事越百日落成棟宇嵯峨輪奐聳峙入者如見衣服禮器然丹堊未施公旋中中山之謗

坐是棄置莫問者又一載既我公祖觀察管公郡大夫高公棧申清正之守經緯之美與我公有合德焉甲午春慨然肯堂構而墜茨之又得宋王兩廣文拮据相成重構明倫堂三楹公復獨金施大木百株濟之論者以爲非常之功必有非常之人以繼其志蓋天之作合不偶也諸生感前後舉事之盛成功之艱以予夙隸史館徵數語貞之石爲公誌不朽然公於十四城及南宛膠序咸有錫賫區區一申又未足以盡公德造之萬一云公諱聯璧號孚尹楚襄之光化人

淮水考

附節水節錄水經併註九

任弘業

山陰人

淮水出南陽平氏縣胎簪山東北過桐柏山

山海經曰淮出餘山在朝陽東義鄉西尙書導淮自桐柏風俗通曰南陽平氏縣桐柏大復山在東南淮水所出也淮均也釋名曰淮韋也韋統揚州北界東至於海也爾雅曰淮水與醴水同源俱導西流爲醴東流爲淮自潛流地下三十許里東出桐柏之大復山南謂之陽口水南卽復陽縣也在桐柏大復山之陽故曰復陽山南有淮源廟

又東經義陽縣

縣南對固城山山有水注流數丈洪濤灌山遂成巨井謂之石泉水北

流注入淮

又東經義陽縣故城南

義陽郡治也晉太始中割南陽東鄙之安昌平林平氏義陽四縣置義

陽郡於安昌城

安昌城在州西七十里

東過江夏平春縣北

又東油水注之

油水今作游水

水出縣西南油谿東北流經平春縣故城南淮水又東曲岸北有一土

穴徑尺泉流下注沿流三丈入於油水亂流南屈又東北注於淮水又

東北經城陽故城南

護志有城陽縣郡

魏城陽郡治

又東北與大木水合

水西出大木山山即晉車騎將軍祖逖自陳留將家避亂所居也其水

東經城陽縣北而東入於淮

大木水今作天木水又作天目即明港水也

又東北流左會湖水

傍川西南出窮溪得其源也

又東經安陽縣故城南

江國也今其地有江亭漢乃縣之

故城在正陽縣東與光息接界

又東得澗口水

澗水源出大潰山東北流翼帶三川亂流北注有九渡水入之水出雞翅山礮間濼委沿遡九渡矣其猶零陽之九渡水故亦謂之爲九渡焉於溪之東山有一水發自山椒下數丈素湍直注頽波秀壑可數百丈望之若霏幅練矣下注九渡水入於澗澗水又北經賢首山西又北出東南屈經仁順城南故義陽郡治分南陽置也州今信陽城本治在石城山

因梁希侵逼徙治此城齊司州刺史馬仙琕不守魏置郢州也澗水東南流歷金山北山無樹木峻峭層峙澗水又東經義陽城北城在山上因倚陵嶺周迴二里是郡昔所治舊城城南一十五步對門有大井周一百餘步深一丈又東經鍾武故城南本江夏之屬縣也又東經石城山北山甚高峻史記曰魏攻冥阬按呂氏春秋九塞其一也澗水經鄖

縣故城南

澗水經鍾山縣也

又東經七井岡南又東北注於淮

接金山在水南六十里順流該山相距石城在水

淮水又東經新息縣南此係淮水上源

按地理沿革惟名山大川歷久不改今循水經並酈註所載淮水澗水西自發源東出州境節錄一段凡經由故蹟今猶仍其名者有所考焉

申國考

任弘業

申侯爵姜姓神農之後其先祖爲堯時四嶽總領方嶽諸侯而奉嶽神之

祭能修其職詩箋云四嶽卿士之官掌四時者也外王朝之職如周之事在

卿外掌諸侯之牧伯之虞夏之際子孫受封有呂甫一作甫有申有齊有許是歷虞夏

商而世有國土也申之疆域在冥阨之北淮水之南實始封於此至周宣

王時申侯爲王之元舅以賢入爲周卿士佐王有功王又欲使繼其故諸

侯之事命召伯往作邑於謝以統理南方之國故有申伯之稱焉申本國

近謝謝在南陽宛邑之南謝伯爵黃帝後周滅之以封申伯其地有謝水

城周邈側水詩所謂申伯番既入於謝宛故有呂國與申同姓申呂方

者也漢爲棘陽縣今故城在鄧州東南境宛故有呂國與申同姓申呂方

強藉以翰周禦楚終申伯之世楚不敢橫宣王之子幽王初娶於申爲申

后及嬖褒姒愛伯服遂廢申后及太子宜臼宜臼出奔申城今州宜臼所居子

也幽王欲殺宜臼求之於申申侯弗與王伐之申侯與緡人召西夷犬戎

攻王戎弑王於驪山下諸侯乃卽申侯共立太子宜臼是爲平王時楚以

幽王被弑責申之罪伐申侵甫及許平王遣畿內之民戍之周人爲之賦

揚之水申培詩說云荆子討申伯弑幽王之罪伐申侵甫及許王遣兵戍

州之也許楚僻處南服窺伺中夏必由申呂以至於葉倚方城爲固焉楚文王

伐申取申呂以為縣申即謝也是時申已亡其加邑矣

按左傳楚重圍宋取

於申以爲田共王許之申公巫臣曰不可此申呂乃止又為傳邑稱城是以

申之戰楚子非始居於申按此則退保於申至楚靈王取許沈胡道房申以遷

於荆申之始封至此始失楚平王嗣位各復其國左傳楚滅蔡也靈王

城平王即位既封陳蔡而皆復之禮也按此則申與沈道房三國疆

不自保仍為楚所滅此申國之始末也

按申以始封為申謝亦稱申從其國也而始封之申不應有謝城今舊

志古蹟有謝城在州西北六十里羅山志又有謝城在縣西北三十里

豈申既亡謝之遺民有相隨於申而築城以居之抑兩處均有古城

遺址後人各名為謝以附會之乎詩經集註朱子於崧高之謝稱在鄧

州南陽縣此其是也於黍苗之謝則稱在鄧州信陽軍按信陽軍不屬

鄧州此尚沿舊註之誤而州志云申先封於宛改封於信陽以強合之

洵如所言是召公既營南陽之謝又營信陽之謝是兩役也於古不有

悖耶謹備考申國始末而楚文取申為加封之謝楚靈遷申為始封之

申兩引作證則信陽之無謝邑可見而州志舊說為緣飾矣

楚文取申在魯莊公

一六年楚靈遷申在魯昭公十

賢首山考

任弘業

賢首山又名賢隙山史稱北魏攻義陽蕭衍據賢首山以救之卽此是賢首之名由來已久舊志云相傳前代有賢人隱此而不著其人昔漢章帝時詔議貢舉韋彪上議有曰夫國以簡賢爲務賢以孝行爲首山名賢首義取諸此又曰賢隱是必有初應孝廉之舉而復隱於斯山者其人不容泯沒也漢自章帝以後選舉甚盛而汝南郡周磐其一焉磐安成人漢志安成有武城亭今州境東北有武城實符其名是爲接壤磐初舉孝廉和帝時棄官奉母居喪廬於塚側以有道特徵不應意此山乃周磐棲隱之所後人思之旣名賢首以表其孝又名賢隱以志其高揆之時地合之史册信而可徵矣今採其傳入人物使來者有所景仰云爾

重修信陽州志敘

乾隆十四年

任弘業

州以信陽名自宋之信陽軍始信同申故舊誌曰卽申陽也申爲四岳之裔國於鄴阨之北淮水之南歷虞夏商以至於周季而後亡周宣王時申侯以賢人爲卿士佐王有功加封於謝以式南國謂之曰申伯蓋古方伯之義也再世而謝入於楚獨始封之申多歷年所豈非三關之隘號稱天險國小而倚以爲固又以申伯之厚德政化漸摩澤民深而貽謀遠非他

國所可及者乎今之爲誌者條分類析大略相同序誌者亦以紀先後纂
葺之勤而外此無可傳述以爲來者告顧予於斯誌竊有感焉蓋國有與
立惟地與人得地則疆圻可守得人則司牧有資史表三關之雄詩著申
伯之美亦旣信而有徵已伏念國家聲教自北而南鄆阨諸關居楚豫之
交允宜屬豫以控楚而沿前朝之舊與楚之應山縣畫關爲界且關門啓
閉委諸應山焉雖王者大一統之義未肯輕爲改制然因其事之所起相
其時之所宜神而明之存乎其人魏書有云地有常險守無常勢斯言足
以蔽之矣至於司牧之道今古同揆吉甫之誦曰申伯之德柔惠且直揉
此萬邦聞於四國則當日之所以治申者概可知已民氣多悍馴之以柔
民力多疲恤之以惠民情多虞詐示之以直柔以易俗惠以遂生直以復
性三者舉而王道備矣揉萬邦聞四國推而行之無不準況區區一申乎
履常則法古以宜今應變則捍外以衛內三復斯編其奉以爲此邦之治
典可也余不敏奉命觀察豫南信牧張公爲庚戌同年友取前志而增修
之於其成也不揣固陋綴以一言未審來者以爲何如而張見之獨欣賞
不置申伯之風亦復去人何遠哉

重修信陽州志序

郡邑之有志乘猶王國之有史書所以褒德錄賢發潛據幽獎風俗興教化備輶軒之採者也顧史之修或在數百年以後而志則宜隨時紀載蓋史以事繫人朝廷數大政承宣有職簪筆有官典至重也故事傳而人亦與俱傳若志則因人繫事窮檐慕義何關廟謨深閨矢節寧望旌揚膠庠無篤古之彥鄉黨鮮月旦之評當其時猶相與嗟歎迨人往風微而其事亦因之盡泯善行頽廢風俗不隆職此之故予故謂志之宜修較史尤亟亟也雖然有難焉者貪多務富去取不嚴則失之濫輕聽妄信考核不精則失之誣養尊處優憚勤延訪又掛一而漏萬矣自非高才博學留心民隱欲其纂言載筆勒一代之成書也知其有所不能信陽爲古申伯國當豫楚之門戶層巒疊抱瀨水環繞其間英傑挺生忠義奮起人物熙豐宛然一大都會也從前豈無志乘然世代相沿兵燹屢遇收拾於煨燼者不過什一之於千百耳順治十七年前牧賈君創爲權輿迨康熙庚午陳君繼修其中輿地沿革河源出沒頗多錯訛要亦因陋就簡未可指爲一代之成書也矧去今五十餘年風氣日開制度凡幾更定生聚教養凡幾於變山川繡錯犬牙相維凡幾斟酌殆未可更僕數矣夫人一身之所閱歷往往板橋茅屋楊柳烟村五十年以前之所有再往過之或失踪跡也

高臺曲池青雀黃龍五十年以前之所無今往過之居然鬧市矣則夫通都大邑之內上下五十年間紛紜變置寢傳寢失湮沒而不彰者可勝道哉假而不急爲之搜輯將更歷數年或數十年老成益謝文獻無徵是使一州之人風物產節義文章都歸風雨而泯泯莽莽以至於盡也山靈且笑人矣伊誰之責哉州守張君篤學好古到任未及兩載卽取前志而續修之舉凡疆域變遷淮瀨源流前志所訛皆與大副憲任公博考羣書悉爲校正食貨典禮因時制宜前志之所未備盡爲增入至選舉人物零落凋殘於五十餘年之間者則取州孝廉萬君彙集底本藉爲梗概而時與州之縉紳學士廣搜博訪發凡起例別類分門經寒暑而書乃成因以問序於予予不禁因之有感矣士人讀書萬卷自矜博洽欲爲當代偉人及一旦出宰方州馳情曠達一切興廉舉孝礪俗維風之政度外置之此謝靈運畢卓諸君子輩之所以見譏於時也又或虛名純盜諛託非人聲氣相通者登諸錦帙單寒無告者遺其褒揚曾稗官野史之不若尙可以激濁揚清信今而傳後也乎今觀是編華實並茂繁簡俱宜真可謂不濫不誣不漏喬喬乎一代之典章亘千秋而不朽者也他日輶軒命使問民風訪故老求里中軼事以爲修明國史之補請卽持是書以獻也可

重修信陽州志序

清馮原

域中有四大史居其一志也者與史相表裏者也二十一家以後至有明而制綦詳通志以下有郡志郡志以下有州縣志經經緯緯詳略辨焉蓋以土著之人言土著之事耳目皆親善敗自切所謂觀指羅而數家珍不患不悉由郡而省以是爲斷而尙慮不足爲信史乎哉申國近楚爲兩河之衝其因革利害種種關於全豫不小舊志創於勝朝神廟時宗伯何公洛文大參劉公尙朴寔成之至康熙十六年州守賈公待旌與邑劉君蓀芳等重輯之踵事增華亦旣斐然眉列矣自是以來又且六十餘年幸際聖朝景運之隆規制日益備風物日益盛其典例之增置人文之興起嘉言善行之旌賞累積烏容聽其烟微雲散也哉歲在庚申余以非材膺斯民社之寄下車以後慶際昇平嘉與士民鼓舞於弦歌耕鑿之餘思欲一爲補緝以接前軌之清塵而方伯趙公檄適下乃亟爲之設局儲材屬邑之名孝廉萬君侯等或稽之則例或諮之老成或按之家乘或參之輿論其考核也務精其討論也務詳其澄清登進也務嚴而公幾閱月體粗具猶恐耳目未徧遐僻或遺囑諸生寧爲鄒遲勿爲枚速也未幾而余已解組矣稿未獲上欣逢觀察任公學搜二酉才具三長爲之總裁而清苑

張君繼蒞茲土向之自慚無文者乃更居藻采壁壘一新非復灞上棘門之舊幾於宗伯之得大參矣抑余思志之累須於修也豈僅爲學士期淹博方輿飾觀瞻耶蓋星紀山川都鄙雖不易而法制之更置戶口之蕃息文物聲華之乘除則與時俱易者苟勿爲之增所必增續所必續將良法易湮芳型莫闢奚以示來茲昭法守而資勸誡與今幸克觀厥成則疆里正而豪右之窺伺息徵發清而奸猾之乾沒除名宦鄉賢舉而士大夫之禮義以興忠孝節義具列文事武備均修而自閨門以及邦國之風化以振至於考災祥以徵人事著利弊以善機宜賞奇析疑之不苟魯魚亥豕之必嚴皆於是備庶由郡志省志以上諸太史稍資金馬石渠之採擇因以黼黻皇猷鳴我累聖休明之邗治俾麟炳於千禩也豈不盛哉豈不盛哉

續修信陽州志序

清張鉞

申陽名郡也肇自何代封自何人星分何宿疆隸何屬按圖而考了如燃犀古人之餉我厚矣哉雖然天地之化往過來續譬之渴虹飲水霜隼搏天瞥然一見轉眼滅沒隙駒轉轡千古直瞬息間耳古人不得已筆之簡牘以遺後人非敢與天地爭也昔先王輯訓典而國無奸民蓋鑑懸則不

敢欺以妍媸繩陳則不能枉以曲直先民有言國史邑乘暗室一燈後之視今與今之視昔將無同耶州治地不數圻物產貢賦猶得比於古之小諸侯況道當子午衝三楚咽喉亦全豫門戶陸有車馬水有帆檣貨聚人稠聲氣四達洋洋乎南州一大都會也他如右枕賢首背帶長淮瀕水橫亘於南龜山雄峙於東淑靈和清之氣孕育磅礴鍾之人物必有月異而歲不同者芳規高躅猶在人間不思收而輯之以示來許聽其與洛陽銅駝同漸滅乎荒烟蔓草之中亦邑大夫之恥哉古者三十年爲一世文章制度或不能無小過不及之差積漸之勢然也州志輯於前牧賈君越三十年再續於陳君迄今又五十年矣其間科名宦績古誼貞微仙靈儒釋之奇踪騷人逸客之高詠分類增輯梓成一書可以表典型可以拯廢墜洵不朽之盛事也余於丁卯年來牧茲土他務未遑卽訪諸於掌故者若而人取州志而續修之聞前牧馮公會延孝廉萬君同諸生彙成數帖因收爲藍本復相與披金於沙礫採蘭於蒺藜損之益之刪之補之閱一歲而脫稿若夫上下千百年考疆域之沿革搜河道之源流批金根之誤辨豕亥之疑我觀察任憲實總其成於是乎百里疆索在掌握中矣蘇子曰自其變者而觀之天地曾不能以一瞬然則五十年已在風馳電掣轉眼

滅沒之中暗室一燈耑賴茲編之存也運會方隆治理日上後之來者周
諮美蹟相時而續修之以爲此邦載藉之光是則予之所厚望也夫謹序
以上文類

崧高

周尹吉甫

崧高維嶽峻極于天維嶽降神生甫及申維申及甫維周之翰四國于蕃
四方于宣齊賡申伯王纘之事于邑于謝南國是式王命召伯定申伯之
宅登是南邦世執其功王命申伯式是南邦因是謝人以作爾庸王命召
伯徹申伯土田王命傅御遷其私人申伯之功召伯是營有俶其城寢廟
旣成旣成藐藐王錫申伯四牡騶駒膺濯濯王遣申伯路車乘馬我圖
爾居莫如南土錫爾介圭以作爾寶往近王舅南土是保申伯信邁王餞
于郟申伯還南謝于誠歸王命召伯徹申伯土疆以峙其糗式邁其行申
伯番番旣入于謝徒御嘽嘽周邦咸喜戎有良翰不顯申伯王之元舅文
武是憲申伯之德柔惠且直揉此萬邦聞於四國吉甫作詩其詩孔碩其
風肆好以贈申伯

黍苗

小雅

芄芄黍苗陰兩膏之悠悠南行召伯勞之我任我輦我車我牛我行旣集

蓋云歸哉我徒我御我師我旅我行卽集蓋云歸處蕭肅謝功召伯營之
烈烈征師召伯成之原隰旣平泉流旣清召伯有成王心則寧

揚之水

戍士

揚之水不流束薪彼其之子不與我戍申懷哉懷哉曷月予還歸哉揚之
水不流束楚彼其之子不與我戍甫懷哉懷哉曷月予還歸哉揚之水不
流束蒲彼其之子不與我戍許懷哉懷哉曷月予懷歸哉

遊賢首山

梁蔡道恭
南陽人

同來欣夙昔結駟快茲遊木落川原淨鳥鳴烟霧收狂尋危處上倦向興
中休爲解登山理穿雲望故丘
落落垂衫袖脩脩著羽翰初當半嶺坐兼得衆峯看幽闌陰常暝龍蔥氣
不寒更窮巢鶴處只恐下來難

賢首山

梁鼓吹曲辭晉武帝破
魏軍於司部肇王迹也

沈約
吳興人

賢首山險而峻乘峴岫臨胡陣騁奇謨奮卒徒斷白馬塞飛狐噓日逐殲
骨都刃谷蠡馘林胡草旣潤原亦塗輪無返幕有烏掃殘孽震戎逋揚凱
奏展歡醮詠杜旋京吳

使還至菱陂驛渡潞水作

唐劉長卿
河間人

清川已再涉疲馬共西還何事行人倦終年流水間孤烟飛廣澤一鳥向
空山愁入雲峯裏蒼茫閉古關

過申州傷經陷沒

劉長卿

舉目傷蕪沒何年此戰爭歸人失舊里老將守孤城廢戍山烟出荒田野
火行獨憐澗水上時亂亦能清

過申州

戴叔倫

潤州人
刺史

萬人曾戰死幾處見休兵井邑初安堵兒童未長成涼風吹古木野火入
殘營牢落千餘里山空水復清

駐紫霞觀

方

干

新定人

易覺春光老難消夏晝長問囚傷道氣嚼句療饑腸殿古苔痕灑壇高松
檜涼黃冠誰可語試與辯亡羊

環碧堂

宋畢公信

方塘納霽景一碧共晴寒微波坐來息人意亦平寬

環翠堂

畢公信

羣山關設險高屋照多陰晴嵐度丘壑疏翠上衣襟

赴闕過申州經石子鎮驛即白雪驛

鄭文寶

中化人
殿丞

得罪前朝出粉閨五原功業有誰知年餘放逐無人識白雪關頭一望時

義陽元夜

明太祖

義陽城裏值元宵水色梅香共寂寥不似上年燈火邸玉人歌舞過柴橋

宿慈氏寺有懷

明薛

瑄

河津人

山寺月皎皎流光入簾帷神清不成寐起視夜何其天漢漸回轉北斗亦西移庭草滋繁露林竹生涼颺撫景念良友渺在天一涯冉冉易寒暑悠悠隔山陂豈無他人好中情詎能知所願得歡晤以慰平生思

祀岳忠武鄂王樂章

楊恂

炎光中滅坤輿頽豺豕獗爭喧颺神州赤縣飛黃埃狂風拂拂從東來六龍潛伏錢塘隈掃清誰是匡時才天遣神人蕩九垓長身玉立貌虎材寶刀白馬揮烟霾驅斬羣寇同草楷節制如山不可摧敵人喘恐蹲且駭中原恢復事已諧誓欲直持黃龍堆旄頭未落熒惑催鑠金銷骨堅莫摧長城自棄胡爲哉怒髮衝冠氣奔雷上干白日星斗開丹青照耀空雲臺綺也杜門世忠猜英雄相顧如死灰延秋夜夜烏聲哀甘心左袒疇爲魁遊魂壯志橫天涯化爲厲鬼猶徘徊至今慄慄行江淮下與濁世鋤蒿萊由來播亂良有媒讒臣蔽國成禍胎忠良喪氣孰敢哈旌善罰惡神素懷

願言秉正誅奸回調和元氣歸化裁朱干析羽陳兩階兆祥介福消凶災
神功赫奕何崔嵬

中州贈何子

李夢陽

大梁人
學憲

翩翩雙黃鵠凌風各將去哀鳴歧路側一步一回顧何異同心子失散在
中路別君倏五載我髮忽已素今逢不須臾趨駕一何遽臨分但踟躕道
語不及故山川何悠悠白日奄欲暮努力愛玉體慰我長思慕

懷戴進士仲鵬

李夢陽

南州實才窟小戴亦橫鶩探銀乃叨竊對孔豈在屢左右佩采齊追趨信
陽步傾誠在夙昔贈我陸機賦

懷馬進士君卿

李夢陽

君卿素所欽密意宛相向醉酒似馬周讀書薄劉向時人固不識古志益
骯髒試覩同遊子碑礪盡英行

懷行人孟望之

李夢陽

孟生瑚璉器英邁徵古篇登秦夙所望望洋豈徒然欽趨瞠顏後抗志恥
盧先吾方抱任釣倘借襄陽編

答何大復

薛蕙

宵歡不繼晨朝遊豈延夕款念未云周勞心彌已積篤好追昔悰興言撫
今戚纏綿金玉音參差翰墨蹟開帙虛靈閣臨觴望瑤席惠思何來章襄
裳奉良覲

贈孟望之

薛蕙

迢迢東流水悠悠遠行子送子出邁時離別自今始山川一間之相望日
千里徘徊蹊路側思心從中起人生百年內聚散誰能止壯年豈再得良
時不可俟念我平生歡眷眷未云已

賦得何仲默

李攀龍濟南人

仲默自天秀弱齡負遐矚十六遊京邑藝苑策高足揮毫坐華觀懷人理
清曲歸來放情志日晏從所欲結好玩遺芳明德以相勗古道諒寡諧遂
令傷局促

咏王胤昌

王世貞太倉人

野篁蕭瑟徑苔荒異代猶傳姓氏香儕侶應求嚴黜陟奸邪消長決行藏
紫毫揮去才如海白簡飛來筆有霜台輔未登身早沒常留光燄在文章

宿青石橋

何遜

花外山連屋林間水繞門楚天春雨後家在武陵源

信陽道中卽事

袁宗道

巖巖繞眇眇小徑通車馬卽此是桃源問津何爲者
四顧忽無徑僕夫何所往俄聞車馬喧疑在空中響
山下無人蹤山上無鳥語惟餘一片雲見我來遊此
雲中忽吠鳴豈是劉安宅近看爨烟青人家枕山脊

普濟寺同孟望之賦

唐順之

武進人
中丞

宛轉靈峯合微茫鳥路通閑來竹林下醉臥石房中
陰澗泉先凍陽崖蕊尙紅攀蘿探虎穴憩石俯蛟宮
上客思留帶山僧不避驄夜深清嘯發流響入寒空

同丘長孺王思延登賢隱寺

黃燁

南充人
監司

清鑲饒寬暇欣同楚客遊蓮花人面起荇葉羽卮浮
野屐麕麕亂嵐雲蒨荔愁追憐燕市月何似首山愁
苔洞捫蘿入茶烟繞澗流泉瑩霞彩徹松密鳥聲幽
梵語連空靜潭光落照留嘉賓邀藻翰永夜錯觥籌
代想蕭梁壘詩傳沈隱侯吟壇紛白雪逸興在滄州
爭席看村父觀風問喘牛藍輿淹未返爲復戀王猷

遊賢山寺

張昞

久聞賢隱寺今日喜能遊山聳千峯秀溪蟠九曲流鳥鳴蘿樹暗僧定竹房幽坐久塵機息涼風兩袖浮

阻雨明港寄何仲默

李夢陽

白日雲猶動青山雨忽來計程今夜會策馬出村回月對荆門上天從夢澤開旅燈依港宿吟苦獨徘徊

宿淮上寄仲默

王廷相

鐵封人
大司馬

旅泊清淮夜扁舟怯獨行風鐘半淪滅水月共微明放逐甘吾道棲遲念友生高歌視雄劍不覺壯心驚

同孟望之遊龍泉寺

唐順之

寶地風塵絕琳宮日月偏雁來還繞塔龍去尙留泉戶裏天花落空中梵樂傳遠師休禁酒客醉欲逃禪

宿慈氏寺

張九方

錫山人
司理

好山行盡日攜被宿僧房虛牖籠雲影疏簾透月光天寒雞唱早日短馬蹄忙愁別高僧去塵埃徧下方

申陽山行

何遜

德安人
郎

昔別三關雪今歸四月花山春餘谷鳥野色入人家溪滿巖陰直林盤澗

道斜雲霞得棲息此意浩無涯

過淮懷何啓圖宗伯

朱碩勳

爽氣秋山肅風烟黯不迷隔雲淮水北阻兩穆陵西地窄容旋馬關開不
假難登臨望賢首還待侍郎攜

遊釣魚臺

趙南星

高邑人

兩後水增波蘭舟入芰荷鷗隨漁子渡笛雜榜人歌巨石中流見青林夾
岸過看山情朱已忽覺暮雲多

雙井

胡如暘

鄆州人

擊破雲根兩竅齊寒漿河河淨無泥千尋並浸天光迴一色平分月影低
素練銀瓶爭上下石闌荒蕪隔東西道邊好種梧桐樹照見雙鸞枝上棲
讀何仲默集有感因贈其甥李將軍

王世貞

舍人罷視西京草寂寞荒城付野蒿海上空憐腰喪骨人間尙有鳳凰毛
河盤砥柱千流轉天入中原二曜高聞道將軍成宅相不妨詩卷付弓橐
賀何公兄弟翰林

王世貞

胎簪峯色轉嵯峨桐柏雙流逼絳河學士班中鴻序近舍人池上鳳毛多
追鋒次第穿花萼下直翩聯響玉珂聞道相麻饒潤筆弟裁兄草定如何

淮川道中望投宿處

孫永思

蒲州人

平沙古道促華轡別思茫茫滿去流楚塞望迷晴樹闊秦山心折暮雲稠
百年白髮身猶客四月黃花麥欲秋落日淮川問孤館寂寥烟火隔芳洲

謁子貢祠和侍御孫公

孫渭

涇州人

近郭松篁翠作圍昔賢祠屋儼依依一春草徑鶯相和四月山城花不飛
弭節偶陪旌從入褰衣重挹俎筵輝因懷闕里宮牆地仰止當年思欲微

龍泉寺對雨

唐順之

西山爽氣朝來歇倏忽元陰滿四陲雲裏樓臺翻借色雨中花樹更多姿
飛虹弄影搖丹嶂瀑水分流射綠池坐覺禪宮倍幽寂凭闌把酒最相宜

閏三月遊賢首山題寺壁同李大夫

田藝蘅

隰州人

西園飛蓋出層塵爲試風雲繡袷新領略烟霞原有主經綸天地更何人
聞樵堪洗頻年冑把酒難酬再閏春月上萬松車馬散桃源歸去欲迷津

君子亭賞荷花

田藝蘅

里無松竹憐君子隰有荷花是美人翼翼孤亭驅暑淨娟娟萬木倚涼新
淩波月出天連水捉麈香生語絕塵太華峯頭仙種在製衣何必問靈均

和田子藝前韻

李元齡

華州人

爲耽佳興邀仙侶助飲風流愧主人翠蓋乍傾因雨重紅衣初試出波新
池涵月影雲同溼座入花香夜不塵爲問西施何處采賞心莫計酒成均

晚過申伯臺

卽立善碑處

王士性

天臺人

天南地北此孤原淮水千秋古碣存遠樹烟霞迷晚翠近城燈火接黃昏
桐花半落風前路燕子雙歸兩後村悵望崧高何處是幾回芳草憶王孫

遊賢山寺

王士性

步入虛堂翠欲微松濤萬壑撼巖扉平蕪過雨新如沐絕巘孤雲去若飛
稚子扳蘿攜酒至山僧戴月荷鋤歸陶然一醉知何往天地吾廬此息機

咸喜堂懷古

沈孝徵

孤城一帶擁雲屯萬木參差古徑昏山合亂流空翠繞路當煩暑溼蒸渾
魚書迢遞傳兵禁鳥道倭遲入劍門憶自周邦咸喜後千年日月照王孫

題布政司行臺

洪翼聖

歙縣人

性僻飄飄水上鳧清平不厭半鍰無民窮何日回春色客到無能佐僕夫
自愧野人疏沼藻歡逢仙侶挹冰壺蕭蕭車馬山城度紫氣飛來豁我愚

何大復春兩草堂卷

黃似華

內江人

何季文名舊雁行信陽今幸漱餘芳簡編常似春華麗遺構猶疑夜兩香

牛耳誰盟廢白雪鳳毛幾世重青箱饒知仲子能繩武翰墨淋漓襲錦囊

前題

李本固汝陽人

當年詞伯早登壇遺構巋然入畫看的爍青藜天不夜陰森綠樹晝常寒
風清四壁堆圖史雨落千峯長蕙蘭餘韻於今歸仲子雲霄萬里見鵬搏

遊鐵佛寺

楊漣應山人

何年鐵冶范金仙勝占靈峯地最偏徑入深林迷宛轉庭撐古柏拂雲烟
談經案近巖巔月煑茗鑪澆廚壁泉藜杖看山時憩此翛然疑到小壺天

遊賢隱寺

李胤華汝陽人

沿溪十里入烟蘿遠見招提擁翠螺苔色正宜新霽後松風偏向晚涼多
拂琴嬾作清商曲把酒聊爲白石歌欲別山靈仍致問風塵何日許重過

弔蔡烈婦

朱家法

匪石真同操司風藉有光兩髦心靡慝千載骨猶香早及黃泉見應流青
史芳平生崇節意爲爾一霑裳

經何大復先生故宅

吳晉

當代論詩伯崆峒與信陽我來百戰後城倚亂山旁耆舊悲搖落兒孫問
渺茫荆榛滿塗巷廢宅近宮牆

何大復先生祠堂

傅鶴祥

汝陽人

赤幟當年樹信陽每從遺墨思津梁千秋著作兼班馬一代文章駕漢唐
巖壑猶含靈秀氣泉源未竟蕊珠光蒼松鬱鬱參雲際仰止賢山草木香

任滿謁城隍神

胡壽安

鄆州守縣人

一官來此幾經春不愧蒼天不負民神道有靈應識我去時還似到時貧

和前牧胡壽安韻

武志學

萊州守州人

竭來宣化布陽春一念孜孜只爲民步武前修寧敢後等閒憂道不憂貧

平昌關述所見

朱碩勳

淮水西邊日半明平昌關下彩雲迎山中綠桂花零亂小立殘陰吸鳳笙

震雷山

崔琳

郡東遠岫勢崔嵬列陣排空翠作堆靈沼龍騰風雨急一聲勢破禹門雷

賢隱寺

崔琳

西望香臺路幾重山門隱隱白雲封老僧喜得渾無事喚醒人心半夜鐘

申陽郡署中秋對月

清王廷伊

介休州守人

但看山郭入秋清況值中秋月倍明尊酒共歡情歷歷松風雜珮韻錚錚
露華如接青雲壑桂影遙瞻玉兔生城闕斗牛俱燦爛天涯鴻雁一行鳴

登賢隱山寺

彭之位

黃岡人

去去高峯尺五天，兩餘春色澹朝烟。
凭觀壁立真耶幻，漫拭苔封古也鮮。
千百年松孤處秀，兩三聲鳥靜中諠。
堪憐前哲真高蹈，不使人間姓字傳。

郡樓讌集

彭之位

把臂登樓楚塞西，清尊直與白雲齊。
滿城花柳憑闌遍，百里烟巒入望迷。
野抱暫抒拚倒載，文星迴對見新題。
春光莫遣遄歸去，明日還同聽鳥啼。

仲春郡侯課農

胡斌

霽日郊行侍使車，且詢清畝竟何如。
一泓碧聚添新水，萬井烟籠識故廬。
桑柘影依村婦盻，鯨鯢波宴太常書。
援琴更撫高山操，月亦同來照太虛。

經信陽憶何大復先生

彭而述

鄂州人

一代鴻儒獨擅場，紛紛餘子漫披猖。
陶甄軋茁歸元化，棗鑰風騷入混茫。
自古才人奇命數，當年宰相惡文章。
中原相遇橐鞬去，白豹山頭李夢陽。

春季月課

李廷基

隰州人

東風官閣曉寒輕，坐愛琴書一榻橫。
案牘停時旋課士，吏人散後有啼鶯。
花明春檻文心麗，香裊晴窗詩思清。
笑我無成偏技癢，含毫撫几尙多情。

登郡樓遠眺

張鉞

爲愛公餘霽景和放懷攬勝郡樓過楚山烟染青如帶瀨水風翻白似羅
古寺僧行高下路平林樵送短長歌田翁更慶籌車滿倚杖欣欣笑語多

謁端木夫子祠

張鉞

景仰前賢謁古祠松陰竹影徑逶迤直從性道傳心處想見廉平布化時
四面好山青到檻一泓活水碧通池千秋遺範宮牆迴長向官方服訓辭
過何大復祠遺址

張鉞

太史瑚璉姿葆真鏘光相與余一談藝瀟灑神俱王傾蓋豈必深慨然成
辯謗蘊藉叔度流縱橫西京上疏草就磨滅苦心將誰向

曾貞女苦節紀實

王孚江寧人

南山有青松北山有翠柏松柏亦奇哉歲寒不改易上棲雌雄禽分巢未
比翼雄者忽羽化孤鳴何太戚可憐貞女情幾與靈禽匹銀漢水盈盈鵲
橋未卜吉泉臺渺難追自顧無善術終夜但啼號啼號復何益堂前有老
親廚下無擔石蓬鬢爲誰容四時勤剪尺掘葛半盈筐歸拌糞糝食悲酸
祇自知冰蘖非一日守貞三十年天心竟怡懌姓氏達宸聰史歲標彤筆
淮水清更幽賢山峯翠嶺山高而水長芳徽永不息

邵狄門自信陽寄余採蕨篇蓋爲貞孝朱曾氏作也臚紀甚詳而哀

音慘狀不忍卒讀感而賦此

翁運標

餘姚人

採蕨歌胡悽惋空山寂歷弔哀猿聲慘慘兮腸寸斷又如孤鶴叫大荒愁
雲黯翳靡宵且茫茫天地安終窮惟此正氣撐長空丈夫徒自誇鬚眉
然奇節挺閨中昔聞崎山鮑氏女厥夫未面誓身許有姑在堂貧且病
績月級霜供厥茹此事流傳直至今此風落落已千古峨峨靈山實鍾
靈涼村有女足鼎銘是女是婦任人呼獨葆真性還蒼冥梁安在乎
猛欲渡浪拍濤掀弗驚顧危巢偏架老樹巔兩兩風風那得妬故人示
我採蕨篇行行字字血痕鮮按節長歌歌未已悲風索索起庭檐攬衣
推窗長歎息仰看皎月正中天

仲春拱橋觀桃花

陳聯璧

光化人

晴春烟靄俯丹葩落日荒村牧笛譁偶爾攜尊環絳雪恰如拈紙寫朝霞
橋分野色溪流漫柳拂清陰驛路斜一捻溫風輕拭面武陵豈必在天涯

秋日衙齋讌集言懷

彭

鏞

桐城人

清風當晝自南來小院閒亭面面開白雪驛前佳客至蟠龍月底彩雲迴
藥欄正欲三時雨秋浦還傾一葉杯烽燧何時消骸髀年華未許鬢相催

信陽道上

何嘉頤

草萊尙如此驚看可奈何年深荒未闢人盡地偏多孤鼠騰殘壘鶴鷓嘯
碧蘿流離誰撫字惆悵舊山阿

遊龍泉寺

陳聯璧

朝來秋氣爽重眺紫雲山木石僧爲伴溪流人自閒法華齊梵語蘭若卽
松關正欲開尊酒丹崖杖錫還

春日陪管觀察遊賢山

傅登榮

益州人
守州人

微兩山嵐薄疏林野寺開鐘聞僧不語花照客銜杯竹野團旌節松陰覆
弈臺春風試一醉踏破晚蒼苔

冒雨申陽道

莊

鑄

嘉興人
監司

塗泥驅款段攬轡陟危岡雲溼千重翠風搖萬頃黃劍光沈闌淡鈴語作
瓊璫不盡綏時願余懷殊未央

平靖關雨後

曹申吉

安邱人

濛濛終夜雨雲在半山中宿處烟霞靜行來古石通流懸千仞碧樹老一
巖紅樵牧聲俱寂應逢採藥翁

登賢山遠眺二首

張瑞徵

萊陽人
監司

久擬此登臨驅車到石林溪流抱郭近徑轉入山深古洞凌千仞長松俯

十尋香臺人迹少空翠落庭陰

爲訪招提勝高峯尙可攀雲來天作幕樹擁石爲關遠水通淮甸蒼烟半
楚山漁樵隨意得真愧野人閒

九日郊遊晚歸

張瑞徵

漫度重陽日登山憶故園言尋三徑菊忽到一家村松桂園霜圃樓臺對
郭門寒烟燈火裏鐘鼓欲黃昏

早春同郡倅彭立人遊賢山寺

賈待旌

襄州守人

不知賢山路來披野壑風雲移雙鶴下人息萬峯中嵐重常霏雨泉高遠
飲虹招提零落盡猶有一花叢

勞破山

薛耳

武進山人

開山真巨斧靈異削天然亂擁千層嶂中開一綫天水光摩絕壁月色映
平川汗漫遊何極歸心謝杜鵑

冬日登賢山

高翼辰

樂州人

霜風遊古寺松月上迴廊花引東山醉僧知北海狂蒲團何靜寂蓮宇自
輝光迴首河橋晚橫空雁一行

節婦袁劉氏

崔琳

正氣鍾坤道貞閨姓字芳
柏舟存勁節彤管發幽光
瞻彼賢峯峻溯茲澗水長
流傳千載後骨朽土猶香

賢嶺松風

張鉞

蒼翠千松秀盤紆一徑高
未秋聞爽籟無水聽驚濤
長嘯空中應孤琴象外操
每懷賢隱跡高臥屏塵勞

澗河泛月

張鉞

雙漿蕩晴川蟾光散暮烟
珠隨天上滿鏡向水心圓
桂席飛杯罍蘭言勝管絃
映淮良可賦同此對清漣

申塔朝暉

張鉞

何代留孤塔千霄不記層
蔥蔥佳氣合藹藹曙光凝
玉樹風堪倚金莖露可承
此邦多綵筆特立看飛騰

奎樓晚照

張鉞

雄郡通南紀巍樓接上台
軒窗華景集城郭夕陽開
烟細鬢初結霞明綺半裁
憑高恣遊騁鐘鼓未須催

龍潭瀑布

張鉞

立馬層崖下凌虛瀑布來
濺花飛霽雪喧石響晴雷
直訝銀河瀉遙疑玉

洞開緣知龍伯戲擊水不能迴

雷沼噴雲

張鉞

鴻鈞通竅處雷沼在山巔薄靄初浮水濃雲已布天
篆絲重疊吐簇練半空懸散作崇朝雨千村漑稻田

龜山晴雪

張鉞

玉屑朝初霽龜山近可尋微青依淺瀨積素入空林
氣與初陽動塵無一點侵祇應掃片石把易契天心

長臺古渡

張鉞

臨涯呼野渡桐柏發源長漲急篙能沒波平葦可杭
烟光通夾岸雲影泛中央四牡津常問溯洄意不忘

松

合下五首皆
詠賢山風景

張鉞

夾道松鍼破嶺雲苔纏皮裂罩斜曛高情想見陶貞白
謾謾無端滿徑聞

竹

張鉞

簇簇新篁翠欲浮紛披烏哢戀枝柔碧烟欹拂青嵐
掃好待傳神月一鈎

桂

張鉞

幾度滄桑賸桂叢森森綠蔭老琳宮生來自耐風霜
苦漫許凋零百卉同

洞

張鉞

穿徑捫蘿到嶺頭雲封古洞日光幽箇中境闢乾坤小花自芳芬水自流

井

張鉞

石竇泉香照面寒銀瓶素綆汲巖端繫腰漫笑錢鏗怯見小伊誰尙坐觀

澗

張鉞

潺湲粉練瀉山腰石徑雲寒溼翠饒清磬聲隨泉咽去塵懷頓遣一時消

過申伯碑

調寄風風臺
上憶吹簫

張鉞

元舅動名真卿墨蹟豐碑屹立千秋是周宣唐代往哲遺留悵望王孫去
後斜陽外草綠盈疇人民換山川猶是舞罷歌休凝眸青珉一片剔蘚
蝕苔斑石點金鈎筭青天易老古碣偏悠試誦崧高詩句還南國德美徽
柔甘棠在遺氓憶舊對此神遊

追賦環翠亭

調寄念
奴嬌

張鉞

風流刺史榜元勳祠畔結亭高築四壁不遮憑遠眺兩後峯巒如沐鳥語
叢花馬嘶芳草此景山城獨從容退食烟光無限清淑幾度浪打孤原
風吹古戍苔積殘垣綠繁卉荒蕪松檜杳斜日暮雲乍于敗甃零星遺基
一片勝境遙難續放懷長嘯變遷都付蕉鹿

以上詩類

舊志曰藝文之收以有關風土形勝人文者爲要第前此盛時家藏細帙戶挾青箱則摭採爲易今秦焰之後勿論作者寥寥卽有棗梨卽隨劫灰以盡何能鱗集如昔時哉亦舉目所及見者耳夫採之易則收貴嚴集之難則收貴寬峴崙之圃玉以抵鵲三家邨人得一粒殘重緘珍之無他有無之情異也然亦僅矣

文徵外編二 新輯

孟山夫婦合葬墓誌銘

崔 銑

正德中我豫十人仕而敦友孟望之年最少卓犖有大志才識逸邁其尊人樂靜公母孫太恭人來就養望之方爲行人祿入貧薄室居卑隘而又守廉歲時銑從諸友執觴以從子禮稱慶堂上樂靜公修眉疏髯而太恭人怡顏豐容滌醴腆美壺觴充潔夫婦父子陶陶然如享萬鍾者望之選御史中尙在試職上疏乞罷台鉉匪人勿使亂天下知必得禍顧義激不自全果下若盧治樂靜公曰臣分然弗爲戚太恭人憂子之難而偉其節是時家無石粟可供獄費鴻臚王崇哲毅然倡端諸友各出俸金以佐望之謫桂林教授樂靜公戒其善保終後望之起爲湖廣僉事一夕念二人之老明日拏舟北還再起爲山東參議公引大義令勿因私便是圖望之入官六月而公卒是爲嘉靖之年月日生正統己未享年八十有四九年冬新郊成禮贈樂靜公官及太恭人封如今稱十年春望之自南院改治河使還家上冢奉冠帔上太恭人壽太恭人疾已不可藥三月十八日卒生正統甲子享年八十有八孟氏金山人諱真童者爲元保定達魯花赤洪武初從戍永平衛實樂靜公大父云以戰功積官千戶卒子勝嗣調武

成已調信陽再以功晉指揮僉事封明威將軍配劉氏封恭人四子樂靜公其仲子也諱山字宗岳生而英介好書史及百家藝兄端任父官明威早樂閒淡樂靜公專家業田闢而屋溢樹後兄及二弟有異志樂靜公不能止乃自取荒陋者罔私鉤金尺帛或難之公笑曰富不如義況有命乎母劉失明性益忿躁樂靜公逆意奉向每進食必爲加餐少與舉人葉永蕃遊欲字公女配其子會葉疾貼心欲遂之恐公不可以語郡守守曰吾固聞孟公高誼當不負君公聞命卽諾且語來媒者曰卽葉公有不諱吾又當字其孤葉氏聞之喜而起告先祠曰吾死可矣諸生四五人才而貧公館之閉其室令學焉後果成太恭人明達有士知前室袁子四瀆瀛湖淵側室唐子亦四江浙澤沛太恭人子之如望之云孫男十三人梅舉河南乙酉鄉試樸才雋而天女二壻葉景昇梁山孫女十六人曾孫女四人太恭人常居望之宦所朝夕戒曰洋和而僚勿競恤爾民勿凌內省不缺貧樂得性可也外尤可指鼎食益災必也望之叩頭曰洋敢自墮詒母憂是年月日啓樂靜公之兆以太恭人祔墓在信陽東郭銘之曰嗟孟父嗟孟母偕得止厥有社詒孫子

雙林寺碑記

尙 櫟

碑立於明成化十九年

吾郡信陽州前爲縣治而有衛寓焉成化十二年有巡撫河南都御史張君謂縣與衛非敵體特奏請改爲州州城東門外五里許臨官道有古刹名曰塔院禪寺其地山水清奇絕勝人間境肇自宋之治平間歷年既久浮屠星散殿宇俱漫漶僅存者一塔而已前守武公志學巡行阡陌目覩是塔寺雖荒穢而形勝猶存乃不忍棄欲行修葺詢諸遺老得衛之後所致仕千戶唐氏寬知此寺之來歷與廢商確僉同特置募緣簿付之於僧圓悟倡首自宦達以至商賈軍民互相勸助或錢或米人多樂輸從之土木工料各皆有序與夫住持僧圓悟提督工修造三乘殿廊羅漢諸天鐘鼓樓而廚祠山門繚垣悉落成於今成化癸卯秋僉謂寺成不可無記筆之於石垂世圓悟乃白之於今郡守及守備者皆曰可遂託諸衛之指揮使孟公端來請余文以記之予於釋氏之教未嘗聞焉抑老旼林下再辭弗獲已而後受諸請言釋氏考其教自漢明帝時始入中國其爲教也清淨寂滅生死輪迴歷代以來崇信靡常極盛於晉魏齊梁唐宋之間曰沙門曰禪林地無喧囂雜選有蒼翠豁目前代詩人騷客多遊覽吟哦留題者如駱賓王題靈隱寺桂子月中落天香雲外飄張祐題金山寺僧歸

夜艦月龍出曉堂雲句之類是也今之寺猶古之寺豈無蒼翠豁日以快人心亦豈無騷人賦客吟哦於其間者況郡衛學者有愛其境界清勝假館卒業而利用於邦家者寺之於世甯無小補者哉若以軍民安危繫乎寺之興廢此好事者妄談非確論也軍民安危各有攸繫焉肆我朝內而京畿外而郡邑無不有寺者蓋援歷代崇信亦未肯輕毀其教也余爲下不倍茲因請爲記特以寺地之清勝者用書於石以記不朽

孟洋墓誌銘

嚴嵩

公生於河南年二十二舉進士爲行人時公之內弟何子仲默方有俊名與友李獻吉王子衡崔子鍾田勤甫及公日切劘爲文章揚摧風雅以相振酒食聚會婆娑酬睦以相樂時稱十才子已而公選入內臺爲御史卽抗疏論當道大臣用是詔下獄謫桂林學教授天下皆高公之節而諸子者亦各以氣節自著不獨才也公由桂林稍遷汶上知縣嘉興府同知擢湖廣按察僉事持僉專決恥唯唯恭遜意小拂卽拏舟徑歸引疾致仕嘉靖更化錄閒廢諸賢乃起山東僉事陞布政參議陝參政拜都察院右僉都御史巡撫寧夏尋改督儲南京公居南一月聞太夫人居家病劇卽解印馳歸或以職守難之曰吾安能顧此耶會改公督理河道命下值郊恩

貽封公捧冠帔至家踰四旬太夫人乃殯時論謂公孝感所致云嗚呼士平居學問談理道至居官臨事擇利害爲趨舍惴惴恆患失之惟公所履歷侃直自遂邁往弗回志節可概見所謂篤信好學者非耶假令公履高位當大事其不爲恇怯委懦狗時也必矣是歲三月公服闋拜南京大理寺卿衆謂駸駸柄用矣到官甫五十日遘疾遂不起則豈非命也夫其可悲已公諱洋字望之姓孟氏生成化癸卯五月二十三日卒嘉靖甲午七月二十五日年五十有二公坦易諒直與人交無諂色無詭辭居官務大體所至聲色不動績效畢著平生俸入以義散盡死三日無以爲斂方屬疾卽以後事屬都憲顧公華玉及通政林公懋易二公者日往問其終也視其斂焉顧公述狀而屬嵩爲銘

明陝西按察司提學副使何先生墓碑

汪道昆

當世以作者名家必首何李何則學士所稱大復先生何仲默云往聞先生將終屬諸弟子必李獻吉銘吾墓諸弟子不果聚族而私爲狀爲志爲銘其後數十年門人喬景叔始爲何先生傳概舉其質行著者載傳中又數十年先生有孫洛文守太子中允將修闕事囑余爲先生碑余從諸後死者尸祝先生願得逮事爲幸卽無能爲中允役其何敢辭先生家信陽

世有秩堇堇母李母夢日而娠又舉而命之曰景明始能言輒強記六年能聲偶八年能文里師謂何氏子童而神遞避席去年十二從父會寧丞信官臨洮臨洮守召授春秋奇之甚居三年而父謝去貧不能歸守帳具祖先生於郊車馬畢具既就舍伯兄景暘授以尙書尋以尙書籍鄉試第三人年十五耳先生翩翩然非也業已業詩善書出入則王公大人爭迎致之幸一見越三歲舉進士授中書舍人獨憂國秉下移力請告寺人瑾甚諸在告者矯詔例免舍人於家瑾誅用大學士李文正公薦起則仍秩直內閣侍經筵久之進司封員外郎侍直如故守中書餘十載始以副使督學陝西無何病歸歸六日卒時年三十九先生幼清蚤貴人人且旦暮卿相之卒之年不及強官不過二千石惜也初獻吉崛起北地倡江東歷下二三君子請業京師先生至大悅之相與道古遂駢肩而進先二三君子鳴其論世則周秦漢魏黃初開元其人則左史屈宋曹劉阮陸李杜都人士所膾炙者宜莫如彭澤宣城昌黎先生宣言古文之法亡於韓詩弱於陶亡於謝睥睨千古直與左史屈宋曹劉阮陸李杜游世儒率溺舊聞弗入也及得兩家所論著者肱篋而擬議之於周秦漢魏黃初開元之間始相顧曰誰謂何李不馴古之人也於是聞者響應莫不傾耳聽之兩家

遞爲桓文執旗鼓號天下矣獻吉兢兢尺寸非規矩不由先生志在運斤
斲輪務底於化於時主典則者張獻吉主神解者附先生要諸至言各有
所當顧其相直若繩墨而相濟若和羹卽言逆耳而莫逆於心耳食者弗
察也今兩家並懸書海內海內不啻尸說之浸假得終其天年先生化矣
卽先生以文學顯顧其義甚高初入中書輒上書許襄毅所極言嬖人用
事公等務操正義撓其權乾清宮災嘗應詔上封事則又極言義子邊軍
番僧諸不便狀疏留中不行聞盜起河南會文正公請老先生謂非大臣
義書讓之瑾故憚獻吉名高嗾獻吉先生書抵文正爲獻吉地且介康德
涵居其間瑾意平乃解及獻吉對江西簿獄且成先生獨上楊文襄書直
獻吉幸臣錢寧冒賜姓目攝諸公卿獨以古畫求先生詩待命終歲卒不
予中官廖鵬柄事嘗賻師御史棺先生醴諸客購他材力卻鵬所賻者鵬
弟鸞席鵬寵鎮陝以西諸參隨騎遇藩臬大夫無所問先生塗遇騎者輒
就馬上縛之乃若使滇不納饋遺居喪不禫不飲歷仕十餘年不問家人
產死之日囊中僅三十緡卽其孝廉足多蓋天性也景叔又言先生博物
旁通天文地理陰陽律歷諸家末年將輟修辭務經世爲用先生已矣辛
巳夏六月不雨至於秋八月及先生卒其日大風雷雨作晝晦冥嗟乎歲

在龍蛇泰山梁木阨矣先生言行載名臣錄鄉譽載中州人物志其學政載陝西通志其家世則已詳墓志中碑不及詳碑其大者如此汪道昆曰儒者言皇帝王伯其相推若四時秦終歸餘漢履端矣由唐宋而迄元季迭相竭而歲終焉大明開天乃復更始漢文以清靜致刑措熙熙然春乎洛陽少年爲漢作始未駕而稅其如通達國體何孝武表章六經兩司馬並起極盛矣伊誰始耶明在孝宗春之府也漢承挾書而得賈董明承十世之弊而得李何先生與賈爲徒而中道並天其有不同者幾希顧漢沿周而去道近漢之後無文矣唐之中無詩矣兩家興廢繼絕其爲力難卽末流誰能不波疇敢登諸千載之上要其功則李何茂矣嘉靖以往何論建元元封禘而祖之其爲司馬非兩也卽中允起當戶其斯爲奉冢祀者耶中允有當於不佞之言遂屬吳人周天球勒之石

何信夫婦合葬墓誌銘

李夢陽

信陽何景明爲中書舍人無何及致仕歸踰年喪其父己又喪其母將葬俾來乞銘余杖涕曰余始與景明友蓋日想見其父母乃今不卽見矣志曰封徵仕郎中書舍人何公者信陽州人也諱信字文實其先居羅田曾祖太山始徙信陽高皇帝過信陽樹二旗令曰爲我軍立紅旗下爲民白

旗下於是太山卽立白旗下太山生海海生鑑陰陽典術鑑生何公何公少使氣大言任謀然數困鮮成事人不之奇也有盧翁者識之女以女語人曰吾甥三十當有後是後有異人產其家公三十果辟爲布政司承差見諸承差者污賤無藉也又率務裘馬相高何公恥之獨潛飭行檢讀書久之頗自表見而布政司吳節因竊怪之特使董大役事出其金公則立辦願又入其羨金請振貸所全活以萬數吳公乃大喜以爲賢引置心腹成化末關中大饑詔發漕米萬石至衛口由河南發卒輓抵關中當是時獨南陽汝寧熟於是河南乃發南陽汝寧率萬人將行何公聞之悲曰今關中米石不過直金一耳今奈何若是矣乃入言於吳公曰公誠權出帑金資使入關糴可遂得萬石乃因令二郡曰能人出一金卽罷若役仍給粟人一石二郡人知役且十倍費必踴躍人願出金一而不肯受粟是公一舉活關中之民弭二郡嗷嗷之口而省粟萬石矣吳公曰善卒用其計何公於是有名河南然願豪亢自負太監汪直河南都御史以下震懾皆匍匐行上謁會直左右俾都御史劄屬括名馬都史業已諾然手戰不能執筆汗蔽蔽下何公在旁曰都御史大臣不當煩吏事乃奪筆代都御史劄其無嚴貴幸如此其後爲寧會渭源二驛丞又有抗監貢獅番武官及

擒巨猾李氏事今皆不詳第詳其著者焉何公爲人大段厲氣義不欲齟齬與世浮沈或見尊官大人有弗潔也則退而唾罵之而汪直過時按察使陳選見直獨長揖不拜何公終身歎慕之曰陳按察真男子也何公故病足往在涓源病足會御史行縣簿尉以下當徒走奉輿馬行輒數十里何公於是仰天竊歎曰嗟乎可以去矣遂卽棄官歸然貧無馬騎有人資之車一乘馬一匹乃始歸而舍城西溪上卽又日歌詠力田誦書郡人卽無大小咸望風起敬公稱先生不曰何驛丞也乃後何公以子景明封官乃何公不欲稱其官稱曰梅溪居士郡人卽又稱梅溪居士云先娶盧氏卽前盧翁女盧翁有異術嘗以策于右將軍有功已棄之亡歸故不及於難繼娶李氏其父山東人也寓羅山盧家羅山盧家故與李翁往來善盧翁因竊知李氏女賢及盧氏死乃力主李氏女繼盧氏曰產異人者此女也乃後二氏皆封夫人云盧氏生景韶累官東昌府通判卒景暘舉人而李氏生景暉景明又生女適孟洋今爲行人何公生某年月日卒某年月日年若干歲盧氏生某年月日卒某年月日年若干歲李氏與何公生同歲卒同月以某年月日合葬西山之麓

祭王公祖嫡文

陳登雲

維萬曆二十一年歲次癸巳五月甲寅朔十有三日丙寅巡按河南監察御史陳登雲謹以香楮庶饁之儀致祭於明右春坊右庶子師竹王公之墓曰嗟嗟丈夫意氣每重同聲芝蘭臭味豈比周之私情追思戊子雷火示異應詔上書紛紛連袂予憤戚晚包藏禍心乞從廷議正位儲君封事一投自分萬死詎意聖慈且閱且擲先生慨然發之傳記頌聖主之仁明小臣之志當斯時也先生不識余而識余之丹衷予亦不識先生而識先生之高誼比予外艱匍歸田里幸朝廷之有公雖山林而足矣敢謂我去而公復告旋又敢謂我來而公遂不起哉執紼無緣佳城已合痛芳魂之不贖憶音容而如昨束芻載幣聊以表衷曲之葵對日臨風自不覺肝腸之割嗚呼公昔在朝志存紀綱建景失號倦倦抗章舉國大典補缺爲臧廟略宏深尙未見之行事金滕不朽實有待而斯彰鍾期已死伯牙猶琴何知音之不負我而我之負知音西寇甫寧東夷未擒册立無期杞憂方深則先生之不及見而予之徒爲日夜腐心若夫先生嘉祉桂子彬彬文謨武略爲時名臣恩光累疊旂鼎常新此又予之慶先生者未艾而先生之齋志以伸嗚呼如公併此通忱尙饗

雙林第三代洞宗三十三世石慧大和尚之塔

胡 煦

雙林石慧福濟禪師徽州程氏子髻齡穎慧幼嗜空宗年一十六依應山智耀披剃旋依雙林寺介衡爲侍者衡知爲法器因受具足戒朝夕咨請俛悟本源得付受焉卽以雙林後事委之介衡固曹洞嫡派也師任坐方丈者四十八年其間兼理光山之淨居寺息縣之塔院寺叢林三處其接引來學總不違曹洞賓主君臣正偏之旨至於講解經論悉取證於五經四子書故所說明白坦易無不可解若乃隨機赴緣則是非齊掃法病同拈真如金剛王寶劍無不斬然決截故能使碧巖青嶂翠竹黃花信手拈來途途是道有時寂然無語一棒一喝予奪瞭然所由承其旨者罔不悉飲甘露而去今字中龍象得法於雙林寺亦復不鮮信陽乃南北孔道師在雙林最久而開期接衆資糧無不足之患者由本寺所置及檀越所施者半而前後觀察使及牧信陽者欽其德望接其言教亦莫不有寺田之建置焉後嗣守之似續而不廢固萬年如一日也雍正十年三月二十五日示病而化卽塔於雙林之東紫弦居士爲之銘曰悟無生忍轉大法輪君臣偏正雙寂雙明棒喝照用非見非聞空有不立知寂全冥日午三夜半天明微塵海納須彌芥形前後際斷非去來今

重修文廟碑記

張灼

信陽據三關之險當楚豫之交爲古來兵爭地宜俗之相習於武健而非
其人之不可以文蓋壤接江汝固昔文王化行所及柔惠正直申伯遺教
存焉春秋之世申叔時楚賢也楚子伐陳以蹊田奪牛之對旣縣陳而復
封之君子以爲有禮其論子反也曰信以守禮禮以庇身彬彬乎其有文
矣信陽故申也世亂則武競世治則文興今海宇承平百七十年民不見
兵革涵詠帝澤絃誦四起燕秦之俗盡如鄒魯信陽之人無不蒸蒸慕學
由其慕學之機益迪以聖人之教詩書禮樂日趨於盛則又在官斯土者
之留心於是也甲子冬灼膺簡命觀察南汝駐節於申至則首謁文廟遵
往例且政本也旣將事周視大成殿兩廡棟宇半就傾圮泮池戟門亦多
漫漶且池與門不相直以爲不稱崇奉失尊禮先師之意又人道貴親宗
廟在左子雖齊聖不先父食崇聖祠宜在大成上反位其下聖心不安益
非所以教孝考之州志併諷州人士大夫蓋廟自明末兵燹蹂躪至乾隆
甲午癸卯兩次修建及今又二十餘年上兩旁風靡所蓋障位置之失迄
未是正余所謂事無亟於此者文翁所以化蜀也因與虞牧籌所以修之
甫議工虞以憂去署牧李相與捐廉爲州人倡以履任未幾未訖事丁卯
王牧至繼起而力圖之州人歡然從事述工於二月廿六日不逾年而工

竣廟崇加矣瞻視以肅改建崇聖祠以其地祀文昌三代展泮池於離位而正其橋門尊經閣暨奎樓各處以次修整煥然改觀城北有瑚璉書院併欲整理以勵文教相傳子貢爲信陽宰故書院祀之古未有信陽名其說出王肅僞家語事匡信然聖人之門獨曾子子貢與一貫之傳子貢由文章聞性道學聖人之學以子貢爲階天下祀至聖不必其地子貢之祀猶是也嘗親至其祠而瞻禮之書院廢墜已久爰集生徒講學延師與爲振興鼓舞蓋將以希賢者進而希聖子貢之宰信陽與否可毋論也茲當文治煥巍聖教昌明之日非徒以土木之工爲崇先聖蓋所謂望於州人之學者甚厚將使戶詩書而人禮樂過斯境者樂人俗之美如見文王申伯盛時而忘其地爲山川之險隘益以徵我朝休養樂育蔚然盛世之治而官此者亦欣覩文明之氣象願與州之士大夫雍容於俎豆揖讓間不其懿與

新修演武廳碑記

萬 孚

信陽有營自雍正八年始大閱及於信陽自道光六年始其有演武廳也自本日始國家武備修明超越前代聲靈震顯中外畏懷蓋太平二百餘年矣溯自列聖以來歷飭戎行備於無患諸大臣仰承威命訓練維謹下

逮兵弁莫不蹈厲奮發糾糾干城信陽地界荊豫三關之險比於百二考古南北分據如齊梁魏及宋金之間常恃以爲邊鎮而以兵爭之今六合一家烽火晏然山川形勢之勝自來攻取防守之蹟如儼然在目也國初沿明之制分巡南汝光道駐信陽雍正八年設信陽營守備領之區區一州而爲監司駐劄之所復以守備分轄營務非以地關險要之故歟守備轄千總一馬守兵四百有六分防三關確山遂平及遂平之平頭塚各馬守兵若干道光九年增一汛於確山之溝竹店十三年信陽州復增申陽臺吳家店兩汛而南汝光道請加以兵備銜雖部議或准或否而斯地控制之重可知矣校場無演武廳監司鬻軒李公倡捐興修守備張公董其工工竣命孚爲記竊維國家可百年不用兵不可一日不演武信陽營曩屆大閱之歲或調至汝寧襄城併營合操自程梓庭中丞逐營較閱次及信陽至今因之夫較閱益嚴營汛益增而獨缺一演武廳每治事如綿絀者之爲非所以昭其備也信陽形勢扼要武備最重尤非可苟且缺略爲也是舉也隱然見扼塞守險之地整軍經武之制加詳焉於以明恥教戰體國家安不忘危治不忘亂之意一事雖微烏可已哉廳旣成適汝甯太守鹿儕廩公飭民壯添演擡鎗計一府九屬置擡鎗百推之南陽光州

可得據鎗三百營伍外似增一長城然則民壯之成勁旅亦自今日始

也南汝光道李汝雲南汝光道博崇武信陽州正堂萬字信陽州正堂

玉和信陽等處守府張士凱信陽武信陽州正堂萬字信陽州正堂

大田遠平汎副司廳張鵬程大灼申頌臺汎司廳董義共捐吳家五店司廳

信陽州事萬孚撰此文廳百總民國有毀壞現歸河南第區農林局

重修賢首山寺碑記

王家相

豫之南多山信陽為最信陽之境多山賢首為最瀨河繞其南與州城南對峙若屏障騰雲冠峯高霞翼嶺不獨為一州之名勝殆中州清淑之氣畢萃於茲焉道光五年春余履觀察使任公廨故近南城青翠在眼心嚮往之越明年重九日乃克登其巔而謁所謂賢首寺者寺不知建於何代或曰自梁魏間然無碑誌可考而古殿崔巍與蒼松茂竹相掩映適據此山之勝因詠何大復樓高窺萬井潭迴落千峯句脩然有超塵之思寺僧謂余曰寺於康熙初重建迄今百餘年正殿及藏經樓棟宇傾欹不修且壞方年穀順成風雨時節民殷物阜百廢俱興而寺踞崇巖日就坍塌曷以宏象教而肅觀瞻請修之余應曰諾乃首為捐廉以倡夫釋教為儒者所不道昔賢論之至矣尤切者莫若昌黎韓子願後世猶以其未晰佛之宗旨為病夫佛之宗旨亦清淨無為而已非能敲天下盡棄倫常而從其

教而其因果報應之說足以警覺愚頑故歷代尊崇至於今不廢且寺宇之設必在名山勝地莊嚴美麗爲山川增色擾擾者從而遊焉而道心爲之一動而塵機爲之滌除是其教雖遁於吾教之外實在吾教範圍之中也道光十年秋寺僧天機來告曰募修幸成矣凡金裝佛像若干尊修大殿五楹後樓五楹其餘棟楹梁桷板檻腐黑撓折者蓋瓦級磚之破缺者赤白之漫漶不鮮者靡弗治千年古刹煥然一新願有以記之余按山名賢首又名賢隱任觀察宏業考之最詳以爲後漢汝南周磐棄官奉母特徵不應旣名賢首以表其孝復名賢隱以志其高然則山以人得名寺以山得名將敦本務抑浮競使咸還淳而返樸者胥在乎是佛教之不能外乎吾教豈不信歟昔柳子厚之溪以愚辱而信陽之山以賢榮夫佛爲彼教之大聖人固不必以賢著茲山之靜而有常則賢茲寺之建而不拔則賢寺僧天機提倡宗風不墜厥緒其亦可謂賢矣乎時當季秋霜林漸落寒山蒼翠衙齋對菊泚筆而爲之記

壽鐵石翁卮言

秋 郁江蘇

才必沛然餘於事外而後可成爲有用才人必有沛然餘於事外之才而後可內養天和外用之以康濟民物彼任一事而竭蹶不遑者由才不足

耳當耽風雅一行作吏而遂廢焉壯建事功老將至而意興頹喪亦由才不足耳竊持此衡量當代名流乃益歎鐵石翁之不可及鐵石翁者今觀察河南南汝光浙道南海黃小宋世丈之別號也曩顏其圖書詩畫之室曰鐵石翁齋近遂自號鐵石翁今行年六十有九矣奉檄馳巡地處孔道下車匝月治具畢張則猶是蚤歲栽花五縣作牧二州政績之精勤也案牘偶閒揮毫拈韻得詩必和卽事成詠則較諸平生所著宛社黎陽彝山穎川召南各集暨游燕粵東瀛各吟草尤超卓也抑且葺園林尋巖壑修勝蹟崗幽光馳郵函於廣交倡風雅於千里則昔者躡屐嵩華擊楫滄溟之壯懷未少減也人第知翁龍馬精神得天者厚宅心仁愛在在有情以爲耆齡遐福之徵是固然矣顧使其才非有餘則政事文章必有優此絀彼之慮縱欲兼營並鶩如竭蹶不遑何嘗聞老翁仕宦所至教澤在士惠政在民潤色在山川題詠在鉛槧今值新法繁迫而綽綽有裕如故齒近古稀而氣體充健如故卽其所成就者以上媿往代循良吏之治行文詩大作家之造詣誠未易論定抗行誰何要其才有餘於事外外足康濟民物而內以自養天和斯固確鑿可信者也今天下所患莫大於乏才采憲章於四隣復官制於三代意至美法至良而任事不得其才終恐如孟子

所云非徒無益而已乃當事之任人以事且於一人任以數事者一視其紙墨口舌所飾陳遂從而才之弗復觀於野觀於市聽於閭閻輿論以審其程效何如甚且絕不知有爲事求才之念徑自才其所謂才而任之則曷怪翁之勤政如故豪吟如故而浮沈於仕宦亦如故哉幸逢皇運貞元賢王秉軸日新厥德薄海從風於是翁方憶尊鱸載琴鶴倦游思憩將先歸隱南隱寄廬以漸返棹珠江優游林下業已寫圖見志矣忽不意受委觀風豫南在翁誠不以是自欣然中州士民知翁者固不禁鬢乎鼓軒乎舞以爲其有餘之才遭有爲之時抒有情之懷必當爲蒼生留此而大用未有艾焉豈不懿歟孟冬二日爲翁初度之辰越三日又爲翁德配李夫人華誕夫人與翁齊年汪洋偉度如翁治家理繁劇才如翁耆齒氣體強健亦如翁以是同人羨爲嘉瑞咸樂奉祝雙社翁以國恤力郤之罷信陽牧祝君竹言亦賢能吏而雄於文者倚馬成啓事二千餘言爲翁贊夫人徵文詩是亦天既生才地必聚之上苟用才下必應之一證也郁未能仰測翁才無端有感於世不乏才之說爰拉雜書之以壽翁並質諸祝君以應徵翁夙不忘天下者或覽此文先進一觴乎

以上文類

遊賢隱寺因登山絕頂

張灼柳州

博得公餘半日閒，頓拋塵俗叩禪關。
隔林清壑雲中寺，繞徑蒼松雨後山。
境靜真能成大隱，地空何處證春還。
眼前花竹維摩偈，住相優曇盡可刪。
小住招提話去留，隨風吹上碧峯頭。
欲窮寥泝疑無地，任眺河山不藉樓。
楚豫雄關雲北向，齊梁軼事水東流。
時和恰共豐穰樂，何但登臨記勝遊。

賢山東嶺有賢嶺松風四字碑係約書二
詩刊在碑陰約嘉慶中汝光道也

秋日葵園卽事

張灼

退食清齋靜掩門，蕭條廨舍儼荒村。
小園聊得藏鳩拙，老圃猶能咬菜根。
客話正濃茶欲熟，牙簽已罷酒初溫。
秋成又喜嘗新稻，甘苦輿情可共論。

對菊

張灼

園內葵初謝，籬邊菊已英。
黃花猶舊蕊，白髮更新榮。
曾負林泉約，終朝松柏盟。
公餘來對酒，應見古人情。

葵園十詠

傅壽彤

世故日已夷，春風若已知。
萋萋生衆綠，期君同護持。
何以同護持，願君還

聽之聽綠軒

亭北池一方，亭南山一角。
山近雲不停，池深魚自躍。
一片濠梁心，並作希

文樂 後樂亭

曲池不半畝池荷居其半一半付游魚荷池遂成泮卽以名吾池待與游魚看荷泮

雲去雲未歸問雲在何許西踰少習巔東邁長淮浦所至結重陰歸來帶膏雨

歸雲洞

我家天南陲坐擁千萬峯誰移百五十置之中天中嗟不適於用日生雲數重

百五十峯草堂

年年聚萬花日日防花竟覆以百尺桑絡以九折磴莫教春遠行長使花光凝

萬花聚

我在衆香中不知春所在我去尋我香我適在香外願我歸我室永與香無礙

定香室

屋在菜花中人在菜花裏花香會有時根乃甘如薺此味不容忘吾將咬到底

菜香書屋

金天轉勁秋百計鞭不走化作千萬聲一一來吾牖胡爲乎其來吾當問歐九

來秋聲館

青青園中亭願得朝露晞青青園中亭常恐朝日西所望亭中人瞻此青

青暉 青青亭

衙中四詠

傅壽彤

吾少志當時未治樊須學年來感馳驅又負鍾山約一畦今榜衙分種葵

與藿次第及晚菘鄉心閒處著

寒畦

生年十五六隨宦嶺西偏所至闢書舍竟日勤鑽研撐腸五千卷彈指三

十年此境不再得兒曹當勉旃

葵陰學舍

矯矯雲中鶴依依淮南山云胡不飛去復與人往還迴翔謝八表相看無

一言自茲絕異患況乃多餘閒

鶴巢

曩歲北援兵適奉東洲訓曰惟澹與勤供吾兩作郡世氛滋不惡海氣集

如坳夜來看斗杓竟得天心認

澹勤室

信陽懷古

程恩培

紫霞壇上仙何往白雲樓中曲不傳天子忘讎封舅日風人垂涕戊申年

東來一綫淮河水南望千峯楚塞煙舊事茫茫誰與述夜披仲默好詩篇

過信陽敬懷何大復先生卽題集後

陳瑞浦

弱冠登壇世莫攀文章氣節俱斑斑靈鍾嶽降嵩生地秀擷廉泉讓水間

先明生祖常官其地詳悉列 七子而還操正響諸孫相繼侍清班卜船久瓣

鄉先輩何幸今過大復山

山先生廟居羅田之卜船與家居距二十里

題何大復故里碑

費庚吉

一卷詩常在重經翰墨場遺音追正始餘子漫猖狂定論推元美齊名有夢陽殘碑留道左風雪感蒼茫

瀑布崖

畢太昌

羅山甲辰翰林

濯錦江頭碧浪開浣紗溪上翠雲堆何如瀑布懸崖好世境繁華一例裁

臥虎石

石形如虎臥崖中毛骨藏蕤氣象雄留得君山遺像在時時應有大王風

母雞石

母雞石畔綠陰圍風雨深宵總未歸爲怕此間塵網重故甘雌伏不雄飛

曰而崖

萬峯齊擁曰而崖絕頂登臨豁壯懷石果能言花果笑須知取義不曾乖

嶙峋杖

參天石杖骨嶙峋不見當年扶杖人莫是長房仙去後留他塵世指迷津

鸚鵡石

舊傳靈鳥在人間問汝何時化石頑想是多言爲世忌故教藏拙在深山

千佛塔

一佛神靈已莫窺塔名千佛佛更奇恆河沙數生靈阨盍遺慈雲普護之
雙龍寨

白雲深處擁雙峯終古蕭條伴老翁天下蒼生望霖雨騰霄誰爲起潛龍

陳善同曰易有云觀乎天文以察時變觀乎人文以化成天下文之有關於政也大矣唐虞廟堂之都嘑三代君相之制作孔孟之垂教百家諸子之爭鳴皆文也而其時之政治卽藉以表見焉秦漢以降政以日汚而日駁文遂日變而日漓作述之業遞降而不及於古遠甚然源遠而流未沫其附託於經史子集之餘燦著於文人學士之筆數經兵燹都成灰燼幸而僅存不過千百中之一二若竟聽其散佚將何所藉以資古鑑而知得失我申承柔嘉遺教作誦清風後世有述大復先生爲詞林宗海內宗仰而王孟馬戴並鳴一代彬彬郁郁美不勝收有岷玉抵鵲之感有清之世人才少替文不古若然降格以求窮撻羅於荒煙蔓草中雖隻句單詞亦覺爲山川菁英所發洩至可珍惜不敢不廣取之以供吾徵考蓋於明則佳構過多而收較嚴於清則物稀爲貴而收較寬其爲辦法不同而其以事實關係爲根據則一也比者國學中衰斯文將喪起頽運而振墜緒不能不有望於後起之賢也

重修信陽縣志卷三十一大事記

大事記

一縣之事蹟矣其關於地方行政及歷朝文獻本志前三十卷既已分門別類彙載梗概若事屬國家動關大局雖非一縣所能範圍而確繫地方之安危利害要未可棄而不錄也撮其大要亦有數端一曰黨事如國民黨信陽縣黨史暨癸丑黨獄是也二曰交涉如雞公山外人租地北關內外天主堂購地等各交涉案是也三曰災變如戊戌平糶庚子拳禍暨嘉道以後各災異是也至於雜錄則或見聞瑣屑或說近感應足以爲後人法戒者附之簡末亦猶圖書集成之有外編云爾統以大事記收之要使後之人捭拾故實借作鑒觀上以備國史之要刪下以驗民生之休戚知我罪我聽之可也

一黨事

中國國民黨信陽縣黨史 癸丑黨獄 黨人傳

二交涉

雞公山外人租地交涉案 天主堂侵佔北關外城濠交涉案 天主堂教徒奚潤身購買北關鎮中山大街民房交涉案

三災變

戊戌平糶 庚子拳禍 鐵路罷工風潮 十四年冬陝軍守城之役 共產黨襲攻信陽城關車站之情形 嘉道以後各種災異

附雜錄

一黨事

中國國民黨信陽縣黨史

一黨部沿革 民國元年南汝光道李兆珍陸軍第六師師長李純在信陽遴派國民黨員方遂挺劉鶴皋熊繪幽謝夢九龐南溪等至南陽訪李亞東王天縱聯絡軍情表示擁護共和之意向

二年四月信陽人查光復尹新憲鄭宛南等因在開封鼓吹革命消息被人洩漏當局捕禁先後被難黨員劉少峯斯時在汴聞風遠避是年開封軍警聯合會受袁氏之密命嚴緝河南革命黨員八月間信陽黨員何衛岑王泮琴被逮解汴槍殺李繩武慘受重刑幸得有力者營救脫獄於是國民黨志士周連城甘周原王雅齋易敬修熊繪幽孫敬修劉墨香易小康周少溥仝靜如仝子方方遂挺郭鳳皋彭鶴算等紛紛逃匿勸學所長易宣三單級師範講習所所長劉遂真以職務在身委曲求全幸免於難

十三年河南督辦胡景翼提倡黨務羅致國民黨先進籌備河南省黨部遴委周少溥仝靜如爲信陽縣黨部籌備員旋約同志易宣三黃醒民易桂五高靖宇等組織信陽縣黨部籌備委員會宣傳三民主義以

求實現

十四年五月信陽縣黨部選舉代表黃覺沈瑛至開封參加河南全省第一屆代表大會黃覺被選爲省黨部執行委員

十五年秋縣黨部移於邑南之柳林易桂五郭時哲易雲峯周紱倫等執行其事全靜如周少溥易宣三黃醒民等均遠隔在城

十六年春駐軍魏益三龐炳勳所部與四鄉民衆情感未洽幾釀衝突城鄉交通斷絕柴米缺乏人心恐慌邑紳劉遂真薛溫伯周少溥等假道尹公署召集紳民會議極力調解選派四鄉紳士出城接洽並推舉黃醒民熊意超張書紳赴武漢中央政府請願以解地方之難

十六年二月縣黨部改選執監委員易桂五易雲峯郭時哲黃醒民蔡星三等當選爲執委全靜如易宣三周少溥當選爲監委至六月奉令改組選舉黃醒民爲縣黨部常務委員丁雲青全靜如郭時哲等爲執行委員維持秩序免除衝突是時北伐成功中國國民黨各省黨務均經成立信陽於八月由省黨部委任劉瑞庵陶翔千爲籌備委員成立中國國民黨信陽縣黨務籌備委員會十月籌備就緒開第一次全縣代表大會選舉馬紹援沈德化馬百威劉景山劉瑛王璞楊時亮七人

爲執行委員方吟之張蓬山梁國磐三人爲候補執行委員余振武郭之幹張鳴謙三人爲監察委員成立正式縣黨部歷時四月因事改組十七年二月由省黨部委任劉仰山胡海洲爲改組委員成立改組委員會三月中央令各地黨務一律停止活動舉行全國總登記六月省黨部委任王光臨胡海洲吳麟閣爲指導委員成立指導委員會辦理登記九月省黨部將王光臨等免職另派李自省寧崇漢楊春軒爲指導委員十一月開第二次全縣代表大會選舉劉則森馬紹援張燦斗李自省楊春軒等爲執行委員余振武爲候補執行委員旋補楊春軒缺爲執行委員全鎮爲監察委員成立正式縣黨部

十八年三月省黨部任喬榮科爲改組委員不久因馮軍叛變黨務停頓八月由省黨部任馬紹援牛國茂馮自覺王忠敬全鎮孫子純爲整理委員成立黨務整理委員會整理全縣黨務

十九年三月省黨部將以前所任各委員一律撤回又另派王含章李鴻鈞馬紹援全鎮孫子純爲整頓委員以後馬紹援因事罷職省黨部派胡海洲補充四月因閻馮戰起省黨部遷移至信陽省立第三師範學校辦公

二十年元月省黨部加派王濟寬魏士駿爲整理委員六月整理完竣開第三次全縣代表大會用乙種選舉法選舉執監各委計周鴻儀沈德化王含章李鴻鈞孫子純方吟之魏士駿王濟寬張燦斗等當被推爲執行委員候選當選人黎文琴郭雲奇李振鐸賈葆恆等爲監察委員候選當選人以後省黨部圈定周鴻儀沈德化李鴻鈞爲執行委員王含章孫子純爲候補執行委員黎文琴爲監察委員郭雲奇爲候補監察委員成立正式縣黨部

二十一年元月豫南劃特別區黨務遂由豫南特別區撫綏委員會主持縣黨部名義取消改爲特派員採取秘密方式第一任特派員爲陳琴朗幹事沈德化第二任特派員爲王錫瓚幹事仍爲沈德化第三任爲劉魯文七月豫南特區撫綏委員會結束黨務又由駐豫特派員靖主任公署所組成之豫南特區黨政聯合辦事處接辦特派員名義改稱指導員取半公開式最近復由省黨部將指導員名義改爲幹事二十二年四月省黨部委重育民爲信陽黨務指導員至八月改委尹鴻勳爲信陽黨務幹事重育民爲書記

二黨員數目 信陽黨員經過各次登記者共有一百零八人

(1) 城內五十人 (2) 明港三十九人 (3) 古城十九人

三黨務組織 城內屬第一區黨部古城屬第二區黨部明港屬第三區黨部

豫特別區成立後各區黨部及區分部均撤消改爲小組辦法

癸丑黨獄

清季邑人列籍革命黨之同盟會者李亞東一人耳光緒三十三年李在鄂被逮繫獄劉叔豹亦以在黨獲罪辛亥八月始得出民國成立同盟會勢大張設豫南交通部於信陽邑人談自治倡公益者爭先加入其因個人意見不合者則別投民主黨統一黨籍異幟以相抗同盟會旋改組爲國民黨黨員較他黨特衆地方議事會參事會教育會勸學所公款局及各鎮鄉自治會官私各校職教員十有九皆爲國民黨人聲勢之盛大爲官府所忌參議兩會尤努力於剔除衙署積弊搜擠吏胥賍私以及勵行剪髮禁煙取締私塾抑土豪查公款種種興革事宜間有因操切而招反感者汚吏劣紳遂利用爲傾軋之計於是訐告朋興而黨人團結益堅卒不稍懈二年六月汴坦火藥局被炸偵探四出捕黨人邑人尹新憲鄭宛南查光復在汴皆以嫌疑被捕鄭賴有力者緩頰遞回監禁尹查皆槍斃

未幾蜀人流寓信陽之李繩武突被探捕解省指爲豫南黨部幹事問以受孫黃委任勾結白狼擾豫罪鞭笞至死者數賴其先輩與法司李兆珍有舊爲之力保得釋由是信陽爲本省富產民黨之嫌疑地邑人與民黨交惡者蜚語當道謂某會某局皆亂黨機關議員何東藩王泮琴皆被捕解省處死參議兩會各員平昔稍露圭角者皆逃避副議長方之傑參事周原瑞及教育會長周繇瑞公款局長仝尙渠南鎮自治會董事甘以敬皆被通緝又於公款局搜取籌辦民團槍械指爲逆證據以抄沒仝氏家產公款局教育會遂遭封閉旣而參議兩會及各鎮鄉自治會亦取消省議會員仝鎮及候補議員熊兆岐並遭通緝官紳嫉視民黨者氣勢陡壯而鄉黨自好之士偶以地方公益與民黨有杯酒交者至是皆寒心不復敢問公事矣縣知事李萬基當民黨未敗時與之周旋甚善及事變驟出辣手下石邑人共驚其鷙側目而已次年白匪平奉令清鄉李因盡鋤鄉紳之尙氣俠者而使胥役介所識面之紳狼狽以吸民脂是秋李去時其門丁某至挾費六七萬元以行李之宦橐可想已嗣後政局反覆黨人逃者皆歸仝氏被抄家產亦還而死者不可復生民氣摧殘者不可復振吏治益壞民生益促地方事益不易爲矣

黨人傳

何東藩字衛岑游河鎮人初肄業河南陸軍學校轉入巡警教練所畢業任信陽警務公所巡官宣統三年秋革命軍興棄官之鄂任軍務部交際員民國元年解職歸充國民黨豫南交通部幹事被選爲縣議會議員二年秋因督催清鄉之便徧歷鄉村運動二次革命並與公款局長仝尙渠謀購槍械爲南軍響應事洩被逮至開封遇害年二十九身後蕭條妻孥無以爲養家遂破同事周廉岑方子傑甘周原熊繪幽等均被通緝子傑周原今已故自有傳

王桂芳字泮琴鍾山鄉人畢業師範講習所暨汝寧自治講習所創辦吳家店初等小學開本鄉教育之先河民國元年選充縣議會議員二年任國民黨豫南交通部幹事藉辦守望社爲名聯合民衆武力設祕密機關於明港車捐局與黨人閻子固等通聲氣事洩被逮至開封被害年三十

一

二交涉

雞公山外人租地交涉案

雞公山在縣南七十里爲豫鄂界山高約十五里廣略相埒陡峻曲折地僻泉甘中有田畝昔年半爲鄂境東筮店葉姓地半爲信陽張廬陳三姓公地向僅三五居民在內耕作樵採自光緒二十九年九月十五日經信陽美教士李立生費價銀一百五十六兩二錢五分承購鄂人葉接三之隨田山場一區長約二里廣約三里在知州曹毓齡任內投稅建房四所光緒三十年七月汝寧美教士施道格費價銀五百六十二兩五錢復購州人張君仁等五姓公有山嶺一片東西南北約均三里內附水田十一畝在知州徐佐堯任內投稅造屋兩座契內俱未載教堂公產字樣又有鄆城美教士饒裕泰買熊姓山一處周圍約四五畝施道格買吳姓山一處約計十畝施道格轉買袁祖才買自李玉平山坡一處約五六畝約均光緒三十一年夏秋之間交價立約未曾投稅由是購買者日衆三十一年李施兩教士復報經駐漢美國領事親詣遊覽極言山徑深幽泉源甘美氣候清爽適宜避暑且俯臨新店車站扼武勝關之背於南北交通形勢極關重要登諸西文報章並將所買山地除自建避暑廬舍外分段作

價陸續轉賣於洋商教士各地外僑遂紛紛來茲建造所需木料悉取自漢口石則就山鑿取磚瓦則開窯製造工匠則係僱自信陽應山孝感漢口等處日夜建築由二十九年購地起至三十一年止已建有英美法俄日各國洋式房屋二十七處之多寓居外僑統計男女大小約六七十口次第擴充日進無已矣事聞於鄂督張之洞據以入奏政府以失領土罪有司並飭豫鄂督撫交涉收回所買地豫撫張人駿一面責信陽知州曹毓齡徐佐廷於教士買地時並不詳查遽予稅印又未據實稟明實屬異常疏忽奏請一併暫行革職仍飭令隨同妥慎辦理以觀後效一面派委胡藩韓國鈞等先後到山調查實情交涉收回中國方面所持理由以查英約第十一款內開通商口岸皆准英人賃房買屋租地起造禮拜堂醫院等事又美約第十二款內開台衆國民人在通商各港口久居暫住均准其租賃民房或租地自行建造又總理衙門通行章程教士買地建堂其契內載明只可買作教堂公產字樣不得專列教士及奉教人姓名若洋人在內地置買私產與條約不合仍應禁止等語是通商口岸爲各國互市之場洋人遠道來華准其任便置產居住所謂准其在通商口岸置產居住者卽限制通商口岸以外不准外人置買產業也惟教士傳教係

到處通行故內地不通商地方亦准教會置買公產建造教堂於成交之後由地方官蓋印稅契仍不准教會買爲私產信陽雖爲火車衝途仍係內地洋人竟在州境雞公山私買田地建造房屋無論施道格等並非本地教士卽李立生所買之地契內亦未載明公產字樣其爲私產可知始藉教名以購地復售地以圖利既違約章且犯教規遂一方嚴令該山附近各戶不再出售山地於外人一方與外人交涉請其停止建築工程磋商退價還山辦法嗣准英領事覆稱以教士非在本處傳教者不准買地實不知有此項章程又只准建堂一節更不能承認因該教士在內地傳教自應另營住宅安其眷屬前稅契時地方官並未駁阻今則只有飭各教士照契添註公產字樣而已仍極力擴充趕事建築復以重利餌山地所有者私行誘買附近其餘各山地雖經地方官拘押售主數人迫令贖回而地價原資已罄且新增建築費無力計償因之有畏罪而逃者有瘐死獄中者西人利其無證益浮報地價及建築費無算展轉支吾不給贖豫撫張人駿復派候補道許葆蓮赴漢口與美領事據約磋商交涉經二年之久於三十三年冬季始磋商定議將雞公山地基房屋收回另定租屋避暑章程十條（另列於後）由英國駐漢領事官領袖總領事法江漢關

監督齊豫南汝光兵備道吳簽字呈由外務部存案雙方永遠遵守章程大意凡出賣於外人之山地無論已稅未稅一概取消由中國備價贖回在鄂豫兩省界內除教會地外共劃出九百二十三畝作爲外人避暑官地已建築之屋由中國估價贖回仍租於外人避暑此後續有建築必須先將圖式合同送由中國官署核准始乃照圖蓋造成後仍由中國給價收回起租約成隨由鄂督派洋務局提調金世和譚譯官詹貴珊豫撫派徐佐堯曹毓齡前赴雞公山會同勘收釘立界石並辦理估計屋價清理地契各事宜九百二十三畝官地以外不得再有擴充侵佔情弊隨設立工程局司修理屋宇及道路設警察局司保護治安維持秩序夏季設郵局電報局以便交通三十四年三月鄂督趙爾巽爲預防外人越界購地起見將鄂境應山縣屬之雞公山地除教會已購民地曾經稅印有案仍屬教會公產及避暑公地九百二十三畝仍作避暑之用外其餘均由鄂省森林公司置購作爲鄂省森林公司產業禁止民間買賣稅印計收回者共有五十二戶豫境亦援案辦理令知州查明毗連避暑官地各山主共有八戶令其遵領原買之價賣歸公有森林地各戶以原價過廉且又新施建築不肯以賤價出售遲不領價遷延至民國六年一月始重新估

價共一千五百五十串傳各地主分別領價交地書立文約備案仍准租給原主年繳最輕額租金至地面建築物十年內公家允不收回十年外由公家酌估價值給價收回自是避暑官地外之四圍民地遂盡收爲公家森林地永無外人勾引私賣擴界侵佔之虞矣民國七年八月河南交涉署擬定租地章程十一條（另列於後）呈由省長轉咨外交部核准開放雞公山豫界森林官地設租地局經理其事初劃分四區租出殆盡民國十年應教會西人之請復開放北嶺造林地爲五六兩區准教會中人依舊章承租現亦土木大興將與山下之京漢造林場接近矣總計山上所有屬地共分四項一避暑官地二教會地三河南森林地四湖北森林地除湖北森林地尙未開放未有建築物外其餘三項屬地皆已崇樓峻宇一望煥然矣豫界已成官房四十四號起租者有三十號鄂界已造成官房十二號皆起租納稅比例以建築費百分之八爲標準年收租金三千餘元由各租戶納交漢口江漢關監督存儲轉交惟各房歲修之費較所納租金不敷甚鉅豫鄂兩省歲賠不貲當日定約時倘令各租戶自行修造房屋中國不負修造之責僅年收地租則可免除永遠賠累此亦當時慮有未周也前清與外國所辦各交涉尙以此項爲最圓滿最周到者自

今觀之亦失敗多多悔莫及矣茲將山上中西建築物及設立之各機關分述於次

屬於西人者

美國人立之美文學校瑞典人立之瑞華學校信義會之監督辦公處皆西人常駐機關夏季有臨時醫院類似酒館之西商俱樂部類似旅館之客寓就山泉修造之公共浴池

屬於中國者

一警察局 於光緒三十四年七月開辦初由湖北撥巡丁十二名於夏季避暑期內借用四個月期滿即撤回後因修山路建車站造房屋工人複雜須常駐彈壓遂改爲常年駐守局長由湖北警務處委任逐年擴充今已增加長警爲五十五名山上設總所一分所二每月經費八百元春秋二季歸湖北發給夏冬二季歸河南發給

二工程局 宣統二年三月由河南交涉局委張書紳爲該山常駐工程委員職司估工建築各事宜無論何國洋人在避暑官地內建房須於兩個月之前將房圖估單地段號數先行照會該局派員復估工費相符方准建築局中置局長一人書記一人局丁平時十餘名夏季增至

四五十名局長由河南交涉處委任經費隨時增減無定額春秋二季歸湖北發給夏冬二季歸河南發給

三郵政局 初爲夏季郵局後改爲常年二等郵局管新店武勝關二代辦所辦理國際滙兌國際包裹河南辦國際事件之郵局僅開封鄭州焦作雞公山四處

四電報電話局 夏季設置平時裁去自十四師師長靳雲鶚住山常年設有電話局專供該師之用

五頤廬學校 民國十年前陸軍第十四師師長靳雲鶚建別墅於雞公山以養病名曰頤廬嗣以本師官佐子弟失學者衆遂捐資於頤廬左近建築學校招集軍官子弟而教育之卽以頤廬名其校自認校董聘邑人劉景向爲監督擬定章程規畫一切功課十一年八月聘定職教員六人開辦高初小學各一班十二年二月續招高小一班校內各員役薪工雜費及各生衣食等項均由校董擔任十三年二月招考高小插班生二十七名非軍官子弟考取較多每名歲收膳宿服用費洋一百元自此始開兼收民籍學生之例十四年二月擬擴充辦理中學適第十四師奉令裁撤原議未及實施惟小學仍舊進行現有學生三班

常年經費一萬元校長柴清廣亦信陽人

六公益會 民國十年前第十四師師長靳雲鵬養病於雞公山鑒於華人住山者團體渙散公益不舉易爲外人所侵侮提倡組織公益會由住山華人捐資辦理邑人劉景向代爲草定章程大旨以地方自治爲主兼以補助工程局警察局之不逮如建公廁設路燈開井泉開浴池植林木等項辦理頗有成效近復開辦公益學校天足會等山中居民男女咸得沾溉文化不復如昔之兢兢仰承外人鼻息云

七租地局 於民國七年八月設立由河南交涉署委工程局長兼任卽附設於工程局內月支經費一百六十元專司豫界森林地招租事宜雞公山收回基地房屋另議租屋避暑章程十條

案查雞公山鄂豫兩省毗連交界之基地按照圖繪紅綫內共計九百二十三畝有零前由教會向華民購買復經該教會劃分他人避暑茲由兩省將此地基九百二十三畝有零暨山上道路一律收回訂爲兩省官地所有該地無論紅契白契一概作廢其從前原買主不再過問由兩省勘收訂界管業所有租房避暑章程詳列於後由駐漢各國領事一律允照並經轉達駐京欽差照辦鄂豫兩省亦呈請外務部核准

由兩省地方官照會駐漢領袖總領事分移各領事實行

一准令租戶在鄂豫收回地基內蓋造西式房屋連下屋在內以總圖爲憑租爲每年避暑之所或由兩省造成出租或租戶自出己資墊款代造每座丈尺以現造已成之屋爲準

二房屋圖式及訂造合同或帳目清單或已造或未成或立有合同欲造者應由地方官令各租戶一律呈出確憑照造價會同確實估計給價收回如暫時不能盡行購回者亦應將價值估定不拘何時皆可照價購回該租戶務必將房屋照賣地方官買過後如該屋尙未造成卽按照圖式合同趕緊造成仍轉租原租戶居住至擬造之屋必須先將圖式合同呈核如無不合之處卽許其照圖蓋造以上各項租房每年祇出租夏令租價按屋價百分之八納收由兩省發給租據不給執照每年至遲不逾西歷三月初一日預先完租由租戶呈交該管領事官轉交地方官查收如該租戶照此交納自無撤租不令居住之事倘有一次過期未納租銀其房屋應由地方官任便招租並按出租價最大者租給其原租戶不得再有異言

三按照第二條由地方官購回之各房屋仍由地方官自行備資隨時修

理以不致有損壞漏溼爲限其尙未購回之房屋歸租戶自行修理如有改作之處應知照地方官勘明後添入合同如改作不知照地方官並未添入合同則地方官購回時卽不承認

四地方官未按第二條購回之房屋仍由原租戶居住不納租銀如該租戶向他人典賣或轉租或遺給親故均應先行知照地方官更名註冊仍須認明第二條所許地方官以原價購買之權如典賣有加價之處地方官購回時概不照加凡地方官所擬買之房無論何時該租戶不得不允賣地方官未擬買之房無論何時該租戶亦不能強賣

五租房祇作避暑不作別用每年以夏令爲限所設警察局亦祇於夏令開辦如租戶中有患病未能大痊者領有醫生證明書亦可居住調養但須由領事隨時知照地方官查照病愈卽不居住

六凡在避暑地內居住者不得開礦不許開設行棧亦不准爲各種貿易至於零賣食物日需雜貨麵包宰戶各店只准華民開設

七警察及各項治安公舉歸中國地方辦理租住雞公山之各國人不得有自治之權力凡衛生街燈清道修路市集家用淨水等事得由各租戶公舉代表呈請地方官妥籌辦理以上各種公費每年仍令居住各

戶按實納租銀十分之一完納公益統捐但由各租戶所抽捐之總數不得過每年警察及各種公費四分之三其一分由兩省自備以抵付收地之價

八房屋內所備傢具歸各租戶保守修理其不住之時看守傢具什物等事許各租戶派華人看守如有損失專歸租戶本己之責任但行李什物傢具及修造各種物料由車站挑至避暑之地方地方官自應爲相當之防衛以免留難阻滯

九凡居避暑地內無論何國人抑或教會內之人均應預行呈請領有遊歷護照並應遵照此次所訂章程辦理

十此次租屋避暑係專指雞公山特准此次九百二十三畝之限而言日後無論何處均不得再有藉口援案辦理九百二十三畝之外各租戶亦均不得再在雞公山擴買地基

再鄂豫兩省雞公山基地除九百二十三畝有零因教會轉賣他人由兩省收回定爲官地外尚有基地三百四十七畝一並繪入圖內因其實爲教會公產並未轉賣茲訂爲查抄印契仍歸教會公產執業如圖綫與印契不符自應查明印契以定地址又此項教會公產不得轉賣

洋商洋商亦不得在該教會公產內建屋避暑該教會公產應遵守教會公產章程不得稍有違背及轆轤等事合並聲明永遠存照

再原圖避暑地九百二十三畝有零茲經覆勘內有八百十畝零係收回教會印契之地其一百十三畝係收回洋商白契之地均一律收回仍照草議條款作為避暑官地並照第十條扣足九百二十三畝之限不再擴充應將收回教會之地及收回洋商之地分綫繪圖至教會公產覆勘時查有內地會印契公產亦在雞公山之內合成前數共計教會並未轉賣之地四百九十八畝有零合並聲明

大英欽命駐劄漢口管理通商事務總領事官領袖總領事法

大清欽命二品頂戴湖北荊宜道調署漢黃德道江漢關監督齊

大清欽命鹽運使銜河南南汝光兵備道吳

河南雞公山租地章程

第一條 雞公山河南官地茲劃出一部分區分地段編列號數招本國人承租為建屋避暑之用特設租地局管理之

第二條 如有承租地畝之戶須將姓名籍貫職業及擬租某號地段佔地若干方丈赴局報告經局員勘明照章完納押租一次由河南交涉

公署發給用印執照方許管業建屋如逾法定時間尙未繳租者卽招他人承租設同一地而有兩姓報租者應儘先報之戶承租

第三條 此項地畝按照工部營造尺計算租地每見方一丈納押租銀圓五角各按佔地大小丈量核算應收若干於承租執照內填明應於勘明後一個月內赴局繳納

第四條 此項地畝每年須捐歲租一次計分二等可建避暑房屋及商店者爲上等每見方一丈納歲租銀圓四角可建工人居屋爲下等每見方一丈納歲租銀一角無論建屋與否一律於每年七八兩月內照數完繳由河南交涉公署刊發三聯租照正照掣給租戶副照繳河南交涉公署存根留局備查

第五條 未設租地局以前有業經佔地建屋者無論已否報明有案應赴局報領執照章繳納各租違者拆屋還地另招租戶承租

第六條 報租各戶由局員覆勘觀察地勢寬留穿花路徑定闢一丈二尺以免防礙交通

第七條 承租之地如有轉租者應報局核明註冊換給租照並繳納註冊費銀圓一圓不得私相授受致滋流弊

第八條 凡界內關於公益事宜如修路種樹建置公園球場菜場路燈等事得酌收公益捐俟將來察看情形再行酌量辦理

第九條 界內除本國人租地建房遵章報租外另於教會界鄰近之地指定地段一處如有各國教會願在該地段內租作教會公產建屋避暑者亦得酌量給租其報租手續及應納押租暨公益捐均與本國人一律歲租得酌予核減以示優待惟所減之數至多不得逾總數五分之一

第十條 界內地畝如本國人或外國教士有將所建之屋轉租洋商店住者查出勒令退租並將原租戶酌予科罰其有出面濫租與洋商營業者一經查出其冒租之地應卽作廢已完各租概不退還或有已蓋屋者按照時價由局召買以所得價值給還原租戶並酌予懲罰其地卽由購屋本人按章繼續承租以清界限

第十一條 之章按自奉河南省長批准後公布之日施行如有未盡事宜由局呈明河南省交涉署隨時修正呈請河南省長核准遵守

天主堂侵佔北關外城濠交涉案

民國十二年袁俊伯將所購信陽華提庵廟產北關外頭二道橋中間高

地一段贈與天主堂

當時書內載有總字係邑人李煥卿代筆

其秋天天主堂

又於該地基以西勾買宋玉衡園地一處其南界直侵佔至城濠中心查信陽城濠深一丈三尺闊六丈五尺載在圖書集成職方典信陽城池考而教堂購地必須遵我國法用教堂官契紙將契據送縣驗看由縣實地勘丈查無糾葛方准印稅抄中聯送交涉署查核備案方爲有效乃該堂私購園地事前概未呈請地方查驗勘丈又不遵用教堂契紙徑於十三年動工建築侵佔城濠中心殊屬違背約章妨我國權當經地方士紳鄭彥沖劉少山薛溫伯陳味琴等呈請縣署交涉事經多年迄今尙未澈底解決茲將當時辦理交涉文件撮登於後幸留心地方者覽焉

外交部交涉署訓令

令雞公山警察隊友

案據信陽縣知事呈稱案查縣屬天

主堂前因建築北關牆基侵佔公地經邑紳鄭彥沖等呈請嚴重交涉以保公產等情當經知事勸令該教堂暫行停工並將情形電呈鈞署在案旋奉指令箇電已悉查此案該堂總鐸來維同時亦有函到署已屬將此地契據送縣驗看以便依據履勘矣仰卽查明當此地過戶時是否經縣查無糾葛用教堂官契紙印稅抄送中聯過署備案在案並卽按照契據悉心履勘秉公辦理具報所請派委著勿庸議抄發該總

鐸來函一併知照可也此令等因奉此當經函致該堂將此地契據送縣驗看以憑依據履勘嗣據該堂送到契據一紙查驗係屬草契並非遵用教堂官契成約時並未請縣勘查有無糾葛亦未照章過戶投稅顯與約章不符此項草約當然不生效力隨經知事將草約送還該堂令其按照約章辦理迄今多日該堂法總鐸竟置不理亦不遵照約章拆去牆基應如何辦理之處理合照抄該教堂草契一紙呈請鈞署鑒核賜示祇遵再查契內所註南以河心爲界此河確係縣城北關城河保障城垣全屬公地未便任其侵佔附呈照抄草約一紙等情據此查此案奉省令遴派委員會縣查勘卽今委派該員就近馳往會勘明確具報在案茲據前情除據情函致該堂法總鐸查照一俟該員到縣務與按照約章和平接洽外合亟照抄草約一紙令仰該員卽便查照先今令開事理一併按約秉公會同查勘務將該堂購買此地是否確係並未報縣查無糾葛另有教堂官契紙印契存執抑僅係憑草約一紙一併查明具報以憑核辦勿延切切此令附抄草約一紙十三年七月二十二日

照抄草約 立賣園地約字人宋玉衡因債難楚兄弟好作商議親自

請託中人

李樹文 宋玉坤 王同仁 宋玉全 宋玉圭 宋玉林 等願將祖遺

園地一處坐落北關外宣賢坊大馬路西首園地一處共計八斗莊房草屋七間稅銀四分水井糞地樹木一併賣與本處信陽縣天主堂永遠爲業其有界限東以買主爲界南以河中心爲界西屋以滴水爲界北以河坎底爲界四界分明園地價金洋七百四十元同中交足親領無欠自賣之後永無異說如有異說賣主與中人一面承擔恐後無憑立賣園地約爲證代筆宋玉清民國十二年舊歷七月二十六日立

外交部河南交涉署委任令

第一號

令雞公山警察委員歐陽友焱案奉省

長訓令開案據信陽縣知事宋祖鐸箇日代電稱案據邑紳鄭彥沖劉少山等十四人聯名呈稱天主堂在北關外城濠內建築牆基侵佔公地請嚴重交涉以保公產等情當經知事履勘屬實隨請該教堂法教鐸到縣令將買地契約呈驗聽候查丈明確再行建築詎教鐸不允呈驗契約任意建築不以理論以致該紳等公憤難平幾欲強行抵制知事恐起交涉力爲勸阻當令該教鐸暫行停工候呈請上憲委員來縣會同勘明再行解決該教鐸始悻悻而去查教堂置買地基設施建築必須按約丈明方符約章今該教鐸不呈契約不候查丈硬行建築無

理可喻現時雖經知事勸阻暫行停工惟必須按約辦理免起意外交涉合無仰懇迅賜委員來縣會同勘辦等情據此合行令仰該特派員迅即查核約章遴委妥員前赴該縣會同勘查明確擬辦呈復核奪此令等因奉此查此案前據該縣知事分電陳報並據該堂總鐸法來維來函內稱該地係由該堂價買請迅予保護等語本署當以此案關鍵在於契據自應以驗看契據實地履勘爲解決此案辦法即經一面函復該教鐸屬令將該地據送縣驗勘一面指令該縣按照契據悉心履勘並查明該地過戶時曾否經縣查無糾葛秉公辦理具報各在案茲奉前因合亟令委該員尅日前赴信陽縣會同該縣知事查勘明確詳實具復以憑議擬辦法轉呈核奪仰即遵照此令民十三年七月十八日交涉員李心靈計抄發信陽天主堂總鐸法來維原函一件

信陽天主堂法來維致河南交涉署函

六月二日

敬啓者前覆一緘諒已鑒

察茲因袁大人將信陽北關自己宅基一段獻與敝堂業已有年南北界均以河中心爲准及去歲秋經回國之王司鐸又買民宅一份與袁宅連界南北界亦至河心去年醫院司事薛溫伯欲將醫院門外敝宅換去若干敝堂亦允許伊因未擇有他項地點遂作罷論因此伊甚忿

恨屢用毒計伊胞弟薛紹文係商會會長今因四月伊著胞弟邀同合
城董事在信陽生事在商會開會議定以後無論何人不能以宅基價
賣敵堂及四月底因敵宅北首與醫院相接處亦係河道亦以河中心
爲界伊僱工多人先將河北低岸築墊極高然後又於敵宅東北隅下
將河堵截且使工人掘用敵宅之上意在水不東流北高南低大水之
際勢向南溢出淹沒敵宅陰謀害人顯然可見現敵於袁宅南首河涯
間多工修牆當亦無人攔阻及根基業已修起距宅界河心尙有數尺
伊不思情理遂又串通本城董事劉樹棠孫玉亭許子昌蔡竹賢等極
力阻擋非著敵罷工不休並著警察局長李兆榮將上年以宅賣敵之
宋某抓至局內問何爲賣給敵堂宅基且惡言百出送縣管押更議敵
如不依有前帶鹽務隊之首事一人敵當等情敵思從來自置產業必
有自主之權此一定理今敵憑中價買宅基修築牆壁又在宅界以內
反被多人指責不能自專係何緣由令人難解且敵教傳行中國由來
久矣文武機關例應保護載在約章今該縣知事不惟不照例保護反
聽薛某一人之言附同挫折居心安在實難揣測況敵於初動工時彼
等果與函商敵看其情面情願將牆再往內移而彼等於動工之際絕

不過問惟俟動工數日根基修起始行阻擋非有意使敵傷其顏面乎且敵來至信陽爲時未久雖無善事可舉亦無惡迹可述彼等竟如此對待是何意見要之彼等雖無故反對無非因均權勢敵獨自一人權勢雖絕明知橫逆亦無可奈何爲此祈大人鼎力周旋迅予保護使敵產業能以自主敵教不至消滅則敵感德無暨矣特此敬懇卽請助安地方士紳呈歐陽委員文 爲公懇據約力爭以保主權而安輿情事頃奉貴委員來申查辦天主堂地皮交涉一案應候解決無煩惟謹查約章凡教堂置買房地應用教堂官契紙送官廳勘丈查無糾葛始准印稅抄中聯送交涉署備案方稱有效今該堂所呈草約二紙事前概未呈明官廳勘丈更未遵用教堂契紙報稅遽然興工建築殊屬顯背約章況該地址距城垣甚近於濠塹城基民居均有妨礙亦與約章不符是該堂所買房地草約當然無效紳等亦決難承認爲此公懇貴委員根據約章嚴重交涉取消該堂草約以保公產而安輿情不勝屏營待命之至謹呈歐陽委員列名者蔡竹賢王子謨易宣三萬子明劉少山劉乃箱姚少勤劉竹溪王占三李禹門劉樹棠彭鶴山潘魯青李波臣陳壽山陳味琴陳岐山張明山李煥卿薛溫伯路兩蒼嚴品武薛紹文

龔傑臣鄭彥沖劉懿軒馬潤卿李勳臣李海樓龐華堂杜聘卿王泳春

陳敬宜龐南溪

宋知事祖瑛致歐陽委員函 伯承仁兄大人偉鑒頃接惠函祇悉種種切查天主堂侵佔官地一案執事奉委來縣會同查勘呈覆要點重在辦理情形現在地方紳民均不承認將此地賣與天主堂爲業非按約章撤消草約不可若照執事與天主堂法總鐸接洽情形會呈恐紳民等皆不認可鄙意擬請執事擬稿先將如何辦理情形單銜具覆請示俟奉指令弟當遵令辦理似較妥協專覆祇請公安

信陽公款局致歐陽委員函 敬啓者頃聞貴委員來申查辦天主地皮一案各界無任歡迎謹查外國人在內地置產須遵約章一定手續而該堂事前概未遵照約章呈明官廳先行查勘且該段地址距城甚近又於濠塹民居均有妨礙遽然興工建築殊屬違背約章紳等決難承認敬懇貴委員嚴重交涉根本解決以保主權而安輿情此請公安統希亮照劉旭棠劉竹溪李波臣鄭彥沖李海樓劉少山龐南溪王泳春蔡竹賢路兩蒼王月峯杜聘卿陳味琴李勳臣王心齋

歐陽委員覆宋知事函 鼎臣先生台鑒前奉惠函敬悉種切天主堂侵

估城濠前此履勘時已會同台端當場宣佈草約無效須由貴署重行丈量查無糾葛方能稅契至貴邑紳民不承認將此地買與天主堂管業此項交涉似非短促時間所能解決刻下已將一切情形遵示單銜具復請示辦理茲將原稿抄寄卽希察案並乞轉告蔡李諸公爲荷專此敬請公安附抄原呈稿一紙

歐陽委員稟交涉署函 敬稟者 委員 昨日辭後於下午七句鐘抵信陽

比卽馳往天主堂與法司鐸來維略開談判據理交涉後隨赴縣署晤宋知事薛院長詳詢一切並驗明該堂呈繳草約本日午前九時 委員 會同宋知事傳集賣主宋玉衡等到並邀法司鐸眼同勘明該堂所築基牆實係侵佔城河官地委員申明該堂不應於河心建築牆垣草約應作無效法司鐸自知理屈諉咎於賣主 委員 當場會同宋知事勒令賣主宋玉衡將河心所築牆基卽日拆去照正常手續由縣署重行丈量查無糾葛方能稅契以符約章並向法司鐸切實開導詳加解釋法司鐸俯首無詞當面認錯依法解決除會同宋知事報明河南交涉署員轉呈省長銷案外理合稟報

歐陽委員再稟交涉署函 敬稟者竊 委員 日前赴信陽查勘案件業經函

稟在案已於八月回山所有天主堂侵佔城濠官地查係賣主宋玉衡草約上不應載明抵河心爲界現已勒令宋玉衡將河心所築牆基即日拆去草約應作無效由縣長重行丈量查無糾葛方能投稅並向法司鐸切實開導該司鐸亦頗能領悟除將詳細情形會同宋知事另文呈覆外知關慈廬合先稟聞

歐陽委員呈覆交涉署文 爲呈覆事案奉鈞署第三十一號訓令內開案奉省長訓令內開案據信陽縣知事宋祖瑛簡日代電云云至轉呈核奪等因並抄發信陽天主堂總鐸法來維原函一件奉此 委員正擬起程又奉到鈞署令開案據信陽縣知事呈稱案查縣屬天主堂前因建築北關牆基侵佔公地云云至一併查明具報以憑核辦並附抄草約一紙奉此 委員遵卽於本月六日馳抵信陽旋往天主堂與法司鐸來維略開談判據理交涉隨晤宋知事詳詢一切並驗明該堂呈繳草約卽於八日午前九時會同宋知事傳集賣主宋玉衡等並邀法司鐸眼同勘明該堂所築牆基實係侵佔城河官地 委員當場申明該堂不應於河心建築牆垣草約應作無效法司鐸自知理屈諉咎於賣主 委員當卽會同宋知事勒令賣主宋玉衡將河心新建築卽日拆毀照正

當手續由縣署重行丈量查無糾葛方能稅契以符約章並向法司鐸切實開導詳加解釋法司鐸業已依議辦理此委員當日會同宋知事履勘交涉之大概情形也惟頃接信陽紳商學界蔡王等公呈暨宋知事函稱該邑紳民現不承認將此地賣與天主堂爲業誓非照約章撤銷草契不可囑委員單獨呈覆請示辦理等情委員查各國教士在內地買置產業本爲約法所許惟該堂所買宋姓之地既未報明縣署丈量又未執有官契紙印契業經委員會同宋知事宣佈取消草約所築牆基亦令拆毀是委員奉令會勘該堂侵佔城濠官地一案業已完全解決至該邑紳民堅不承認將此地賣與天主堂管業是此應該紳等訴明理由呈請縣署秉公辦理理合將會勘情形據實呈覆署長俯賜察核批示祇遵謹呈

外交部河南交涉署指令歐陽委員

第一五四號

五呈報遵令會同信陽縣知事

勘驗天主堂在城濠築牆實佔河心情形據呈會勘情形已悉查此案現在尙有糾葛未能遽予結案已由本署令行信陽縣查明具覆一俟該縣復到如有復查之必要再當令知該員辦理茲將行縣令文抄發閱看仰卽知照此令計抄件十三年九月三日

照抄令信陽縣知事文 查該縣天主堂在北關外建築牆基發生爭執一案前經本署令派雞公山警察委員歐陽友焱馳往會同該縣知事查勘具報去後茲據呈覆內稱會同勘明該堂所築牆基實係侵佔城濠官地所買宋姓之地既未報明縣署丈量又未執有官紙印契即經議定草約應作無效並勒令賣主宋玉衡將河心所築牆基即日拆毀由縣署重行丈量查無糾葛方能稅契並向法司鐸開導解釋業已依議完案以資了結惟查本署前據該縣公款局長王正身等代電內有該堂所訂草約決難承認之語又據法司鐸來函亦有該地紳董不但謂該堂不宜買宋姓宅基且言與該宅連界袁姓所贈之宅亦不能歸教堂管業等語是此案尚有糾葛礙難卽予結案查教堂得在內地置產載在約章該地紳董反對該堂置產所具理由如果正當自可據理交涉加以拒駁倘無正當理由亦不得故意阻撓轉滋外人口實合亟照錄法司鐸來維原函暨公款局長王正身等原電令行該縣知事仰卽詳細查明擬具辦法呈候核奪轉呈省長核示案待解決毋得延違切切此令此令到後未幾地方發生變故連年擾亂地方人士不暇及此該天主堂以金錢運動某奸民於更換稅契局長時代爲投契

縣府所有歷次交涉卷宗經十六年政變概付一炬以致延擱至今遂成懸案迨至二十二年有黃殿試者公然在北門外城濠界限以內建築房屋經保管城池委員會出而清理據殿試云因在天主堂充當廚役由天主堂手價買委員會隨函縣飭令殿試到會認租以維主權嗣因殿試逃走遂將此事擱置按信陽城濠深闊載在官書無論何人不得強行侵佔徒以國勢積弱外人狡焉思啓攘我主權地方官紳未可聽其長此竊據不亟思挽回之策也

天主堂教徒奚潤身購買北關鎮中山大街民戶房地交涉案

民國二十一年五月天主堂教徒奚潤身出名購買北關鎮中山大街住戶張礪齋市房一所及余名聲余陳氏園地一段天主堂於次年六月在該地內建築屋宇經本城區保長呈縣交涉至今尚未解決今將當時區保呈文暨省政府民政廳稅契經理處縣政府往來文牘節要抄錄如下可以見該案之真相

城第一區區長路恩霖呈文 呈爲轉呈事案據聯保主任楊述堂保長胡華堂朱子玉黃南山甲長盧心宜等呈稱呈爲代購市房改建教堂妨害商務公懇查究以維地方事緣北關鎮中山大街商務繁盛之處

有住戶張礪齋市房一所余名聲余隨氏園地一段於去歲五月由天主堂教徒奚潤身出名勾通陳翰芬作中用重資代爲該教堂謀買拓大教堂屋宇今已開始建築該房壅塞市面阻礙商業交通對於近今商務發展不無妨害並勾買逼近城隍園地一段界內有公廁所一處亦被買佔尤屬破壞公益查曩時國府卽令購買地址亦必須無礙民居無礙商業交通方許購買現北城地點已被其買佔五分之一若長此聽其購買則北城全鎮恐終不爲我地方人民有矣公懇區長鑒核轉縣傳集買主賣主及中人等到案查究嚴行制止等情據此轉呈鈞府核辦謹呈信陽縣長周奉批呈悉據稱各節顯與定章違背候分別呈函民政廳及天主堂指示補救方法停止建築工作並傳集一千訊明以資解決可也民國二十二年六月

信陽縣政府致天主堂函 徑啓者案據 縣第一區公民呈稱 中略恐

終不爲我地方人民有矣等情據此查 國民十七年六月十一日 國內政外交兩部公佈之內地外國教會租用土地房屋暫行章程 第三條內載外國教會在內地租用土地建造或租買房屋須由業主 與教會會同呈報該管官署核准其契約方爲有效等語此次貴堂購

買張礪齋房屋事前未履行此項規定而建築房屋又與市面商業交通有礙敵政府核閱之下殊深遺憾除呈請河南省政府民政廳指示辦法並傳集買主賣主及中證訊奪外相應函請貴堂查照暫行停止建築工作以俟解決而符法令爲盼此致信陽天主堂民國二十二年七月

信陽縣政府呈河南民政廳文 呈爲呈請示遵事案據信陽縣第一區區長路恩霖呈稱呈爲轉呈事云 云謹呈等情據此查內地外國教會租用土地房屋暫行章程第三條內載有外國教會在內地建造或租賃房屋須由業主與教會呈報該管官署核准其契約方爲有效等規定茲買主奚潤身賣主張礪齋買賣該市房未據呈報到府顯與上述規定相背並經派員調查該天主堂此次所建房屋面積實屬不小與原呈所述妨礙市場情形亦相符合現在既已興工向之交涉恐未必接受而中止除函請該堂停止工作並傳集買主賣主及中證一千到庭訊奪外究應如何辦理並可否移送法院理合備文呈請鈞廳俯賜鑒核指令祇遵謹呈河南民政廳廳長李民國二十二年七月五日

第一區區長路恩霖第二次呈文

意同前呈

按此呈在紳商學各界開會議決後

縣政府第二次呈河南民政廳文 爲呈請事案查信陽天主堂在城內購地築房並未將契約呈准與外國教會租用土地房屋暫行章程不合各情形業經呈請鈞廳核示尙未奉到指令縣長當一面函知該堂停止建築一面傳集買主奚潤身余陳氏訊問據奚潤身供稱在天主堂當教員前在山東時欠天主堂款項七千元今將所買張礪齋市房及余陳氏菜園一併抵與天主堂了約內定二十年爲滿方可贖回我不知法律所以並沒呈請備案今若不能將國土私抵外人我向天主堂另籌辦法等情又訊據余陳氏供稱我將菜園賣與奚潤身不知奚潤身是天主堂的人復經調閱該堂抵債字據與奚潤身所供大致相同查奚潤身係一教員何致虧欠天主堂款項七千之多且奚潤身既欠鉅款未償何有餘款又買他人房屋菜園其中顯有架名代買嫌疑況抵借時又不呈請備案尤與定章不合所有訊明此案詳情理合照抄租約底稿呈請鈞廳鑒核究應如何辦理俯賜訓示祇遵謹呈河南民政廳廳長李

此呈在傳訊買主賣主之後

縣政府對於賣主狀詞之批示 狀悉奚潤身架名買房轉租於天主堂無論爾是否通情聯保主任區長爲保全國土計當然有追究之責爾

不來府對質卽徑行上訴復請求傳究聯保主任區長等殊屬狂謬已極不准並斥仍候核辦可也此批

時賣主呈省政府民政廳縣政府請傳訊楊述堂等故縣府有此批

河南民政廳對於縣政府呈文之指令 呈悉所稱各節辦理甚是仰仍

遵照本廳第一零六號訓令辦理並將辦理情形隨時核報爲要此令

信陽縣政府呈復河南民政廳呈文 時商會據賣主狀詞轉呈民政廳

廳據以令縣縣政府呈復云爲呈復事案奉鈞廳訓令第七七四號內開爲令飭事云云此令計抄發原呈一件等因奉此查奚潤身本天主

堂教員並非有餘之家買房後卽暫租於天主堂名爲租押實與絕賣

無異立約前並未呈請本府核准卽擬建築聯保主任楊述堂爲保守

國土計呈請傳究乃其職責豈因挾嫌報復而起該商張礪齋與奚潤

身住在同城豈不知奚潤身無買房資格退一步言縱云不知奚潤身

係架名買房亦應候本府傳訊乃竟不來報案質訊遽爾呈請商會越

級呈訴未知是何居心此案前已呈請鈞廳核示在案正在分別審理

交涉中所有此案詳細情形理合具文呈復鈞廳鑒核謹呈河南民政

廳廳長李民國二十二年八月十九日

信陽縣政府呈復河南省政府呈文 時省政府據商會轉呈賣主狀詞

轉令到縣縣政府復呈復省政府文與前呈民政廳文同

信陽縣政府令區長轉飭保甲長等保護天主堂候本府依法辦理

河南民政廳第三七四三之指令 呈督附件均悉查此案前據該縣長

呈報到廳當經指令在案茲又據來呈仰即遵照民國二十一年河南

省政府第二一三號通令頒發之內地外國教會租用土地房屋暫行

章程及外國教會土地房屋契約應強制載明必要事項四種辦法嚴

格執行並將辦理情形隨時報核此令附件存民二十二年八月十九

日

天主堂致縣政府之函 逕啓者教士傳教貴國全賴各該管官廳保護

貴縣長素日與教士情感甚篤諸事維護至爲周到銘感之至乃近有

不肖之徒張喜係一竹工一隻眼等倡首事事要與教士爲難阻止脚

行不教與敝堂運用物品禁止柴販賣與敝堂柴火彼之用意是要封

鎖敝堂困死教士望貴縣長營救者一敝堂北院老牆朽壞不堪風雨

今拆去重換新牆於理法本無不合不意信陽縣黨部訓令建築工會

數日來屢屢阻撓擾亂該工人不令與敝堂做工今日上午有張喜竹

工何得金木工許少臣竹工楊友桂木工及建築工會職員金某及許

新周等率領數十人來勢凶猛將泥工蘇師傅撈去工會至今未放又亂搶各種材料器物馮士修德籍去護東西致左膀受傷現有瘡痕傅司鐸美籍去與說理亦招拳打並無理謾罵難堪已極似此張喜等越法胡行竟欲置教士於死地教士無力自保惟望貴縣長鼎力維護者二若貴縣長無力保護教士祇可自求德美領事保護想貴縣長必有辦法無須多事麻煩去歲中央政府有命令禁止各地黨部干涉縣政府行政今該黨部竟明令建築工會來抓工人事前是否得到貴縣長許可抑或該黨部有此權力還望賜教此案請縣長迅予設法辦理能於二十八日前了結較爲完善此致信陽縣長周教士倪體仁啓八月二十四縣府得信後一面致函縣黨部聲明天主堂係修理舊房舊牆並非另蓋新屋請轉飭工會照常修理一面令建築工會遵照並函覆天主堂已飭工會釋放撈去工人嗣後需用工匠除在新租地皮案件未解決以前暫緩建築外其舊界內建築仍照常工作乃次日天主堂復函縣府曉曉不休聲言縣長若不積極保護嚴懲主使教士祇可自求護救或遷離信陽云云先是奚潤身既買該市房卽投契稅局稅契楊述堂聞知赴局請扣留並用公函阻止該局漫諾之卒爲稅印發

還楊述堂卽呈縣黨部電省黨部轉函教育廳嚴懲稅契經理局局長王迺鑫並分令建築搬運各工會卽時停工該處工作適建築工會以工友陳德三江金友抗捐凶橫請黨務指導員傳案法辦而德三等遠颺乃逮其工伙蘇合泰於天主堂之工場天主堂遂發生誤會公理不能敵強權信哉

開封省政府宥電 信陽周縣長覽頃准漢口美德兩總領事有電以據報該縣居民受人煽惑攻襲天主教堂請速電飭迅爲有效措施對教士生命財產注意保護暨美教士傅相讓身墜受傷並請拿辦暴徒各等由特電遵照迅速會同駐軍分別切實保護並將肇事者查明究辦具報爲要河南省政府宥印

信陽縣政府快郵代電 開封省政府主席劉鈞鑒有電敬悉查有教民奚潤身者於本年五月間承買張姓余姓城內市房菜園兩處價洋六千餘元於七月間私抵於天主堂正動工改建間事被該處聯保主任查知呈請傳究到府當卽傳奚潤身庭訊據稱前欠天主堂洋七千元已將已產抵押與天主堂今又將所買張余兩姓房地抵押與天主堂二十年爲期立有約據我不知法律並沒呈請備案我有錯處若不准

將國土私抵外人我向天主堂另籌辦法等語當又檢閱約據字義亦多不合查奚潤身既欠天主堂鉅款何來鉅款置產既有款置產卽不應五月買入七月又行抵出且不遵章呈請核准卽行建築其爲架名勾買毫無疑義且與內地外國教會租用土地房屋暫行章程第三條之規定亦有不合當卽一面呈請民政廳指示補救方法一面函天主堂停止建築聽候解決天主堂旋即停工嗣因天主堂又雇工修理舊牆建築工會因會奉有縣黨部停止該堂工作訓令適又因工友陳德三江金友等違犯會章遂派人到天主堂將工人抓去二名此係建築工會管理工友工友不服稍有紛爭並非有意向天主堂滋鬧該教堂所稱居民攻襲教堂實出誤會亦未免張大其詞工人既去紛爭立息事未二日仍令工會照舊修理天主堂現已相安無事縣長除親往該堂解釋誤會並分別函令縣黨部建築工會及保長等聽候依法解決暨派警妥爲保護外所有此案經過情形理合先行電復鑒核信陽縣縣長周炳昌印儉此電到後開封省政府覆電云周縣長覽儉電信悉查來文聲敘不明無法核辦究竟真相如何仰速電復爲要河南省政

信陽縣政府佈告 爲佈告事照得奚潤身架買房屋抵押與天主堂一案已由本府呈請省政府核示並由河南教育廳派委來縣調查自有妥善處置各界民衆應候政府依法解決如有無知棍徒假借名義滋生事端定予查拿究辦切切此佈

河南教育款產管理處訓令 爲令行事案據該縣北關鎮聯保主任楊述堂等以天主堂勾買房地契稅局長溺職違法等情呈控到處查外國教會租用土地房屋暫行章程早經轉奉明令通飭遵辦在案據稱奚潤身架名代天主堂購買房地如果屬實自應由縣依據前項暫行章程嚴厲執行並遵照省政府轉奉行政院第三三三九號令開辦法斟酌情形妥慎辦理以符章令而示制裁至該縣契稅局長如果溺職違法亦澈查明確以憑究辦除郵呈例不批示並委杜蔭南前往會查外合行抄發原呈仰該縣長即便協助委員查明呈復此令

河南省政府訓令 准駐漢美總領事署以信陽天主堂被暴徒攻擊傷及美國人一案請再飭拿辦犯事之人等由令即依法核辦具報
信陽縣契稅經理局致函縣政府 徑啓者案查二十二年五月間奚潤身買張礪齋市房一所價洋五千元又買余名聲余陳氏園地一處價

洋一千八百元當經本局視同普通業戶既無人聲阻於前自應准其照章報稅惟事後據第一區北關鎮聯保主任楊述堂函稱該鎮花戶奚潤身原籍山東來信暫居遵用超過時價半數之重資置買張礪齋市房一所及余名聲余陳氏園地一處其中似有特別作用致起保甲長及民衆惶惑羣向該處質問查該奚潤身刻雖編入戶籍而地方對於其人來歷尚不清楚伊用此重資購買房地其有無特殊情形未能確認等語囑將該契約扣留俟調查明悉果無特別作用不礙地方再准予取還等因准此正調查間復奉河南教育款產管理處據楊述堂等聯名呈同前由派杜委員蔭南來信調查事已經年究竟奚潤身購買房地有無特殊情形該案如何終結無從查悉貴府有案可稽茲據奚潤身於本年二月二十七日又以買余陳氏余名聲地址一段價洋五百六十元買契一張來局投稅除將該買契及應納稅款暫爲扣留不予印發外前案攸關相應函請貴政府查照能否准予印稅之處希卽連同前案終結各情一並賜覆此致信陽縣政府局長王迺鑫二十三年三月一日縣府於五日函覆案准貴局函開奚潤身買張礪齋等市房園地等項現時能否准予印稅之處囑卽連同前案終結各情一

併賜覆等因准此查此案本府正在偵察中所有契約暫緩稅契准函前因相應函復貴局查照縣長方

第一區區區長文 呈爲據情再請鑒核事案查前據北關鎮聯保主任楊述堂暨保甲長等聯名呈稱天主堂勾通教徒奚潤身及中人陳翰芬等以重資謀買中山大街張礪齋市房及教育局後街余名聲余陳氏園地草房拓大教堂屋宇妨礙交通破壞公益公懇轉請查究嚴行制止等情當經據情轉呈核辦在案八月二日復經紳商學各界會議僉以外籍教士傳教內地需用房地只准租賃載在約章列有一定限制本年並經政府明令嚴禁人民私將房地轉售於外人以保主權且近歲北城地點已被天主堂買佔五分之一今復違背約章勾通教徒大肆謀買長此以往勢必無所底止若不嚴加制裁則妨礙民居交通影響猶小而喪失地方土地主權所關實大當經一致議決呈請鈞府據情轉呈民政廳交涉制止以維土地主權並立予票傳賣主張礪齋余名聲余陳氏及中人陳翰芬李子炎邱炳蘭余蘭軒吳本良蔡玉珍與該教徒奚潤身等到案嚴加懲辦杜絕將來而昭炯戒等情復經據情轉呈業經周前縣長分別傳訊各在卷嗣於八月二十五日奉鈞府

訓令內開爲令違事查奚潤身架買市房轉租與天主堂一案本府正在依法辦理仰卽轉飭該處聯保主任保甲長等關於該教堂應切實保護如有無知愚民借端生事著卽妥爲制止至奚潤身一案應候本府解決不得自由行動致釀重大交涉而傷邦交切切此令等因奉此遵卽轉令北關鎮聯保主任招集各保甲長切實諭知靜候依法辦理惟此案至今歷時數月迄未解決羣情惶惑倍深疑慮迨周前縣長調任後此案遂無形擱置幸逢鈞座蒞任關懷民瘼軫念地方無微不至且事關地方土地主權所有天主堂勾買北關房地一案情形理合據情再請鑒核俯賜查案轉請迅予制止並依法懲辦以戒將來而維地方公德兩便謹呈信陽縣縣長方二十二年十月

三災變

戊戌平糶

清光緒二十四年正月大雪時承平久民間狃於豐樂驟覺祁寒不支鄉間薪米隔絕不入城市貧民無積貯至有凍餓死者慈善家煮粥散棉放春賑儼然有凶荒之象嗣是兩暘不時富戶屯糧自備閉門退糶迨麥秋歉收米每升七斤有半價由八十錢漲至一百四十中家亦取荆葉雜米煮食鄉間有糾衆奪富室倉穀者羣情大震南汝光道朱壽鏞亟飭有司捕糾衆劫糧之陳世縉下獄世縉邑之名諸生壽鏞素賞其文者也是鄉民咸畏法雖饑不敢暴動壽鏞督同知州饒拜颺親出勸導城內富戶糶米弭變以自全且徵發城鄉富家倉穀糶米集於城隍廟平糶每升定價百六十錢間三日一糶糶者人以一升爲限中家以下爭趨恐後婦女或被擠墮胎乃更分設女平糶所於三屬公館並令各米坊平價糶米補官辦之不逮未幾湘米應機輸至秋稻亦豐登斗米價僅千錢當平糶時人衆之家婦孺分途糶米每次積得五六升食之不盡至新穀既升仍有食平糶時糶存餘米者蓋其時鐵路未通運輸不便農時偶乖輒皇皇有饑荒之憂然救生之術惟有減食節糧或以樹皮野菜佐餐殺人越貨之

行所聞殊鮮固由賈長官有弭變救災之政究亦民俗淳厚使然民國三年夏秋久旱米價漲至每觔七十錢官紳亟開倉辦平糶而貧民迄無食榮者今則觔米三四百錢習以爲常因其價昂米偶乏則境外之產且夕由鐵路吸集凡有職業爲入財之源者皆不患饑矣然而萑苻之風日熾則政教之病也

庚子拳禍

光緒二十五年秋蜀人李某羅某以拳術來遊寄寓南城上之奎星樓游手少年趨之結爲兄弟李自稱大刀會遣出巡方者因而散放票布傳習符咒云能禦風雷避槍礮會中以助清滅洋爲宗旨舉事之日一切習洋教談洋務者皆殺之藏有洋貨者必火其家惟持會票者得免由是愛國守舊及挾排外迷信種種誤解者爭趨焉而畏禍難惜身家欲得其票布爲護符者尤衆每票取錢三百文祕密中輾轉售出何啻萬數次年五月北京義和團事發衆聞之皆狂喜教會西人皆逃去時京漢鐵路方鑿武勝關孔道信陽甫設測量購地各局至是均罷工西人任工師者皆避居漢口租界謠詆繁興羣情惶惑時長臺關有悍盜余三伏法相傳其黨徒將爲報仇或揭帖城上曰先殺豬後宰羊拿得鯨魚釘城牆謂南汝光道

朱壽鏞知州饒拜颺千總劉占鰲也市井小兒漫歌之以爲戲會中人亦樂道之適道署奎園有老樹夜無故而火署中相驚爲妖及聞童謠疑有主者遣使偵之至奎星樓捕羅某及其徒楊某訊得聚徒結會狀株連甚衆閔某某皆入獄拷掠極慘胥役因緣大索得資無算賴遊宦寓居之李肅雍白於官官亦恐激變亟出示設匾於堂令購有布票者自投匾中免罪怯者則墨塗姓名而投之或託有力紳耆代繳不三日收票萬餘悉焚焉衆意稍定罪首李某先逃青年連累棄家遠遁者數人後入軍籍多得官羅某楊某坐斬閔某某監禁至宣統元年遇赦始出大刀會初以迷信結合及其散也凡平昔迷信神權之團體如持齋誦經各佛堂均遭波及紛紛解散或因獲罪下獄有至死者次年辛丑和約成傳教西人及鐵路工師悉復其舊而亂前邑人包攬路工所投押款輒被乾沒因以破家者有之民國元年朱氏舊僕某私語人云道署老樹之火係彼夜間起如廁所遺臘炬時畏罪不敢自承姑借妖言爲解不意會合時變發此大難星燎原某僕洵人妖哉是役造端複雜有司挾其畏禍邀功之私念胥役復利用爲詐索資比戶騷然大亂之後若懸千鈞於一髮片言解紛李肅雍之力也

鐵路罷工風潮

民國十一年冬十二月京漢鐵路工人爲政潮鼓盪全體罷工初由鄭州發難而長辛店漢口兩站風潮最烈當道以武力壓迫流血至數十人風動全國信陽爲南段重地其時由廣水至駐馬店各站路工二千餘人聚集於信陽車站開會與漢口呼吸相通且宣言無論南北何站開車至此必勒令停止並處死司機工人爲敗羣者戒聲勢洶洶交通斷絕四五月迨鄭州事解開車南來許昌鄆城駐馬店一夕通過而信陽工黨激昂轉甚矣待車到必依宣言實行駐防之靳師第五十三團武裝彈壓形勢緊張羣情震悚地方官警及紅十字會汝陽道教育會協同地方各團體星夜開會公推代表朱浩然劉景向等居間調停各界組織勸告團以應之縣知事李培元警察局長李兆榮至車站均被工團擊回次日黎明勸告團各代表至工團俱樂部演說良久復偕工團代表至英美煙公司與旅長王允忠團長王喬等接洽至日夕雙方始相了解南北通車是役形勢極險而卒得和平寧息不傷一人幸矣

十四年冬陝軍守城之役

十四年岳西峯督豫兵民解體其秋吳佩孚自漢口率討逆軍北伐分兵

兩路第一路寇英傑統第一師自武勝關入沿鐵道取李家寨柳林東雙河第二路孫建業統第二師自平靖關入取西雙河十二月十三日孫部攻佔賢山龜山馬鞍山三里店寇部進踞兩河口其時守信陽者爲陝軍第十二師師長蔣世傑率所部分扼灃河北岸布防西自二道河起迤邐東至平橋劉家灣掘地作溝因岡爲壘苦戰旬餘殺人盈野兩岸數十里民居盡成灰燼至二十八日蔣軍戰敗退入城內寇部進據車站四面合圍孫部踞賢山巔俯瞰全城日以大礮轟擊陝軍爲久守計於城隍上掘土築蓋溝數十處深闊各丈許伏兵其中並穿城垣作孔向外射擊城內居民斷交通禁偶語沿家各掘地窖避礮火其初蔣軍尙有紀律繼而岳督派田生春部入城助守以檢查奸細爲名肆行屠戮並沿戶派款搜括存糧擄掠財物拆屋材以爲炊判臥薦以飼馬居民米薪告罄餓斃者相踵紅十字分會慈善會暨紳商籌設粥廠數處振濟猶苦不繼次年正月十五日開封爲吳佩孚第三路靳雲鶚部所克岳督西通適邑人董錫賡任湖北黃岡縣知事因公晉省至漢得悉信陽被圍以桑梓關係隨晉謁湖北督軍兼省長蕭耀南請假一月回籍設法解救幸圍城軍官中有賈師長萬興宋旅長大需劉旅長玉春均與錫賡有舊一面哀懇諸軍長官

顧念人民生命停發大礮並代擬公函與守城蔣軍開陳理勢激發仁心蔣軍感動旋派代表出城磋商辦法以要求收編爲條件各軍長官不敢主持時吳帥駐漢口查家墩錫賡遂約同邑人高彩衢陳潤叔嚴泗生代表申民赴漢晉謁靳薦青將軍請求營救復謁吳帥面陳圍城內人民困苦之狀死亡之慘並說以弔民伐罪須先愛民吳始意動許電前防駐軍相機辦理錫賡等涕泣叩謝隨又搭車回信面懇駐軍適各軍長官已奉電令和平辦理遂於二月初一日陝軍開城繳械是役也前後守城四十九日兩軍戰死各以千百計城關居民死者又共千餘人其存者如在獄之囚如久病之夫面黑骨柴氣奄奄不相續同城親友相晤悲喜不知所可如經多年遠別者民家皆戶無門窗無櫺室無器具院無牲畜其近城臨街之屋牆剝剝落落皆槍彈痕也事後地方士紳妥籌救濟由劉景向撰捐啓分途勸募啓文頗盡當日情事具錄以示後信陽救災善後事務所募捐啓敬啓者國步迍邐民生憔悴哀呼莫問施濟早窮然而災禍之慘創痛之深如信陽此次兵劫不惟全國所稀見亦亙古所罕聞垂涕而道聽者莫不傷心瀝血而書覽者亦應酸鼻也按信陽係豫鄂孔道當京漢要衝辛亥以來軍旅不斷事居送往杆柚常空直皖一役直奉兩役戰

血猶腥劫灰未冷間以兵變匪擾疫癘旱澇禍不單行歲無寧日豈惟休
養之末遑實已顛連而無告不意陝軍西入豫禍南鍾加負擔於溝瘠震
天呼籲肆誅求於盆罄比戶銀鐳丑年徵寅卯之糧苛派更浮於正稅一
日如期年之久偷生尤慘於借亡瘡多肉少剗補何從禍結兵連號呼安
仰此次計自乙丑十二月十三日起至丙寅二月初一日凡四十九晝夜
城在圍中民如釜底彈丸兩注礮火星飛或棟折而榱崩或巢傾而卵破
或處穴而頭顱裂碎或循牆而胸腹洞穿天寒地凍流血成冰晝短宵長
驚魂無夢雖一守而一攻奈屢進而屢退孤軍久困極發金搜粟之能潰
卒橫行竭掘鼠羅雀之智到床薦以秣馬寸草不留折門板以填濠片木
俱盡奪餐而破釜餓代薪而煨粲搜棺槨以斂陣亡之尸掠被服以裹
戰傷之體大而牆屋細而米鹽凡軍用之所關悉民生之攸賴此外無名
之勒索故意之摧殘或綁票而求金錢或舉火而焚書畫或碎瓷以快耳
或裂帛以開心伐樹則務絕根株毀室則不遺樞牖甚至探固漏以搜藏
繼破溺器以覓遺珠上透天棚下窮井底無微不至有隙必鑽罄高曾之
蘊蓄十室十空痛骨肉之凋殘一聲一淚圍解之後呻楚相聞附郭之廬
舍如鱗僅存瓦礫車站之市廛遺迹無復人烟縱橫百里雞豚與麟鳳齊

觀寥廓四鄉菽粟共珠璣爭價鳩形鵠面沿途皆失業之人狗盜雞鳴越境多犯關之客迄今催耕則種牛俱絕勸商則子母全灰生者無以存死者無以斂傷者孰為養痛者孰為醫麥秋遙望籌急振而難延華夏同驚泣偏災之特重不藉同胞之力曷為善後之圖爰佈災情佇瞻仁宇伏祈宏胞與之雅量推饑溺之慈懷鉅公豪士暫分茶酒之資壽母名姝略損釵環之飾千金市義善緣共結於天心一滴及時涸澈亦全乎物命更冀扇口角之春風挹楊枝之甘露救殘生於垂死挽劫運於未終人道最尊豈免死孤悲之容喻天心孰向有雀環蛇寶之前聞謹啓這次經地官方急
振會雙信陽救災善後先務所兩機關多方急振此果由上海濟南省振會暨
 華洋義賑會籌撥鉅款以實地調查分發商人上損學畫無力復業
 實清一萬五千餘元撥選經發放小商每人每戶以五元
 來振款一萬五千餘元以實地調查分發小商每人每戶以五元
 情殊堪憫商地無息收回後即以收同之款連同邑人陳雨人在
 為限半年期滿無息收回後即以收同之款連同邑人陳雨人在
 洋三六千餘元併記約十餘元救濟災民匪淺也
 滙各善士捐助者併記約十餘元救濟災民匪淺也

共產黨襲攻信陽城關車站之情形

民國十九年夏秋間共產黨蹻踞鄂北廣水花園各車站左近掘路毀電
 屢踣屢起賴有戴民權師駐武勝關以南防堵從未越豫境一步九月十
 九日共匪大部由九里關在武勝關東七十里入豫境以當谷山新街在柳林車站東南十五里

爲根據該地岡巒重疊形勢險峻夙有共黨潛伏宣傳共產主義居民強半同化易於勾結屢欲乘機響應以蕭縣長認真緝辦及地方民團監視故暫未發動此次共匪大股奪關深入內外聯合無法抵禦二十日由當谷山分三股各五百餘人西至柳林李家寨南新店三車站掘毀鐵道各里許砍斷電桿各十餘根搗毀電話機票房器具擄掠商民衣物經夜仍折回當谷老巢二十一日由當谷全隊出發經過杜家畷左家店馬蹄店兩河口各集整日沿途騷擾不進

此條路與鐵道成平行
在其東十五里

至夜半分四行

向北飛馳拂曉直撲信陽城關車站襲入票房站臺進攻大馬路及各街巷時信陽駐防四十八師補充團團長依介卿先日已有準備閉城從容應戰匪勢凶猛往來盪泐數次皆被官軍擊卻戰至將午鐵甲車由北開到轟擊匪不支遂退去當匪未至前數日城關內外及各集市皆有共匪密探扮作僧道工販各色人等到處游行偵察軍民情形而平時潛伏及臨時混入之黨徒計又數百人分播共黨標語傳單充滿街巷戰時將羣起內應依團於城內外宣布戒嚴斷絕交通令居民皆閉門勿許出違禁者槍斃無論因此匪徒不能集合逆謀遂止是役也車站房屋被焚五處約八十餘間居民被匪擊斃十餘人匪傷亡者百餘人官軍死傷數人而

已該匪號稱紅軍專任作戰內部分三師

千師一人槍械約七千人第二師約四千

三人有槍者

有迫機礮四尊機關槍六架惟子彈不充來勢甚銳意在必得

而不虞依團之見挫也該匪敗後退據中山鋪辛嘉店一帶其別股於是日晡後襲陷五里店大肆擄掠二十四日與辛嘉店匪合股北犯黃家院攻破洋河寨計沿途捕殺良民五十餘人遂竄由胡褚店陡溝東破光山羅山商城益猖獗不可制矣

嘉道以後各種災異

信陽災異往昔多不可考茲就父老所相傳者採記於次

嘉慶十七年十八年十九年旱荒三載秋稻不登幸秋收蕎麥及菜有遺種粒於地者卽長成舫餘人多賴此以生餒極之人赴市每數人攜手蹠跚前進有不能支者輒依山坡田頭口流清水卽斃斯時民風淳厚絕無盜賊或鬻婦孺以度荒之事

道光二十八年大水溪河莫容溢出數里傍河居民多遭淹沒房屋倒塌人畜漂流不計其數時有劉滋園者在城治西關外經營鹽業其日鹽簾方抵岸未及起卸夜間大水如注繼以風雷簾上人終夜邏守不敢稍懈見上流有紅燈二冉冉而來漸近漸大意賊劫鹽也執槍以待距簾二丈

許鎗驟發燈忽滅見一物長數丈隨火光向籐撲來水卽陡漲高興簷齊河不能容沖斷火神廟前石橋水繞城北而東居人從夢中驚起不知所逃淹斃無算河下之鹽俱付波臣家中存者亦漂蕩淨盡其家遂因而中落漸河前本土河至此遂變爲沙河

咸豐五年秋水嘯池塘中無風自蕩一面見底一面水陸上後水復池魚有被攔淺者

咸豐六年旱荒春季麥豐收秋稻西南山中尙有倍收者惟小山之內及城東城北兩方顆粒未收八月十五日大雨傾盆田塘埂多被沖倒及冬無食壯健多逃往湖湘餓殍載道賣兒鬻婦以度荒者極多而狡黠之徒遂以此爲生意是年米價每觔三十五文

咸豐七年夏秋間蝗蟲蔽天幸害稻者尙少只玉蜀黍及竹林受損同治三年慧星長竟天首東尾西直穿天漢尾排張數丈每光綫之末似有珠綴逐漸減小月餘始滅

同治七年八月十六日下午大雨雹積地二三寸大者如雞卵牛羊狂奔禽鳥小獸擊死極多以在竹林中者爲最秋禾亦多被打死

光緒三年旱災疫災先是山陝甘等省及河南豫東豫西一帶已旱二年

河陝汝等人民餓死過半就食信陽一帶者數逾百萬奸民販運婦女者尤衆知州張嗣麒籌捐籌賑在城內及四鄉各設粥廠煮粥散放值冬令嚴寒饑凍交迫城內饑民鬻集各廟瘟疫大作三年春間死亡相望幸存者僅疫氣傳染遂及土著辦理賑務諸紳日與周旋受病尤重間有死者至六月後始漸消其秋信陽因旱歉收人民亦有凍餒之虞惟未及北方之甚也勛米值錢三十文

是年蝗災先是河洛荒旱赤地千里蝗蝻怒生無所得食羣向南飛過信陽者三日夜不絕最大一羣寬長數十里天爲之黑信陽禾稼間有被食者其多數俱向南飛去尙未至成巨災也

光緒四年六月初十日夜半大雨如注竟夕不休天方曙明水陡漲數丈波濤洶湧四面環撲立傾明港寨垣十之七怒流齊放寨內陷廬舍一千餘所合寨男女冒雨走避羣哭集於北街之凸處存亡在呼吸間驛丞銜署淪沒姚驛丞眷口十餘立水中善水者背出得免爲清朝歷二百三十四年以來僅見之水日未午雨止水退溺斃僅數人石橋衝折三丈許時知州張嗣麒得報急來賑卹災戶並撥資續修石橋如初

光緒七年秋慧星見長約二丈從西北起直上天中紫微垣內月餘而沒

光緒十一年星流乙酉冬月某日夜間流火滿天大小不一其多無數縱橫亂竄澈夜不息次日晚間尙有見者占驗家以爲民人流離之象意卽西人所謂獅子座流星羣也一作十五年六月夜事至戊子年黃河決口鄆州一帶被災者數十州縣

光緒十二年丙戌十二月八日大雪直至十五日早晴當晚又下至除夕始止路兩旁雪齊人肩有凍僵倒雪中而死者老屋壓塌無算深山之中以斷火種而餓斃者甚多

光緒十六年六月初四日晚民間訛言寇至男婦盡室逃避集堡一空一日之間自西北至東南江浙數千里老幼溺死者多俗云陰反

光緒十九年癸巳水災西雙河上流起蛟市中水深數尺見一木片上伏一蛇亂流而過出街後霹靂一聲水湧如山沿河集市若楊柳河若兩河口若五里店俱損失無算其時城西關之橋早已填塞故城北未遭波及光緒二十一年五月池塘水簸蕩見底魚蝦擱淺陸上其水有傾出數里外者有傾出而復返者有從中分裂傾向兩旁者有上下左右塘堰俱傾中間絲毫不動者縱橫百餘里間不一其狀似鬪非鬪似嘯非嘯不知主何祥也

光緒二十三年旱荒貧民窘迫無食賴積穀以調濟無大損傷縣北先荒二年艱窘較甚其時舛米值錢三十五文

光緒二十五年五月大水是日大晴晨餐後突見紅氣蔽空自西北來聲如雷吼呼吸之間高低原隰水盈丈餘陸地行舟水過之處荇藻挂在樹秒間淮瀾泛溢人畜屋宇漂沒溺死無算

是年某月日正午五里店寨西突有羣蛙自礮樓下出數逾千萬首尾銜接奔赴瀕河而沒歷一時許始盡

光緒二十六年庚子夏月大旱五穀多不回種是秋大雨雷電田禾廬舍毀傷過半

光緒二十七年辛丑夏秋之交霖雨兼旬一日午後大風自西北旋轉而來上下數百里間大樹被拔無算文廟之柏吹倒數株賢隱寺大柏二株元明間物也亦被吹倒其風四面衝撞激蕩大木被撼若摧枯木然又以大雨連旬地溼且透故樹失其根據耳

光緒二十八年八月初四日正午大雨雹是時烈日當空驟有暴風自西北來雲紅如燒頃刻飛向東南去其雹如拳如碗如瓜有大盈尺者秋稻方熟未穫雹過之處惟見稻草枯立無顆粒存其較重者則稻桿全倒陷

泥中若經犁翻者然樹木皆枝葉披落老幹作斧鑿痕禽鳥被擊死者無算屋茅薄者至洞穿破釜餽匱自泌確起至長臺關折而東南由洋河二十里河之間直至五里店寬不過十里迤邐東南至江浙數千里初起之時如豆漸行漸大至長臺關則如粟至五里店則最重矣河下所落有長數尺如杵者如條石者好事者拾最大權之重十五觔

宣統二年十二月三十日驟雨傾盆雷電以風竟夜方止越十一月而清鼎革

民國二年正月初二日地震房屋有至崩倒者是月十三日二十二日二十八日至二月二日又震

民國三年天旱成災省撥賑銀四千五百元散放時粃米值錢八十文因運輸便利民鮮菜色

民國四年夏東南鄉蝗蟲發生知事翟春昭親身下鄉撲滅未至成災民國六年元旦之次晨全縣地震歷數分鐘屋宇搖動有聲幸無傾覆不至爲災

民國七年戊午九月瘟疫流行旬餘日病者十之八九死者十之二三凡孕婦皆流產而卒無幸免者以致殮者無從購棺葬者無處僱工往往用

薄簾收殮人人自危爲狀至慘

民國十年自五月至七月底霖雨成災倒塌民宅無數城內倒塌市房填街塞巷何止萬間南門之東北門之左西門之右城牆先後崩潰數十丈壓斃數十人田禾腐爛苗圃樹木亦皆爛死而北方難民紛紛南來餓殍載道經冬入春氣象悲慘時駐防旅長發起演電影戲募振款商會紅十字會繼之各女校學生亦皆分途勸捐得資除於本地放振外並糴米十萬勛運赴許昌振濟北方饑民信義中學柏校長出美國捐寄之款辦理工振遂成西關外馬路邑中官紳議加地丁以修補塌城工竣得獎官職勳章者十餘人

民國十一年旱荒自是十六十七等年皆旱秋成歉收十八年大旱有子粒不歸家者

民國二十年四月某日晡兩地震六月三日大雨一晝夜不止瀕淮漫溢成災漂沒田廬無數南北城垣倒塌共二十餘丈士紳組織臨時水災救濟委員會電籲政府撥款拯濟

民國二十一年旱荒秋收十之三

民國二十三年旱荒秋收十之六

附錄
雜錄

高鐵溪生明中葉有神畫之稱與神童何大復神醫方某同時號爲三神相傳任貴溪縣時遇黑龍潭龍王於天師府敍鄉誼聞公善畫贈筆硯畫益神妙畫月隨望晦而虧盈畫龍見江河而飛去其品直臻化境惟性古傲不輕與人畫嗜酒醉後大筆一揮胥成墨寶什襲而藏之居官廉介致仕歸窶如故嫁女無奩資予之藏畫一箱他無長物女至夫家啓篋視之怒付一炬故流傳者絕少絕筆時於宅前池邊洗硯失手墮之竭池而尋不獲乃歎曰吾祿盡矣囑家人云吾沒後有黑衣人來弔者宜優禮之索畫筆卽與勿忽諸未幾卒果如所言洗硯池在今北門內右側近聞杜少田藏有鐵溪畫一幅一老人數小兒眉目如生衣紋之筆堅可屈鐵洵至寶也

王海觀道光初知信陽州有異政至誠感神值盛暑夜深納涼庭除不覺酣睡見一老人杖而入海觀起迎揖之坐叩來意老人云不久蝗蟲過境急備文恭迎或者不至成災以君多惠政故不忍膜視耳問何處可迎曰向南方見一人戴風帽跨黑衛者卽蝗王也方欲請示禦蝗之法忽爲更鼓驚醒乃悟爲夢卽繕具恭迎神祇哀懇免災公文次日選幹役賚呈依

重刊信陽縣志卷十一
老人言諄諄切囑役卽捧文向南往迎抵武勝關見一人風帽跨衛狀如所囑役卽跪道致詞叩迎投文其人拆文視之怒云是誰饒舌沈吟良久乃云該牧惠政堪嘉尙可通融歸告爾主宜備米粥灑於某某處村莊屋上藉資給養可也役歸實報海觀如命辦理未幾蝗蟲果遮天蔽日而來咸集於該村莊屋上間有食竹葉荒草者秋禾無害聞雙井村屋有爲棲蝗壓塌者人民稱慶感謝神恩公懇建祠於城隍廟東偏歲時享祭報賽神麻用志不朽茲事邑人言之鑿鑿證之宋均馴虎韓愈驅鯉理所或有惟德動天至誠格物信不誣也

宣德三於咸豐初知信陽勤政愛民歌誦至今爲有清三百年來第一循吏相傳宣幼年性情暴戾家人呼之爲紅磚少長無行讀書目數行下及冠入庠以預人訟事被革改習弓馬入武庠又緣事被革遁而從戎以功保州縣實授信陽後以守糧臺殉難洵奇人也

趙登峻某中堂壻咸豐元年以捐班知信陽事貪婪無饜聲名狼籍民間訟事以賄之有無多寡爲曲直甲以賄進則袒甲而甲勝乙以賄進其數過於甲則又抑甲袒乙而乙勝甲乙同時以賄進而數相當則授意令之和解甲乙先後以賄進而彼此迭有增益則堂訊時甲乙又迭爲勝負及

至審判終局則猶留一隙以待再訴以爲異日敲索地步故趙在信陽二
年去後多未結之案嘗有奸民買通賣花婆入署行賄於趙之妻卽某中
堂女也妻言之趙允爲遵辦及至堂訊忽忘前事宣判竟違妻旨退後妻
嚴詞訶責趙急升堂再予提訊將前斷翻轉並聲言本州一時模糊細思
爾如何能勝訴從此遂有趙模糊之稱次年冬趙竟升任光州直隸州邑
人皆曰此太山力也

是時有童謠曰趙模糊李錢串兩省官一樣幹
蓋同時孝或縣知縣李某亦以貪墨聞者故云

饒拜颺閩人以佐雜升知州實任信陽其爲人小有才而堅復自用又遇
事變幻不常令人莫測深淺至任意壓制人民尤不擇手段試舉一事以
例其餘光緒二十三年地方歉收州北鄰縣連年荒旱市斗漲價饒謂富
人積穀居奇請南汝光道發委搜索蓋藏一面出示令城鄉富室糶穀不
准市面漲價商人米坊勒令歇業由州於城隍廟開官斗坊每日早八鐘
請南道親臨督同糶米其糶米者人以一升至三升爲限每開門男婦攢
擁或被踏翻幾斃命者有被擠墮胎者怨詈之聲溢於道路饒始知懼停
止官坊仍令米商營業至鄉間則出示云凡囤穀不糶者若被饑民搶掠
本州概不理處於是南北集運輪阻絕地痞假缺食爲名紛紛劫搶富室
地方秩序大亂流弊幾十餘年直至民國四年汝南道尹葉濟通令屬縣

凡以逃荒乞食爲名而強搶者立予搶決其風始息按饒雖非循吏然亦有特長向來信陽民間習慣人命案率不敢請驗因相驗時胥吏勒索分規及供應等藉端搔擾雞犬不寧於是路死貧民狡黠者藉屍圖訛婦女輕生母家糾衆滋鬧愚懦之民坐是傾家者不可勝數饒下車令民間命案必須報驗不許私和屍場陋規一律革除相驗時胥役量遠近發給口食書一高脚牌負之前行有婪索者當場從嚴懲辦驗畢飭胥吏卽刻返署不准逗留假報命案者立予反坐胥吏架唆詞訟魚肉鄉民者則於放告日當堂盤詰追究所主之家有無架唆情形有則罪之以是訟風大熄嘗有一拾麥鄉婦被犬嚙圖訛畜犬之家里人和給二千文不允投狀縣署拜颺乃票拘犬到案使婦嚙犬一口報之鄉婦乃請遵前議以二千文和解亦趣聞也

許翁佚其名字乾隆時人住平昌關設小食館性和易有來食者卽與之不問有無錢也終日嘻嘻未嘗與人有爭室內几凳修潔有常所置物傾欵必正之磚石當路樹枝下垂必取之恐礙人也時時行未嘗自休年七十卒卒之日已絕復蘇謂吾頃至某富翁內室因歷言其中陳設不爽俄復暝與富翁生子時刻適符咸謂富翁子蓋許翁後身富翁子終身富厚

乃天所以報也

喻心地行實詳人物志文學光緒甲申除夕道署有馬他逸不知所往元旦見馬跪斃於心地之門未幾心地逝世相傳馬之死乃迎之也踰二年羅山有人來云某扶乩土地臨壇自云信陽人喻心地述生前事頗詳聰明正直之謂神其理可信

劉師善行實已詳人物傳平生性坦易伉爽與人言時莊時諧務納之正軌年八十餘卒卒之前數日夜夢白髮老人指示葬所告以死期侵晨果有周姓以田地求售往勘形如夢境遂購之屆期甫衣冠而沒

牛應祥衛東村人性孝友兄弟四人析居應祥讓其產與諸兄弟遁去捕魚爲業一日於水次得一白龜以土地祠磬覆之及歸遺忘是夜夢一老人告曰此寶物也次日取歸投之水缸水不竭移入米甕米不竭乃置穀囤中亦復如是竟成巨富後糶穀龜被僱工踏傷遂無靈異

信陽當宋南渡後兵亂四十餘年境內居民死徙相繼存戶不過數百故地方民族元明以上之土著極少今舉數大族可考者於下其餘可以類測也何氏湖北羅田籍何太山於明洪武初遷信陽

太山生海生景明生生立文王氏山東德州籍王悅於洪熙時以千戶調信陽衛後所正千戶

遂著籍焉悅生 端生 瑞生 世祖 孫生 星生 昭生 張氏安徽寧國籍張琪於明

洪武時遷信陽琪孫 鼎孫 其孫 自孫 仙孫 至孫 游孫 化孫 七孫 舉孫 孟孫 金孫

山籍孟勝於明宣德時以武成千戶調信陽衛千戶勝生 山孫 甚多 孟氏 金氏

氏浙江山陰籍馬谷用明初遷信陽孫谷 用會 高氏 山東籍 高智官 副千戶

明永樂中謫戍信陽遂入籍理生 理生 樊氏 徐州籍 樊剛於明正統時從外

祖家信陽剛生 昭生 劉氏 亦外籍 至明初遷 樊氏 張氏 亦外籍 張氏 亦外籍

惠如芹宰冠府芝如 李氏 鳳陽籍 明初遷 旭其 孫再 傳至 郭氏 西明 江

其山有官遠卜居焉其後裔 六宰 焉過 庚家 瑤之 全受 陳氏 湖北 麻城籍 明初

夢陽者名格其後裔 善同 元 其他 各大族 大都 皆然 不勝 枚舉 觀此 可見 兵戈

之為禍烈矣

何姓王姓在有明之世人才輩出文章經濟輝映一時其園林宅第之盛

亦復甲於一邑城東六里何家花園縱橫百餘畝旁有清溪長數里號曰

錦湖畫舫清樽頗饒勝概園中累太湖石作假山石有大至丈許者皆南

中物也乃啓圖侍郎所經營以娛其尊人者唐家衛衙北口有大復第係

大復故居小南門十字街路北有瑞徵故第夾巷連棟屋宇百餘楹城西

有何家濠周三里為瑞徵別墅中構亭樓臺閣濠中偏植荷花花時香聞

數里南門內有王師竹故第門首雙節坊第內丘園大數十畝有亭樓軒室諸勝名人題詠甚多鼎革以後大復第何家花園皆轉售於曹曰興曰興者邑西馮家莊人明崇禎闖獻之亂其家人爲闖將韓美華景凌高所殺時曰興方在襁褓一婢負之逃匿倉房堞山中採野韭充饑以免於難順治中曰興入邑庠食廩餼後以歲貢候選訓導時大亂之後閔里邱墟曰興在馮家莊左右插荒數十里招集流亡墾種收租至三千餘石因以倉房堞爲恩山其子孫科第接踵爲邑望族所購大復故第改號大夫第改何家花園曰曹家花園今閱二百餘年太湖石尙存一二大者花園荒蕪闢作阡陌大夫第售於外人作天主教堂瑞徵第則數易主今以改建省立第三師範學校何家濠王家丘園皆屬他人滄海桑田可勝慨哉城東八步橋下之水舊本由曾家園東流至大拱橋南入澗其勢爲反弓南汝光道曹繩柱以其時士鮮科甲戶乏蓋藏遂俯察地理鑿道引水向八步橋正南入澗會繞城東南隅縈迴環抱其上架木爲橋至乾隆四十八年知州保長改木橋爲石橋命名永嘉嘉慶六年知州錢俊重修又改名通轍皆有碑可考又信陽大小南門二曹繩柱移改二門各偏東二丈餘據堪輿家言信陽縣治結脈極佳自曹繩柱改兩門後掘穿東北附城

河直南入澗上築石梁北門來龍入手處搭木橋隔斷地脈其後文風衰歇有某公題云坎龍入首脈最真當年朱紫滿春城五門一氣迎祿馬何故先生塞二門頗與碑載不合甚矣創制之難也

邑西游河鎮鄒姓康熙時家豪富昆仲八人各建大宅第連牆接宇鄉里有鄒八家之稱輪奐壯麗僭侈踰制服御飲食擬於王侯家中各僮僕百數十人終日弋飛逐走氣燄熏灼姻婭皆貴顯者歲時過從車水馬龍傾動道路相傳其先本一窶人清初於某山巖中掘得窖金遂暴富由信陽至京師沿途均置有產業自謂往來二千里不飲馬他人井云某年赴部納粟鑄千斤銀餅多枚各以大車載運謂雖遇盜不能挾而走也今其家已式微矣按鄒氏貽後集載鄒原籍江西新建縣元末有遷八者避難徙湖北麻城西北點兵山其子九人分居多處明左副都御史鄒來學駕上總兵鄒俊清內閣學士兼禮部侍郎鄒士璉卽其後也清初有名士彥者官河南正陽縣知縣秩滿偕弟士文遷居信陽北長臺明港間尋士彥子三畏士文子三多移居城西三河村鄒家大灣三畏四傳至文憲生子八人近聖增生禮部司務廳繼聖四川保寧協千總希聖浙江富春縣宗聖附生甘肅安化縣淑聖貢生則聖乾隆戊辰拔貢承聖乾隆戊辰任內閣

中書述聖優廩生山東魚台縣皆在乾隆時查清制自乾隆後選拔科例在酉年此云戊辰拔貢殊屬錯誤徧詢父老信陽並未聞有鄒姓拔貢其人意者鄒氏遷信陽未久其時格於冒籍之例仍回麻城應試亦未可知又清例內閣中書例不能擔任此不注進士舉人或係脫略至所載貢生亦未指恩歲副拔優意係監貢所云某省某縣不詳何職官亦屬含渾第年湮代遠無可證明不便載入登庸志各表內姑附記於此容待考查

邑南黑白兩龍潭暨震雷山頂之雷沼相傳中有神物每遇天旱禱雨輒著靈異凡求兩者背負淨瓶至潭將瓶置岸上焚香楮叩首以香火插瓶中驗有水則兩否則無兩同治十一年大旱南汝光道傳青餘步行禱兩積十日之久自爲文遺詣白龍潭焚之甘霖立沛轉款爲豐進士郭尊香作詩紀其事見海粟齋集光緒戊子夏南汝光道耆紳以久旱詣潭致禱驗瓶無水乃親爲文哀籲久之乃行未抵署卽大雨滂沱田原溉足此皆事實之昭昭在人耳目者蓋惟誠則靈天人相感其理然也光緒庚子夏大旱知州饒拜颺奉道檄赴白龍潭致禱潭口山路崎嶇饒目短視窘於步履而口內尤嶽欹險隘無置足處饒以布疋繫其身令健役數十輩前後推挽而入至潭側以瓶灌水去卒不應

曹氏叢書洛言一卷有記新安張南川事南川幼與楊忠愍同學忠愍下獄投詩慰之有當日壯懷曾共約夜深寶劍照寒空之句得禍幾不測舉嘉靖丁酉鄉試歷知信陽東平二州會江陵册封崇藩道信陽其下頗不戢南川上書責讓略曰區區與足下共處海內如風搖萍梗偶爾相值相觸何嫌何疑牌到士民以爲內翰來丰采自是迴別顧乃縱容豪僕鞭笞官吏苦楚不可言足下不知是不智知而縱之是不仁不知朝廷儲足下爲宰輔其舉動如此令人駭異官有內外其忠君愛民之心則一區區燕趙鄙人素薄功名藐權勢止知爲民作主爲君分憂而脂韋取容所不能也江陵銜之甚未幾有肅府右長史之命移疾歸里卒年八十六南川名光遠字文化於嘉靖三十六年知信陽事無宦績可考而此書猶存丞錄之可以不朽矣

王太史祖嫡父竹里將軍詔以武弁工詩嘗解餉至都寓愍忠寺偶感書壁豐城李太史瓊訪客見之遂爲知己備禦上谷時都闖王昌洛陽人有詩名深相獎與臨行贈詩云此行上谷逢知己報道潛夫臥少林同里岳東升素有文名祖嫡幼從受學與竹里尤相得東升贈句云有時開徑延三益獨坐忘言契六虛汲泉灌水身忘貴走馬穿楊射有神所著耐辱子

集燬於火談錄二十卷存者不及十一王弇州爲作傳

何執齋艾潤泉居相近爲諸生時口占七字爲聯艾居本村王家岡北頭吟曰岡頭日暖翔鳴鳳何住白龍潭口對云潭口春深起臥龍隱然以一龍一鳳自況當時傳爲美談艾以光緒乙亥鄉會連捷成進士親政刑部何以丙子鄉會聯捷成進士親政兵部同時並駕不可謂非山川之秀乃郎署假蹇多年至丙申相繼病沒京邸龍鳳之聯竟非佳讖論者惜之信陽向多虎患薛用弱書丁憂驅虎事載舊志唐貞元時事也元時荅祿將軍守信陽射虎之事尤偉南陽迺賢易之有荅祿將軍射虎行云將軍部曲瀚海東三千鐵騎精且雄久知天命屬真主奮身來建非常功世祖神謨 宇宙坐使英雄來入彀十年轉戰淮蔡平帳下論功封太守信陽郭外山嵯峨長林大谷青松多白額於菟踞當道城邊日落無人過將軍聞之毛髮豎拔劍誓天期殺虎彎弓走馬出東門傾城來看誇豪武猛虎磨牙當路睥目光睽睽斑尾搖據鞍一叱雙背裂烏飛木落風蕭蕭金瑄瑣弓鐵絲箭滿月弦開正當面雕翎射沒錦毛摧崖石崩騰腥血濺萬人歡笑聲震天剖開一矢當心穿父老持杯馬前拜祝公眉壽三千年將軍立功期不朽奇事相傳在人口可憐李廣不封侯卻喜將軍今有後承平

公子祕書郎文章百步曾穿楊咫尺風雲看豹變鳴珂曳履登朝堂按荅
祿世爲乃蠻部主歸元拜隋穎萬戶平金有功事詳國史特錄此一詩以
補邑乘之闕

邑南有大王冲山川深阻頗稱勝境明王太史祖嫡有過大王冲詩載師
竹堂集注冲多虎故名而咸豐中知州趙兩樓大王冲序謂相傳明末李
闖之亂有北直武魁王悅之者奉命勦賊駐邑南以不戢士卒爲土人所
殺故以大王名其冲殊屬傳聞之誤

邑南山產豺狼狐狸野豕之屬豹亦恆有獵戶於大雪中持槍銃鐵叉循
獸迹追逐時有所獲豹有艾葉金錢各種皆以身上紋理而名之豹性猛
烈黃昏時每踞山巔石畔一吼聲聞十餘里小兒至不敢夜啼喜噬犬畜
犬者夜必閉之門內偶失防輒被噬豹噬犬必醉如人之中酒然醉時嘗
被人擊斃野豕大有至數百觔者其力至大徑四寸許之欄櫟嚼而折之
如摧葦然出則成羣爲禾稼害皮堅韌不畏槍銃而鳴角以驚之則奔去
云

咸豐初費耕亭庚吉守汝寧多善政而尤喜栽培土類一時九屬士子肄
業南湖書院者至不能容嘗擬鱗鳶飛魚躍四字於石出重聘徵書於九

屬生童之應試者一時能書之士靡不獻技願皆不中程式惟信陽陳敬韶鳳庭所書最佳遂鐫之石敬韶邑廩生工書而大字尤健拔不蹈恆蹊人以其楹聯賽會上海賞鑒家評爲海內第七云

民國十六年馮軍駐信陽撤毀各廟宇打倒神像境內大叢林如雙林寺朝陽庵城隍廟指南院雞鳴寺直指庵等無一能保存者惟賢隱寺尙未盡毀則僧募西呼號奔走之力爲多城隍神泥像被搗碎其木像將付焚如適有王家術術細民劉海者伺隙糾衆昇至己宅輾轉送至城東平橋官塘廟倚紅學爲護符十七年王福祥彭丹臣王子猷等募款建新廟於曾家河曾姓義地六月奉木像入廟適行政長賈德潤被刺謠言繁興衆復昇像至官塘至十八年劉海迎像回曾家河廟香火大盛廟內有長臺鄉白馬村三官廟明天啓三年楊中松所造之磬有衛前所梅黃村王家店南嶽廟明天啓四年李迴李福山劉奇所造之鐘澄清坊曾治清雍正元年所造之化錢爐乾隆十六年造之一千五百觔之爐鼎乾隆四十九年造之千觔鐘皆古物也大殿神額城隍行在四字暨楹聯皆潘岱鍾所書

王伯和治家嚴味爽坐庭上子十人婦十人排立階下分飭某子治某事

某婦治某事唯唯而去少遲誤痛撻不少假借子十人各販水牛每歸以大盤獻銀當時有水牛王家之稱諸婦紡織尤謹人無私藏遂致大富嘗曰吾後人每起嘗以日出爲候且游惰不自勞苦婦人以中饋績紡爲鄙事恥爲之華堂腴地不知所從來家業不振誰尤也謹書之使子孫知祖宗創業不易若此云

邑西四十里馮家莊以馮將軍廟得名相傳祀大樹將軍莫詳也豪民左思恭夫婦喜延方士有道流自稱二百歲不知何許人能令人入山見宮闕兵仗又能見地獄罪福果報愚民競奉之湖南淮潁千里外皆來禮拜各持錢帛不可勝紀咸施貧窶不以治產也官司聞之令以謀反法捕檄下嚴峻莫敢分理兵道潘公密囑王竹里撲滅勿滋蔓當推轂兩臺薦竹里再拜曰事誠有之未有反迹何得以反法治乎愚民惑地獄罪福之說燒香納錢冀獲善報非有無將之心不軌之謀也天道神明人不可妄殺今捕之而勝冤死者無算捕之而不勝是趣之反也容某往察之潘公不擇沈思良久曰汝試往事干題請勿爲兒戲也竹里敬諾以數十人空拳至召其地方老人解事者詳語之老人泣曰非公力持血污此村矣遠近燒香求福利耳孰知官府疑爲謀反也因呼左氏夫婦至皆叩頭痛哭無

一言問道流不知所之矣檢其家佛像經典外無一犯法者使合村互相保結杖渠魁以百數左氏夫婦亦各杖數十焚其積歸白潘公公以手加額曰汝此行活人甚多子孫當昌熾矣轉呈兩臺獎竹里以金幣竹里不以千人之命博一官足以爲喜事邀功者法戒事詳竹里談錄

汪介人輯中州雜俎載有信陽不知姓氏女子城陷時被賊虜將辱之女子大罵不從賊加炮烙罵益厲時女方有娠腹爆如雷而死

馬柄詩光緒丁酉舉人家赤貧敦氣節能文章清季公推任兩等學堂堂長勞心勞力裁冗員節靡費誘掖學童修業大進其愛護學生無殊父兄之於子弟未數月省視學爲位置私人計稟撤其堂長改降中文教員觸動學生怒致起風潮環柄詩泣不得出校門柄詩越日黎明啓門遁去歸鄉後舊友陳乙軒延入車雲山以經學主教者五年病沒沒之前數日與乙軒言我病必不起刻某處城隍以右司判相屬將於某日接事君如相思可以乩招我屆時果沒但乩招惟乙軒主之則至次年二月乙軒乩招乩批云君將得大彩有滬上之行三日信至果然先是乙軒開設藥肆有欠藥費不能償以所購彩票作抵者乙軒受之竟以此得利千元云乩先示之亦神矣

周蓮岑明經母郭太夫人德備行修家門鼎盛民國四年太夫人年百歲戚族請爲作壽筵蓮岑以時局倣擾力持不可但懸挂匾聯而已匾額曰萱壽期頤蓮岑第六子所書聯云一堂綿壽算歷徧七朝已過三萬六千日四子忝芳聲滋生廿戶現在一百五十人亦二百年來未有之佳話也郭太夫人享壽一百四歲民國八年卒

向來各衙署惡習例有官肉官米限定觔數按日繳納亦有折價統徵者其柴炭等各用品入市時若干攫取若干名曰支官差其實繳官者十不及一二縣官下鄉或道府以上大吏過境所有館舍供帳車槓迎送上下犒讌夫馬糧秣無一不取之於當地居戶此種雜徵經政府明文頒布者百無一二成於貪官污吏之隨意誅求沿爲惡例者十之八九試舉歷來一兩事證之如信陽向無炭行其他貨行帖亦未有兼炭字者官署用炭惟發價飭差購買道光間有快役丁三捏詞奉命查報炭行柳林製炭之戶聞之震駭納賄求免其後遂歲以爲常快班居然持票徵取同治初快役黎清燄益張勒派炭捐益多迭經人民周殿元嚴荇村杜文秀等先後呈控府道奉批豁免光緒中並經紳士周儉立石詳紀其事懸爲厲禁乃未久仍復如故又如大差過境搭架綵棚向由差保僱人承辦某年撫院

按臨過五里店差役借用鐵工鑿子穴地植竿以搭棚鐵工恐傷其鑿親往代鑿之後遂成定例其他似此類者甚多可見多一事卽成一例足以病民而有餘負守土之責而於此等鎖屑細故尤不可不特別審慎也四級牌樓明嘉靖戊戌爲張雲連升四級修建石樑甚低民國初有六師之排長某騎馬馳過其下頭碰石樑腦漿迸裂死十二年五月二十日樓石忽墜壓斃二人且全部將圯居者行者皆危之知事宋祖鏞因其子孫無力修拆撥公款一百五十元拆毀之未盡而止

郭尊香學問淵博著作鴻富刻書九種重宴鹿鳴集爲傳青餘都轉代刊韻府翼爲錢調甫中丞代刊尊香贈青餘詩有難得官貧肩重費更勞詞伯代刪詩句贈調甫詩有感謝官師多款曲代留鴻爪在人間佳話流傳至今人豔稱之其書板藏於城巽方奎樓青餘爲文記之並手寫郭尊香先生藏書處懸其上光宣中板尙完好國變後悉數蕩然矣尊香卒於同治甲戌年九十三其未卒前一年尙有代友人贈新人詩云自搖環佩下瑤臺萬喚千呼首不回掌上纖纖初一舞似曾相識燕歸來老尙多情於此可見

清乾隆中城內有涂六一者因生時其父六十一歲故以爲名有良田數

千石房產佔西北半城六一生長文繡膏粱中賦性痴愚闇無知識而習於豪縱視金錢如泥沙終日從羣不逞少年作狎邪遊一纏頭費動輒千金午夜呼盧一擲百萬有時應人約不能涖場則自認鉅量之負注必滿四座之慾壑而後已起居服食窮奢極侈擬於王侯不數年蓋藏告罄鬻及田宅最後零星撤屋材而售之以資生活其門窗簾櫳銀釘諸飾品買者毀而視之皆金銀珠璣之屬有因以致富者六一後流落爲乞丐棲止城門樓上餓死相傳六一父某幼本一窶人於市上見菜販籃內貯一重十餘觔之方塊銹而黑質似鐵問何物曰錫某審視之則銀也問賣否曰吾攜此數日矣無問價者某因以數十文購得之次日菜販復至仍攜前物求售自言掘地得此數甕某盡數買歸因開一錫工鋪藉飾衆目輾轉寢成鉅富菜販知爲所紿哀求資助某峻斥之菜販忿恚死某晚年乏嗣至六十一歲夜夢菜販入其室次曉其妾卽誕一子某惕然曰索債人來矣子卽六一也今北城涂家衚衕卽其住宅也

吾邑乾隆志距今百八十餘年板片早已灰燼城鄉舊家所藏志書至清末不過寥寥數部民國初邑人薛溫伯擬重修縣志物色前志作藍本而篇頁多皆殘缺獨楊樹滋所藏較爲完整於是商之同志鉛印數百部至

後地方迭遭兵匪木板之志無一存者獨此鉛印之志流傳尙多遂爲今日重修縣志之根據假令並此而無之其蒐羅更不知若何困難矣今將當時重印州志序文登錄以見其功確不可沒云重印信陽州志序曰吾邑志乘自乾隆己巳以來百七十餘年失修已久板佚書散徵文獻者咸憂之同學薛溫伯慨然引爲己任旁搜博采冀得完本重印之廣其傳以光前烈聞者樂許爭出所藏書爲助顧皆有所殘缺且缺殘大抵略同未能合爲完璧惟李君旭初黃君鵬程所出書殘缺較少其殘頁各以素紙承乏而文闕無徵美猶有憾最後於楊君樹滋家得一部所缺與李黃藏本適同獨有手抄原文補綴完好然亦僅矣溫伯於是欣然以喜亟挾書邀余偕赴漢皋與鄒君彥沖協商付印曩者測繪之學未精原書附圖尙待改正茲刪道署縣署城圖八景等僅存山脈河流學宮圖各一並以同學易宣三製之縣境圖合肥汪孝伯製之城治圖代其舊有擇手民之嫻文藝者面訂板式而授之余因是思人類志趣之不同文運升降所繫亦卽世運隆污之樞紐也是書自明季至清乾隆間不及百年而再三修蓋關心文化好古愛鄉之人衆故風教淳美有乾嘉道光間百年之康樂嗣後外鑠內訌急功近利之習中人旣深羣以讀書稽古爲無用斷簡殘篇

先輩所傳爲家珍者子孫輒漫焉覆瓿不稍卹文敝俗媮影響至鉅微是舉遲之數年將併今所僅存之緒餘亦且不復可求而吾邑數千年之文獻永絕矣余甚佩溫伯志趣之遠大而喜鄉里贊助者尙不乏其人也適本縣修志局屢蹶復起本省重修通志局亦專員四出徵材人心趣向如此或文運世運將有轉移之機耶謹誌之爲同志稱慶焉民國乙丑元月後三日邑人劉景向遂眞甫序於漢皋客次

陳善同曰吾重修信陽志至卷末大事記修志之事終矣抑有不能已於言者志之爲體當詳於史而今縣志所載乾隆以前無論已自乾隆初至今百九十年證之事實殆不及十之二三所以然者境過迹熄散佚易而搜輯難雖有遷固恐亦將失憑藉而無可著手百二國寶書不備雖孔子亦悵悵於春秋之作也章實齋謂各縣署當立一志乘科房僉掾吏之稍通文墨者爲之凡政教典故堂行事實六曹案牘一切皆令關會目錄真跡彙册存庫異日開局纂修取裁甚富庶得州閩史胥遺意其說今卽不能實行地方士紳固當於一邑之事凡耳目所及有關掌故風教者隨時記錄彙存篋笥留待異日徵採而縣志續修之期最遠宜不越三十年庶幾前此預於操筆之役者尙有一二少壯未或盡沒首尾銜接廢續或易於爲力也史乘文字文野攸判此固生長斯土者之責未可聽之朝夕傳舍之令長循例虛應故事也

信陽縣修志館收支經費表

收入項下

收財務委員會撥到款洋四千元

收教育局撥到款洋四千元

以上二宗共洋八千元

支出項下

第一項薪俸 月支九十七元零五分四厘計二十五箇月共二千四百二十六元三角五分

第一目編纂部 館長一人總纂一人分纂四人均不支薪

第二目測繪部 測繪員一人月支三十元零零九分十箇月共三百元零零九角

第三目事務部 事務主任一人不支薪

事務員四人月支七十五元二角一分二十箇月共一千五百零四元二角

勤務一人月支八元臨時勤務一人_{酌給津貼}二十五箇月共二百四十一元二

角五分

第四目採訪部 採訪員月輪二人各三十元六箇月零十天共三百八十元

第二項公雜 月支二十九元三角二分六厘八毫二十五箇月共七百三十三元一角七分

第一目文具 月支八元四角二分九厘內分紙張月支六元零五分九厘七毫二十五箇月

共一百五十一元四角九分二厘五毫筆墨月支二元三角六分九厘三毫二
十五箇月共五十九元二角三分二厘五毫兩共二百一十元零七角二分五
厘

第二目消耗 煤油茶水平月支五元六角四分八厘九毫二十五箇月共一百四十一元二角
二分二厘五

第三目僱人抄錄費 月支十五元二角四分八厘九毫二十五箇月共三百八十一元二角
二分二厘五

第三項印刷

第一目 志書印刷一千二百部價洋四千六百五十六元

第二目 加印地圖一百三十張價洋三十九元

第三目 書套暨裝費運費郵費等均由存款項下開支倘有不敷歸將來售書價內彌補不
入此次決算之內

以上三項總共支出七千八百五十四元五角二分

總結收支相消實存一百四十五元四角八分

卷數	門	類	第幾篇前	大字行	第幾字	誤字	正字
卷廿六	人物二之一	德行	十二前	二	十四	嵩	嵩
			十四前	十四	廿六	鮑	豹
			十九前	一	二十	糜	糜
			廿三前	二	十五	炙	灸
	人物二之二	文學	六前	九	五	恢	灰
			六後	六	廿三	公	履齊
			七前	二	廿八	徒	徒
			十一前	三	二	炳	柄
		武功	二前	十四	十四	孥	孥
		著書	一前	十一	廿二	伴	泮
		藝術	二前	十一	十八	宣	宜
卷廿七	人物三之一	烈女傳	一後	十四	十五	淮	非
			五前	九	三	姬	氏
			十六後	十六	十八	徒	徒
			十七前	十六	廿五	曾	生
			十七後	六	十八	致	至

卷數	門	類	第幾篇前	大字行	第幾字	誤字	正字
卷廿七	人物三之一	列女傳	十八前	十六	廿一	興	興
		篇終	一前	十	八	品	寸
卷廿八	藝文	史類	二前	五	六	徒	徒
		子類	三後	十六	八	成	咸
		集類	四後	九	二十	敲	敵
			六前	三	十	岡	岡
			十五後	十二	廿一	陸	陸
			十七後	五	九	此	比
卷廿九	藝文	文徵內篇一	四前	三	廿二	闕	關
			廿後	九	廿二	闕	關
			六前	十二	五	篋	篋
			六後	十四	八	影	彰
			十一後	十一	八	塵	塵
			十二前	十五	四	萬	而
			十二後	三	一	之	百
				十四	九	坦	垣

卷數	門	類	第幾篇後前	大字行	第幾字	誤字	正字
卷廿九	藝文	文徵內 篇一	十四後	十二	廿四	壯	仕
			十六後	十三	二	素	索
			十七前	八	廿二	形	形
			廿一前	十三	九	常	帝
			廿四後	七	十四	障	章
			廿五後	八	十二	興	與
			三十前	十六	廿三	斜	斜
			三五前	一	九	與	興
		文徵內 篇二	三前	四	廿一	嘉	喜
			十後	十五	五	孺	儒
			十一前	二	十二	脆	脆
			十二後	八	八	舍	舍
			十二後	五	十二	尤	九
			十四後	四	七	法	治
			十四後	四	四	句	旬

卷數	門	類	第幾篇後前	大字行	第幾字	誤字	正字
卷廿九	藝文	文徵內 篇二	十五前	六	廿五	又	又
			十六後	十二	十一	行	君
			十七後	十六	廿四	感	惑
			十八前	八	十	講	請
			十九後	二	十一	響	嚮
			二十前	十二	廿四	試	許
			二十後	三	十	間	聞
				九	八	寬	寬
				十一	二十	別	知
			廿一前	十二	廿六	石	有
			廿一後	三	十五	難	艱
				九	八	賦	賢
			廿二後	四	廿四	塵	塵
			廿四後	八	五	春	日
			廿五前	十三	十	寓	宇
			廿七後	二	六	便	使

卷數	門	類	第幾篇前	大字行	第幾字	誤字	正字
卷廿九	藝文	文徵內 篇二	冊二後	十	廿五	鎔	鑑
卷三十	藝文	文徵外 篇一	四十三前	十六	十四	羨	羌
			十三後	一	一	讀	謂
			廿二前	二	七	隙	隱
			廿八前	九	廿二	毫	毫
			廿九後	八	小註	鄱人陽	鄱陽人
		文徵外 篇二	三後	一	八	母	氏
			五前	二	廿五	女	妻
			六後	十五	六	塵	塵
卷卅一	大事記	黨事	三前	十五	九	坦	垣
			七後	十三	五六七	之章按	本章程
			十七後	四	三	毫	毫
		吳變	一後	十五	十二	惑	惑
			二前	十五	廿五	髣	髮
			十六	十六	三	蕭	蕭
			三後	十六	四	幸	辛

卷數	門	類	第幾篇前	大字行	第幾字	誤字	正字
卷卅一	大事記	吳變	四後	六	廿一	澈	徹
			四後	八	四二	孤免	狐兔
			五前	十	十	決	決
			五後	十六	廿五	侍	待
			六前	一	廿六	興	與
			二後	五	廿三	陸上	上陸
		雜錄	二後	一	十五	搶	槍
			三後	十六	廿一	偏	徧
				六	十八	巖	嚴